



17-11-22

SUPPL. A 60807/A

1894













# DE CONSEQUENDA,

ET

PRODUCENDA

SENECTUTE

DISQUISITIO.

AUCTORE

EVARISTO ALBITES LIMANO,

ROMANO MEDICINÆ PROFESSORE.

---

ROMÆ

ANNO MDCCXC.

---

Typis Philippi Neri in Platea Vallicelliana.

*Superiorum Permissu.*

Optima quæque dies miseris mortalibus ævi  
Prima fugit; subeunt morbi, tristisque senectus,

*Virgilius*

Senectus, ejus propria est ingenii maturitas, si adjun-  
ctam habeat sanitatem, verus vitæ fructus dici meretur.

Ramazzini

*De Principum valetudine tutenda.*

## VIRIS ÆTATE CONSPICUIS

EVARISTUS ALBITES

SALUTEM,

ET DIUTURNIOREM ÆTATEM:

**D**Iu mihi, seriòque cogitanti, quibus potissimum auspiciis brevis hæc *de consequenda, & producenda Senectute Disquisitio* a me subcessivis horis elaborata in lucem prodeunda, publicique juris facienda foret, vos, Venerabiles Senes, quibuscumque aliis sive splendore sanguinis, sive dignitatum gloria, sive doctrina, atque eruditione conspicuis viris, præferendos omni prorsus jure existima-  
vi, atque decrevi: Quum enim  
opus

opus universum, eò unice intendat, ut producendæ vitæ rationem, methodum, variasque leges proponat, atque commendet, illud propterea in lucem prodire nolui, nisi sub speciali illorum tutela, atque patrocinio, de quibus agebat Euripides: *Nullus tam diligit vitam, quam qui senescit*. Sed & alia accedit hujus mei consilii ratio; enim vero, quoniam testimonio, & auctoritate fulciri magis, atque tueri mea poterat oratio, quam vestra, Spectabilissimi Senes, utpote hominum, qui experientia rerum magistra edocti, probe norunt, utrum ea, quæ trado, ob vitam producendam præcepta, vel prorsus sint vera, vel saltem a vero non omnino aliena? Denique,

quum

quum in hoc suscipiendo labore nihil aliud mihi fuerit in votis, quam, ut incolumitati vestræ eo meliori, quo fieri poterat, modo consulerem; idcirco, si fructus labori, atque exitus voluntati respondebit, dulcius id mihi, atque jucundius futurum erit, quam si ab aliquo Dynasta, vel Mæcenate amplissimis honestarer muneribus, vel sui nominis splendore ab obscuro vulgo subducerer. Accipite ergo, Viri Humanissimi, hoc non dicam munus, sed meæ erga Venerandam Canitiem strictæ observantiæ monimentum, & quidquid sit, ab homine proficisci putate, qui nihil intentius, aut conatur, aut optat, quam ut ea, quam jam obtinuistis, ætate, satis diu, & prospere fruamini.

## CENSORUM JUDICIA.

**O**ptandum sane erat, ut aliquis ex Medicorum Collegio prodiret, qui pro Senectute servanda Opus inscriberet. Id autem claritate summa, pari eruditione, & eleganti stylo prælitit C. D. Evaristus Albites Limanus Medicinæ Professor in Libro, cui titulus: *De consequenda & producenda Senectute Disquisitio*. Quare cum ex commissione Reverendissimi P. M. S. P. A. Thomæ Mamachii hunc Librum perlegerim, ne dum quidquam deprehendi contrarium Religioni christianæ, & regulis morum, sed ita prudentia elaboratum, ut sine periculo ab omnibus legi, typisque committi posse censuerim.

Romæ hac die 23. Januarii 1790.

F. Michael Argelati Ord. Serv. B. M. V. Sacræ Theol. Magister, & Parochus S. Nic. in Arcione



**D**E mandato Reverendissimi Patris S. P. A. Magistri evolvi librum, cujus titulus est: *Disquisitio de consequenda ac producenda Senectute*, clarissimi Viri Domini Evaristi Albites Peruvianus, nostræ Universitatis in Philosophia, & Medicina Doctoris: Hunc quum multiplici eruditione, solidisque præceptis refectum, diserte, eleganterque conscriptum, ac concinne elaboratum summa mei voluptate viderim; nilque invenerim, quod Principibus, Religioni, bonisque moribus obstet, librum assequendæ longevitati valde profuturum iri, typisque idcirco dignissimum esse censeo. Datum Romæ Kal. Decembris 1789.

Georgius Bonelli e Collegio Archiattrorum Urbis, & in Romano Archigymnasio Decanus &c.

Dis.

**D** Isquisitionem de consequenda, & producenda Senectute adornatam a clarissimo Evaristo Albites Romano Medicinæ Professore jussu Reverendissimi Patris S. Palatii Apostolici Magistri non mediocri cum voluptate perlegi. Præstantissimus Auctor undique saluberrima præcepta collegit, quibus senectutem, quam omnes exoptant, adipiscantur; & adepta quam diutissime, bene, beateque perfruantur. Quapropter opus utile omnibus, & pergratum, & in quo nihil Religioni est dissonum, aut Principum juribus adversum, typis publicis vulgari posse censeo, si quidem ita videbitur iis, quorum est facultas.

Romæ idibus Xbris. ann. a partu Virginis 1789.

Leopoldus Micheli ex Archiattrorum Urbis Collegio  
& in Romano Sapientiæ Archilyceo Publicus Anatomes, & Chirurgiæ Professor.



I M P R I M A T U R,

Si videbitur Rmō Patri Sacri Palatii Apost.  
Magistro .

*F. X. Passeri Vicesgerens .*



I M P R I M A T U R,

Fr. Thomas Maria Mamachius Ord. Præd.  
Sac. Pal. Apost. Magister .



# PROEMIUM.

**N**E unus quidem mortalium est , qui ad longiores vitæ terminos pervenire non speret , aut certè non desideret . Hinc Juvenalis illud .

— *Da spatium Vitæ , multos da Jupiter annos .* — In desiderio omnibus esse quis est , qui non videat ? Id optat Amicus Amico ; id propinquus propinquis : idem unusquisque sibi nedum auguratur , sed quodam veluti jure sperat , & pollicetur . Senectus ergo aut jucundissimum vitæ humanæ spatium est , aut tale esse mortales sibi conniventes effingunt .

Senectutem porrò corporis , animique viribus præstantem , morbisque planè liberam dulcissimam rem esse æque , ac jucundissimam absque difficultate persuasum habeo ; infirmam vero , morbisque oppressam onus Aetnà gravius cum Catone puto . Sed ubinam illa Senectus est , quæ constans viribus sit , integraque valetudine fruatur ? Nullibi : respondet Juvenalis .

— Nam plurima cum sint hominum , puero-  
rumque discrimina , una tantum , ait ille , Senum facies semper est . —

— Ille humero , is lumbis , hic coxa debilis,

lis : ambos

— Perdidit ille oculos , & luscis invidet ,  
huius

— Pallida labra cibum capiunt, digitis alienis :

— Sed omni membrorum damno major dementia, quæ nec

— Nomina Servorum , nec Vultum agnovit amici,

— Cum quo præterita Cænavit nocte, nec illos, Quos genuit , quos eduxit.

Hæc pœna datur diu viventibus : ita satirarum princeps , a cuius sententia tantum ego recedo, quantum ille recedit a veritate . Nam si tot, tantisque laboribus humana vita vexaretur, quum ad senium pervenerit, non amplius vitæ diuturnitas singulare Divini Numinis donum esset, aut suavissimum naturæ munus, sed veluti pœna acerbissima daretur hominibus . Quod tum dissonum providæ naturæ videtur, quæ uni homini inter cuncta animantia se diù, longèque conservandi desiderium dedit , tùm sanæ rationi , ipsique Divino Oraculo repugnat : Deus enim Auctor , & Dominus vitæ promittit Justis numerum dierum in præmium virtutum producere : Impiis verò in poenam peccati minuere .

Quæ

Quæ quum ità sint , ne mortales æquo nimium auctoritati Juvenalis indulgentes Senectutem horrescant , ab eaque inquirenda , tanquam a peste desinant , illos considerare velim , seriatimque cogitatione perpendere : Corporis scilicet imbecillitatem , adversamque valetudinem non tantum proprium Senectutis vitium esse , quam inordinati vivendi generis , tantaque incommoda , quibus non rarò Senes anguntur , non tam diuturnæ ætatis , quam desidiosæ , luxuriosæque vivendi rationis fructum esse acerbissimum : *Libidinosa enim , & intemperata Juventus effæctum Corpus tradit Senectuti* , ut rectè Cicero animadvertit . Itaque in moribus , non in ætate culpam calamitatum esse , non sine ratione arbitrari licet .

Quæ quum tam vera sint , quàm quæ verissima , non jam Mortales Senectutem , tanquam gravissimum malum exorrescent ; sed ad eam , velut ad humanæ vitæ jucundio rem partem pervenire incumbent . Exemplà modò diutissimæ , simulque dulcissimæ senectutis proferam , quo magis Juvenalis sententia improbetur , nostraque de Senectute opinio luce ipsa clarior appareat . Quintum Maximum proponam , virum præclarissimum , longaue suæ , & felici ætate insignem , de quo Cicero in Libro , quem de

Senectute inscripsit, Catonem Senem Lelium ;  
 & Scipionem adolescentulos ità alloquentem  
 inducit. — Ego quidem ità dilexi Senem , ut  
 Equalem ; erat enim in illo Viro comitate con-  
 dita gravitas , nec Senectus mores mutaverat .  
 Hic & bella gerebat , ut Adolescens , cum pla-  
 nè grandis esset , & Annibalem juveniliter exul-  
 tantem patientia sua molliebat . Nec verò in  
 armis præstantior , quam in toga , Nec in lu-  
 ce modò , atque in oculis Civium magnus , sed  
 intus , domique præstantior . Qui Sermo ? Quæ  
 præcepta , Quæ scientia Juris augurandi ? Mul-  
 tæ etiam , ut in homine Romano , Litteræ ; Omnia  
 memoriæ tenebat , non domestica solum , sed  
 etiam externa bella , cujus sermone ità tum cu-  
 pide fruebar , quasi jam divinarem id , quod  
 evenit , illo extincto , ubi discerem , fore nemi-  
 nem . Quorsum tam multa de Maximo ? Quia  
 profectò videatis , nefas esse dictu , miseram  
 esse omnem Senectutem . Cum ergo non omnis  
 Senectus misera sit , sed ea tantum , quæ egra est ,  
 & imbecillis , quærendum utique , atque omni  
 opera curandum est , ut ad eam , quantum li-  
 ceat , perveniamus , aut saltem proximè acce-  
 damus , quæ si non prorsus incommodis vacue-  
 minus tamen , quoad fieri poterit , sit gravis .  
 Quibus modis , quibusque præfidiis id consequi  
 faci-

facile posset, perpaucis ostendere jam mihi in animo est: Quod nec inutile, nec ingratum hominibus futurum esse existimo, tum quia mortalium cujusque plurimi interest propriæ vitæ diutissima conservatio: tum etiam quia non parvi faciendum est, Senes esse in Republica, qui animi, & corporis viribus tantum valeant, quantum satis sit, ut domi, forisque privata, & publica negotia prudentia ætatis propria moderentur: Sine Senibus enim, nullæ prorsus Civitates existerent, quum eas opere, & labore Adolescentes, consilio autem, & prudentia Senes regant, & servant. Tum denique quia Senectus ea humanæ vitæ pars est, quæ ut plurimum Vino, Venere, epulis, aliisque adolescentiæ vitiis abstinens, unde innumeræ calamitatum causæ oriuntur, in causa est, ut Senes dies tranquillissimos agant, sine vinolentia, sine cruditate, sine luxuria, & sine insomnis: exerceant cum virtute commercia, gaudeant vera animi lætitia, & tandem post varia, longaque hujus vitæ tempora, in spem erecti Cœlestis Æternæ Beatitude, hilares, lætique ad extremum diem accedant, veluti qui ad Portum ex longa Navigatione tandem aliquando deveniunt. Explicata modo, aut brevi, ut melius dicam, calamo adumbrata

brata vitæ diuturnioris utilitate , & jucunditate , ut proposito meo aliqua ex parte satisficiam .

Primum quæ indicia in ipsa hominis , rerumque natura esse soleant , ex quorum cognitione vitæ diuturnitas sperari liceat , discutere aggrediar .

Tum si quod vivendi genus sit , ejus notitia , constantique observatione homines pervenire possint ad summam Senectutem , ostendam.

Deinde , auxilia præstantiora , quæ de tuenda Senum valetudine dispersa in Libris Medicorum inveni , undique collecta , uno tantum velut aspectu subjiciam .

Postremo quæ mala in Senes præsertim incidunt , & quibus salutaris Artis auxiliis aut tolli penitus possint , aut saltem leniri , explicabo ; isque præcipuus erit hujus operis labor . Jam modò horum unumquodque quid sit , & quantum valeat , aperiam . Si verò in re æque difficili , atque utili pertractanda rem acu non tetigero , mihi a Sapientioribus bonæ saltem voluntatis meritum minime denegandum fore existimo : Quam ob rem optima spe tutus , cautusque , operi manus admoveo .



# DE CONSERVANDA SENECTUTE PARS PRIMA

*Quæ indicia in hominis , rerumque natura  
esse soleant , ex quorum cognitione  
Vitæ diuturnitas sperari liceat .*



Missis quibuscumque nugis , vanisque  
observationibus , quas Astrologi , & Phi-  
sognomines circa vitam , hominumque ætatem  
præfagiendam , tum ex influxu Syderum , tum  
ex frontis , oculorum , manuum , totiusque  
corporis aspectu deductas ad nauseam usque  
tradiderunt , quasque nullo rationis iudicio ,  
nullave experimentorum fide comprobatas vi-  
deo , ea signa nunc tantum referam , quæ philo-  
sophi , & Medici Sapientiores longo studio , &  
labore didicerunt , eaque veluti minus dubia  
longæ vitæ præfagiendæ proponunt .

Et primum est , corporis videlicet valida  
constitutio , firmumque temperamentum , quod  
vel

vel a solo providentiæ dono , vel a propriis Parentibus homines fortiuntur .

Alterum natura locorum , ubi Homines vivunt , aut potiozem vitæ partem agunt .

Tertium , Exercitatio , five illa vilior sit , five liberalis , cui homines a teneris annis , ut sibi victum parent , assidue incumbunt .

Postremum , rectè , & sobrie vivendi ratio . Jam modo horum unumquodque brevi examini subiiciam .

I. Firmam , validamque corporis constitutionem rarò a sola natura , frequentius homines a propriis parentibus , quodam veluti hæreditatis jure , obtinent . *Fortes enim creantur fortibus* , & sicut bonis in Juvencis , & in Equis generantium transfunditur virtus , ita fere in hominibus ; per similia enim individua plerumque multiplicat natura . Interest inde plurimi pernoscere ad præsentendam vitæ diuturnitatem , *cujus* ex corpore , & *cujus* sanguine homo coalitus sit . Qui itaque a forti generatur , habet secum quædam diuturnioris , & longioris vitæ semina ; Qui verò ab imbecilli , nescio quid vitum , & caducum habet : Qualis enim in propagine , talis sobolis humor esse consuevit .

Sed cum multi inter ipsos homines , qui valentissimi habentur , longævique sunt , aut frigidi



gidi natura sint, aut calidi, multique ad humidum, & alii multi ad siccum temperamentum accedant, sine ullo sanitatis detrimento, difficile dictum est, qualis ex iis naturalis constitutio præstantior sit, quæque longum ævum promittat, quæ contra deneget. Videbis profecto homines toto cælo diversos æque sanos vivere, & æque ad vitæ diuturnitatem pervenire. Quod naturæ arcanum cum sensibus, non mente percipiat, de eo subtilius, quam verius inquirendo, abstinco.

Si vero aliqua sit optanda corporis constitutio, quod ex ea & firma valetudo, & longa vita non sine ratione expectanda videatur, illa profecto est, quam a Polemone Ateniensis in definitione humanarum effigierum ita descriptam invenio — *Homo tota figura erectus sit; Latera, atque universos corporis articulos robustos, fortesque habeat: ossa magna, comam asperam; ventrem latum, atque concavum: humeros validos: Scapulas in latitudinem distinctas: pectore, atque Cervice validus sit: Coxas carnosas ostendat; malcolis prævalidis præditus sit; pedes quoque bene articulatos habeat: colorem acrem, aciem humidam, oculos non magnos, neque patentes; neque rursus oclusos: Supercilia non recto ordine disposita sint: Erons perfecta,*

*Æta, non autem modica sit : vox minax , vehemens , magnaque : Spiritus reciprocatio constans : hæc certè robusti , atque prævalidi corporis indicia habentur* — Si ergo ex aliqua humani corporis constitutione aliquid sperari potest ad consequendam vitæ diuturnitatem , ex hac quamplurimum sperari , jure , meritoque potest ; est enim constitutio prorsus herculeæ . Sed proh tempora ! Quam paucos Hercules nostra producit Ætas , mox datura progeniem debiliorem : quoniam jam desidia , & luxuria , vinum , & venus , nedum animos , sed Corpora quoque corrumpit . Jam enim :

*Perventum ad resides annos , & mollia vitæ  
otia . . . . .*

*Non studiis idem tenor , altera somno ,  
Altera lex epulis indicitur , altera Baccho ;  
Omnia libertas latè tenet , omnia luxus ;  
Hinc animæ fragiles , & languida corpora  
natis .*

II. Sequitur alterum indicium , quod est natura locorum , in quibus homo vivit , aut majorem ætatis partem degit : Multum autem inter naturam locorum interest : alia enim loca salubria esse , alia fere pestilentia , quotidianæ experientia evincitur : Alia quoque sicca sunt , & alia humida : hæc frigida ob longiorem Solis

recessum ; illa calida ob ejus viciniorem ap-  
pulsam .

Sunt præterea alia multa locorum disci-  
mina , quæ aliud , & aliud in hominum corpo-  
ra , & mentes agunt . Athenis tenuè Cælum  
esse , affirmat Cicero , ex quo acutiores etiam  
putantur Attici . Crassum Thebis , adeòque tar-  
diores Thebani . Sed quod ad rem nostram per-  
tinet , propiusque accedit : Cervia , Urbs ad  
Maris Adriatici litus posita , Cælum grave , &  
pestiferum existimatur , ex quo Cervios valetu-  
dinarios esse , fereque ex iis nullos ad longum  
ævum pervenire , vulgaris observatio est . Ty-  
buris contra salutare , adeoque Tyburtini valen-  
tiores putantur , & longævi ; Eoque fortasse  
Horatius extremam ætatem in hac Civitate  
agere in votis habebat . Tybur , aiebat ille ,

*Sit meæ sedes*

*Utinam Seneclæ :*

.....

*Ver ubi novum ,*

*Tepidasque præbet*

*Jupiter brumas .*

Communi jam Medicorum sententia , uno-  
que Philosophorum consensu in tanta locorum  
varietate ille salubrior est , & vitæ diurnita-  
tem promittere celebratur , ubi transeant sine

nube dies , aut saltem densioribus nebulis minus obscurentur . ubi vapores stagnantium aquarum , mephitides , aliaque telluris inquinamenta nostræ atmospheræ ambitum non inficiant , ubi non procellis , aut magno impetu venti ruant , sed leni afflatu moveantur , ubi denique aer nec immodico solis ardore æstuet , nec nimio nivium frigore obrigeat .

Sunt præterea Terrarum loca , quæ benigno , ut ita dicam , Syderum influxu non sine Dei Providentia , longævus homines faciunt . Inter hæc montana , & Campestria , & Arboribus consita , & mari undequaque circumdata commendantur . Hinc altiorum montium incolas viridissimo senio ætatem agere , testatur Avicenna : & in Sylvis Hircaniæ homines ad centesimum , & quinquagesimum ætatis annum vivere tradit Hallerus . Ab Insulis quoque par beneficium ibi degentes referunt . Jabæ , & Sumatræ Insulæ , quemadmodum Auctores non dubiæ Fidei testantur , incolas ad fere ducentesimum ætatis annum alunt . Idem in plurimis utriusque Americæ locis sæpius accidisse , res est experientia confirmata . In oppido Peruviani regni amplo illo quidem , cui nomen Caxamarca , ubi propter aeris salubritatem , & jucunditatem veteres hujus Imperii Domini hic male

male præsertim domicilium statuerant ; plurimos ad ducentessimum annum integris animi , & corporis viribus , magnaque natorum copia vitam produxisse , viatorum , scriptorumque non dubia fides testatur . In Ichocan vicus a Caxamarca non longe distans , anno Domini 1766. adhuc in vivis erat Christopharus de Tapia , vir ætate insignis , & primi ævi Patriarchis merito comparandus , qui quum centum , & quadraginta annos ageret , tanta animi , & corporis salubritate fruebatur , ut ex plano equum conscenderet , sine baculo perambulare , & vicinos omnes , qui fere ad millenarium numerum accedebant , & quorum ipse pater erat , & prima propago recto , prudentique regimine moderaretur . Testis est in suis ephemerides anni 1766. Cosmas Bonus in Urbe Limæ clarissimus Medicinæ professor . In iis quidem locis aeris puritate , & claritate , frequentique innovatione , a resolutione , & putrefactione homines præservari , ideoque diu , multumque vitalem spiritum agere , ratio suadet .

Tandem in nonnullis Italiæ locis , ( ut alias Europæ partes silentio præteream , ne nimis in longum procedat oratio ) homines plurimi consenescent . Romæ quoque homines diù , multumque vivunt , dummodo frugi sint ; quod non-

nonnulli subtilius, quam verius disputando negare non ambigunt ; Sed rem extra omne dubium ponendam esse, quamplura exempla tum vetera, tum recentiora demonstrant. Nonne olim Metellus, Quintus Fabius Max., Cato Major, & Appius Claudius Romæ diù multumque vixerunt ? Nonne quoque Marcus Valerius Corvinus centesimum annum implevit ? Hujus inter primum, & secundum Consulatam quadraginta sex anni intercesserunt, suffecitque integris animi, & corporis viribus privatis, publicisque rebus. Nonne quoque Pollio Romulus Augusti tempore ad vigesimum supra centesimum annum pervenit ?

Mulierum quoque quamplurimarum spatium vite non minus longum, ac prosperum fuit. Livia quidem Rutilii septimum, & nonagesimum, & Terentia Ciceronis filia tertium, & centesimum annum explevit ; Clodia pariter Aulii filia, cum decem, & quinque filios enixa fuisset, quintum decimum super centesimum annum excessit.

Quis autem, si ad recentiora tempora accedat, modico paginarum numero comprehendet omnes senes utriusque sexus, & cujuscumque conditionis, qui Romæ diu vixerunt ? Plures certe ii sunt, quorum apud doctos, indoctosque viros adhuc memoria viget, eorumque recordatio cum  
omni



omni posteritate adæquabitur; Quia jam usus obtinuit, ut sepulchralia marmora, quæ Virorum Illustrium cineres obtegunt, eorum facta non modo detegant, sed vitæ quoque diuturnitatem exprimant.

Itaque Supremus Uuiversi Moderator curam humanarum rerum agens, Romam in egregia, temperataque Regione collocasse, videtur, ubi inquit Livius, saluberrimi Colles sunt, flumen opportunum, quo ex mediterraneis locis fruges vehuntur, quo Maritimi Commeatus accipiuntur; Mare vicinum ad comoditates, non expositum nimia propinquitate ad pericula Classiarum externarum Regionum. Italiæ medium ad incrementum Urbis natum unicè locum, ut infectis omnibus propulsis, diuturniori vitæ spatio tranquillissimè potirentur, quibus est humani Generis saluti præesse.

Hæc libentius refero, ut spe certa expectare possit Alma Urbs Pium VI. Pont. Opt. Max. qui Petri in Cathedra sedet, Navemque ejus moderatur, et regit, ad longissimos humanæ vitæ terminos esse facile perventurum: eaque animi, & corporis felici constitutione, ut *ejus oculi puro lumine vigeant, pedes imprimant certa vestigia, auditus sit penetrabilis, dentes candidi, vox sonora, Corpus solidum, et succiplenum, Cani cum*

*robore discrepent, non memoriæ tenacitatem, ut in plerisque cernimus, antiquior Senectû dissolvat, non calidi acumen ingenij frigidus Sanguis obtundat, non contractam rugis faciem arida, frons exasperet.* Ità olim Div. Hyeronimus de Paulo Concordiensi jam fere Octuagenario alloquebatur, ita quoque præsens, & ita futura ætas de Pio VI. potiori jure loquetur. Id profecto omnium in votis esse video; faxit D. O. M. ut publica expleantur vota.

Ast quoniam de aeris natura, & influxu ad vitæ diuturnitatem prænuntiandam fatis, superque dictum est, modo dicendum erit de iis vitæ exercitationibus, aut artibus, quibus homines quæsus præsertim causa incumbunt; videndumque, quantum hæc ad valetudinem, & longam vitam conferant.

III. Sæpius aliquod artis genus, sive liberale sit, sive sordidum homines excolunt, & amplectuntur, priusquam, an optimum sibi futurum esse possit, intelligant. Instituitur enim exercitationis genus ab adolescentia quæ ut plurimum consilii experta est, judicioque imbecillis: Plurimi Parentum sequuntur exempla, ad eorumque consuetudinem suæ vitæ genus deducunt: Nonnulli amicorum consilio reguntur: Multi rei addiscendæ facilitate, per plures utilitate, pauci bonitate



rapiuntur. Sunt quoque, qui genio indulgentes deliberant, quod potissimum artis genus sequi velint : in quam deliberationem quum plurimum voluptas, parum ratio conferat, tractu temporis videndum est, an vitæ genus cum ejus natura pugnare videatur. an vero mutuo federe convenire. Qui illam vivendi rationem amplexus sit, quæ ad naturæ suæ constitutionem conferat, is constanter agat, in eaque prosequatur: qui verò in deligendo se errasse, intellexerit, institutionem mutet, aliudque exercitij genus amplectatur, quod propriæ constitutioni inimicum non sit. In quo maxima porrò difficultas est: quum vix aliquod exercitationis genus sit, sive liberale, & ingenuum, sive humile, & vulgare, quod non gravissima vita incommoda, multasque aegritudines secum afferat: Sæpeque homines, unde decus & honores excipiunt, aut alimenta ad vitam sustentandam capiunt, mala multa, ipsumque tandem interitum præproperè hauriant.

Videmus inde litterarum, atque scientiarum studiosos, quorum vita vulgo beatior existimatur, sedendo, & legendo contabescere; Eos, qui Foro implicantur, dum lucri, & honoris non parvam mæstem colligunt, in plurimos morbos incidere quotidie observamus, qui eos sensim

debilitando , mox lecto affigunt , donec e vivis , citius,quàm par erat,tollant . Unde merito Petrus Xilander suæ ætatis jure peritissimus in Epistola , quam Vopisco Fortunato Pemptio de litteratorum morbis scribere meditati misit, ità conscripsit : *Vidimus robustissimos Heroes,qui adamantini habebantur , in ipso limine senectæ , huic oneri , litterarum scilicet studio , succubuisse .*

Medici quoque , qui in Republica parem jurisperitis locum sibi vindicant , dùm plurimæ salutaris artis præsidio vitam producunt , eosque a morbis defendunt , ipsi sæpe maligno contagio correpti , e vivis immaturè excedunt . Pictores etiam rarò diù vivunt . Divinus ille Raphael , qui arte sua videbatur naturam superasse , morbo correptus , naturæ debitum immaturè solvit . Immortalis Córregius vitæ dulcissimo usu satis quoque immature privatus fuit . Multi alii quoque immortalitate digni non dispari fato periere .

Nec solum litteratis viris , & liberalium artium cultoribus tanta mala occurrunt . Agriculis quoque , alijsque multis , qui operibus mechanicis assiduè operam suam præstant , paria discrimina imminet . Laudatur certe agricolarum vita ut sanissima , & tranquillitatis plenissima , sed habet ipsa quoque sollicitudines suas , & quandam veluti vitæ caducitatem . Ex ijs enim ,  
qui

qui ad agrorum culturam, aliaque opera rustica nervis, & artibus assiduè incumbunt, paucos ad sexagesimum ætatis annum vitam produxisse observavit Boherhavius. *Labor enim nimius, & a teneris assuetus*, ait Hallerus, *frangit corpus, & præcocem facit senectutem*. Et ut alia taceam exercitationum genera, ne longa enumeratione tædio sim, metalli fossores, dum viscera terre perlustrant, & alijs opes parant, sibi breviorē vitam faciunt; pauci enim in eo labore ad lustrum vitalem spiritum protrahunt. Nihil inde mirum, si in fodinis invēnies mulieres, qui septem nupserint viris, ut in carpatione monte se vidisse, testatur Agricola.

Quum ergo hominis conditio ea sit, ut ex eo ipso, unde alimenta quærantur ad vitam sustentandam, interitus non raro producat, sæpeque citius, quàm par erat; omni opera curandum est, ut ea exercitationum genera amplectantur, quæ propriæ constitutioni inimica non sint, aut saltem minus secum periculi involvant; Sed de ijs accurate dicere, quum longum, & perdifficile sit, inquirendum jam est, quantum ad diuturnitatem conferat salutaris dietæ institutio, & quid ex ea sperandum.

IV. Rectè, & sobriè vivendi ratio, quæ jure meritò sanitatis mater esse solet, quum a

juventute instituitur, constanterque observatur, præmium senectutis promittit. Quod salutare humanæ vitæ præsidium, ne longa oratione percurram, uno exemplo complectar, idque tanquam eximiae utilitatis omnium imitationi proponam. Ludovicum Cornarum ultrà centesimum annum vitam produxisse jam per totum orbem fama vulgavit. Illum imbecillum fuisse, morbisque obnoxium a juventute, scripserunt plurimi, ipseque de se testatur in aureo libro, quem de vitæ sobriæ commodis jam ferè centenarius conscripsit: Sed imbecillis, morbosæque natura ab eo ità cibi, vini, & veneris temperantia inmoderata fuit; ut post quadragesimum ætatis annum, (quemadmodum de Maganico Philosopho scripsit Cicero, ) nemo eum unquam vinolentum, nemo sâturum, nemo in eo libidinis vestigia viderit.

Itaque sobrietatis studio, præclaraque temperantiæ virtute extremum fatum, ab ipso juventutis flore jam ipsi imminens retardavit, produxitque vitam ultra centesimum annum, tantoque corporis, & animi robore, ut jam centenarius de se scripserit: *Ità sum agilis, ut ex plano equum conscendam, & altos gradus, & colles sublimes pedibus subeam. Deinde semper sum alacris, jucundus, & benè contentus, liber*  
*ab*

ab animi turbellis, & omni molesta cogitatione, quorum loco gaudium, & pax in corde meo suam fixere stationem. Non me tædet senectutis, quam ego magna voluntate transigo. Quails planè senectus multum præferenda est alterius juventuti, & senio, eo quod per vitam sobriam, Dei gratia, ab animi perturbationibus, & corporis morbis sanata, non sentiam ea incommoda, quibus infiniti juvenes, & totidem senes misere conflantur.

Quæ quum ita fiat, facile intelligi potest, quod diu, salubriterque vivere, non positum tantum sit in robusta corporis constitutione, aut salubri natura loci, aut optimo exercitationis genere, quæ omnia non semper sunt in nostra potestate, sed etiam in sobrietate, atque recto vivendi regimine; quod unum a nostro arbitrio pendet: Nasci enim fortes non possumus, vivere sobrie possumus. Sobrietas autem facit, ut ille, quem natura fortem genuit, facilius se sanum conservet, diuque vivat; ille, quem debilem, licet majori cura opus habeat, tandem æque ad vitæ diuturnitatem perveniat: Quod enim corporis naturæ deest, arte, & custodia sui suppleri potest, veluti nobilis Cornari exemplo satis, superque mihi demonstrasse videtur. Hanc quoque utilitatem temperantia, vitæque fruga-

litas habet , ut acris vitia emendet . Itaque Luciani sententia illa : *Ubique diu vivi potest , modo sit temperata ratio vivendi* , digna est , quæ ad æternam hominum memoriam prædicetur , ut ita mortales , quocumque terrarum loco sint , animum erigant , quum solo sobrietatis beneficio vitæ quoque diuturnitatem assequi possint .

Quoniam satis dixisse mihi videor de indicatijs , quæ in ipsa rerum , hominumque natura sunt ad sperandam , prævidendamque vitæ diuturnitatem ; modò de ijs dicam , quorum usu , assiduaque consuetudine homines ad eam pervenire facile possint : Quod est alterum hujus inquisitionis caput .





# DE CONSERVANDA SENECTUTE PARS SECUNDA

*Quæ ratio Vitæ tenenda sit ab Adolescentia,  
ut possint Homines ad vegetam Senectutem  
facile pervenire .*



TAM multiplex, tamque in infinitum varia est hominum *ideosyncrasia*, sive sit naturalis eorum constitutio, ut una, eademque præsidia constanti lege sancire, quæ omnibus æque conferant, ut sane vivant, & ad vegetam Senectutem pervenire valeant, res potius optanda, quam speranda videatur. Docet porro assidua rerum contemplatio, adeo stupendæ, fereque incredibili varietati aeris, victus, potus, cultusque corporis persæpe homines sine ullo vitæ discrimine assuescere, ut inde jure merito appareat, nihil certum, & constans esse in medicina, quod rerum usum discriminet, quod perniciose distinguat a salutaribus. Homines nonnullos quotidie

tidie observamus, quorum natura adeo robusta est, ut nullo ictu infringatur; Alios, quos licet vitæ institutio per se in deterius ducat, longa tamen consuetudine a noxis tutos faciat, incolumisque conservet; Non paucos, quibus varium vivendi genus, imo frequens in errores lapsus, nedum nocet, quin juvat, & proficit. Sed quum mala rei assuetudo commendatione digna nunquam sit, paucorumque exemplum, qui, inordinate vivendo, diu tamen, feliciterque vixerint, nefas sit ad imitandum proponere, ea tantum præcepta, quæ circa vitæ rationem pro consequenda diuturnitate a sapientioribus viris commendantur, paucis docere Instituti ratio postulat.

Sed antequam ad rem propositam proximè accedam, tria præmittenda puto, & primo, quod ab ipsa Adolescentiâ, quum videlicet genæ, viresque vigent, eam vivendi rationem instituendam esse, quæ animi, & corporis vires longe sustineat. *Quæ enim dementia major est, ait Seneca, quàm ad quinquagesimum, aut sexagesimum ætatis annum differre sana consilia, & inde velle vitam inchoare, quo vix alij eam perduxerunt?* secundò, quod quum Hominum valetudo sustentetur, ut Cicero animadvertit, notitia sui corporis, & observatione earum rerum,

rum,



*ram, quæ aut prodesse solent, aut obesse; Unus-*  
*quisque observare debet, quæ sibi propria sint,*  
*quæ aliena; ut illa prosequatur, hæc effugiat.*  
 Tertio, licet unusquisque eâ vitæ præsidia pro-  
 sequi debeat, quæ suæ naturæ, & corporis con-  
 stitutioni optime prodesse, expertus sit, ea nihilo  
 secius non negligat, quæ viri in arte medicâ  
 peritissimi tanquam salutaria proponunt. In  
 his enim ratio, & autoritas: in illis natura,  
 & usus plurimum sibi vindicant. Si autem na-  
 tura, & ars, ratio, & auctoritas amicè conju-  
 rent, altera alteri opem ferat, universa simul  
 quodam veluti facti fœdere, longam, vegetam-  
 que senectutem sobrio, & prudenti cuiquam  
 promittent, & dabunt; hisce præmissis.

Primum præceptum, quod inter multa alia  
 polaris instar syderis elucescit, & ad vitæ diu-  
 turnitatem, tanquam ad portum deducit, illa Pla-  
 tonis sententia est, *optimum ad senectutem viati-*  
*eum esse, etiam juvenibus, juxta viam, & rationem*  
*naturæ vivere.* Quum ergo natura paucis contenta  
 sit, paucis quoque adolescentes contenti vivant.  
 Parsimoniae idcirco a teneris assuescant; *tantum ci-*  
*bi, & potionis adhibeant, ut reficiantur vires,*  
*non opprimantur.* Ex qua temperantiæ singula-  
 ri virtute id facile obtineri solet, ut ciborum  
 coctio, & digestio in stomacho perficiatur. *Ille-*  
*que*

*que verè sanus, & longævus*, ait Santorius, qui quotidie conquirit, & digerit. Ità enim quidquid ex corpore per inevitabiles vitæ actiones continuò amittitur, jugiter restituitur, in quo vita consistit, & sanitas.

Quum autem præcipua humanæ machinæ instrumenta ad ciborum coctionem, & digestionem dentes sint, maxima cura, operaque danda est, ut ipsi firmi, sani, venustique conserventur. Valde proficiet ad rem si homines a prima ætate in usu habeant, vel pennicillo, vel dentifricio aliquo dentes leviter aliquando perfricare. Utile etiam erit, vino albo odorato, aut rubro austero, in quo myrra, cinnamomum, parumque aluminis diù infusum sit, os quotidie abluere. Hinc enim non solum os benè olebit, sed dentes quoque eluentur, in alveolis diu firmi servabuntur, vixque in ipsa decrepita ætate decident.

Temperantiæ virtus cum non voluptati, sed sanitati consulat, sobrie viventibus famem pro condimento in cibo præscribit, in potu sitim: idcirco salsamenta, multiplicesque ciborum varietates, quæ non esurientes ad edendum allecant, vitari debent, mensaque simplici, tenuique apparatu comparanda,

Victus tenuis, naturaque parabilis hæc secum

com-

commoda refert: Stomachum non onerat, vires corporis recreat, animi virtutes fovet, cupiditates reprimit, somnum blandum consiliat, ex qua alacer, & validus homo ad sua consueta officia revertitur. Non ita fit, quum varia permiscuntur; postquam enim assa, & elixa, salsa, & amara, acria, & subdulcia; Carnes, & Pisces una mensa, satisque abunde comeduntur, in stomacho excitatur tumultus, qui eum ad secessum, vel vomitum adigit, somnus discutitur, caput dolet, facies decoloratur, os fœde putet, & spiritus tanta hebetudine prægravatur, ut consueta munera præstare nequeat. Vitandum ergo satietatis vitium est, quod tanta secum incommoda refert.

Si vero evenerit, ut excessus aliquis in victu committatur, supervacua materies tunc vomitu protinus eiiciatur, ne intus corrupta noceat, aut saltem liberaliori frigidaë aquæ potu diluatur. Mirum est quantum satietati, & repletioni conferat frigidaë potio liberalior, præsertim si saccharo, & succo Citri, quemadmodum in Magnatum conviviis sorbilla luxuries parat, bibatur. Idem sperari licet, si frigidaë spiritus vitrioli subdulcis ad gratum acorem instilletur: eo quod huiusmodi potiones fermentationem moderando, ciborum coctionem adjuvant.

Sed satius semper erit satietatem effugere, quàm satietatis malis occurrere. Ea de causa bis potius in die, quam semel cibum capere expedit: ut ità partitis vicibus minus cibi accipiatur, quam si una tantum vice caperetur: acceptumque stomachus facilius retineat, & conquoquat. Neque uni tantum comestioni a teneris assuescere convenit, quamvis ea non nimia sit; tum quia licet sani vivant, qui ità assueverint, imbecilliter tamen vivunt: Tum etiam quia *citius senescere solent, qui uni tantum comestioni assueverint*, ut animadvertit Hippocrates, multique experti sunt. Alimentum porrò bis saltem in die assumptum, materiem nutritioni assiduè suppeditat, humoresque jugiter renovat: Quod unica comestione vix fieri potest, quæ si immodica est, stomachum onerat, si parvior, alimentum brevi consumitur: eoque deficiente, humores sensim sine sensu acrimoniam concipiunt, solida atteruntur, & ita homo ocius, quam par est, ad senium devolvitur.

Ut temperantia in cibo ad longæ vitæ consecutionem satis, multumque prodest, ita quoque vini, & concessæ veneris usus, si moderatus sit, excitando corpus, viresque animi recreando, non parum, conferre poterit. *Libidinosus contra, quemadmodum jam inui,* & *intempe-*

*tata Juventus effatum corpus tradit senectuti.*  
Idcirco Juvenes semper memoria teneant quod  
tum vinum, tum venerem, tum alias quascum-  
que corporis voluptates

..... Commendat rarior usus .

Præter temperantiam in cibo, & potu, alijs-  
que Humanæ vitæ voluptatibus, labor corpo-  
ris, aut quotidiana ejus exercitatio satis, mul-  
tumque conferet ad longiorem vitam conse-  
quendam. Quemadmodum enim latinissimus Cel-  
sus nos docet : *Ignavia corpus hebetat, labor fir-  
mat : illa maturam senectutem : is longam ado-  
lescentiam reddit.* Inde quantum mihi arrideat,  
nescio dicere, aurea sententia illa, in qua Cato  
Vitam hominis similem ferro esse dijudicat. Nam  
*vita nostra, inquit, propè uti ferrum est. Fer-  
rum, si exerceas, conteritur; si non exerceas, ta-  
men rubigo interficit : Ità homines & exer-  
cendo videmus conterî; si nihil verò exerceas,  
inertia, atque torpedo, plus detrimenti facit,  
quam exercitatio.*

Ignavia ergo quanta cura, & diligentia vi-  
tanda sit, clarè patet; Sed ità quotidie exerce-  
ri oportet, ut æqua proportio sit inter exer-  
citationes, & corporis vires. Per exercitationes  
viribus pares robustius corpus efficitur, mem-  
braque, & solida omnia majorem firmitatem



acquirunt, facultatesque animi ad propria munera perficienda expeditiores evadunt, adeoque homo ad vitæ diuturnitatem disponitur. Non ita fit, quum dispares viribus exercitationes sunt; quoniam observavit Aristoteles, longâque experientia deprehendit, quum de animalium longævitate inquireret, *ea citius senescere, quæ ultra vires laborant*. Aristotelis observationem Sanctorius, quem illustrem medicina statica totum per orbem fecit, autoritate suâ confirmat: *Exercitium enim, sive animi, ait, sive corporis violentum, reddit corpora levioris ponderis, efficit velocem senectutem, & mortem præmaturam minatur*.

Si corporis exercitationibus exercitia animi adolescentes mutuo fœdere adjungant, beatam quoque, & jucundam senectutem expectare poterunt. Id enim habent studia, quæ porro sunt animi exercitationes, quod *juventutem alunt, & senectutem oblectant*. Sed in ea collectis viribus incumbere, ut animo res valde amica, sic corpori inimica est. Dum enim assiduo studio animi virtus exercetur, corporis robur infringitur. Quare non sine ratione Ramazzinus de morbis litteratorum agens, eorumque causis scripsit *Veluti ex nimia corporis exercitatione anima ad mentis functiones languescit*: Sic ob

*nimiam animæ contentionem circa sapientiæ studia , corpus marcescat , necesse est .*

Ab exercitatione litterarum cessare interdum docti debent , otiumque capere ; Ludis idcirco delectentur , gratissimaque societate , & confabulatione suorum æqualium . Quærenda quoque delectatio est in musicæ dulci concentu , aut saltu intra numeros : in gestatione , vehiculatione equitatione , alijsque gratissimis sed innocuis humanæ vitæ voluptatibus . Ut ità omnis animi sollicitudo , præsertimque tristitia , quæ exsiccet ossa , ætatemque exolvit , repellatur , letitiæ verò , animique hilaritati locus sit , quæ ætatem floridam diu servat , alteraque veluti vita mortalibus est . Corporis , & animi exercitationes *somnus* subsequatur , magnus ille virium reparator , quies animi grata , & pars humanæ vitæ omnium placidissima , cujus ope particulæ nutritivæ , quas vigilia , & labor diurnus consumit , corpori restituuntur , & quidquid amissum est , ejusdem ope reparatur .

Septem horarum somnum sufficere , communis est sententia , tum ut ciborum digestio perficiatur , tum , ut quæ excernenda sunt , separentur , tum etiam , ut amissæ vigilia , & labore vires in integrum restituantur . Unde forsitan locum habuit tritum illud , & vulgare .



*Septem horas dormisse sat erit juvenique senique.* Sed hyeme, & vere somnum aliquantulum longiorem corpus exigit, ipsæque noctes, quæ diuturniores sunt quodammodo suadent; adeoque hac tempestate etiam ad octo horas sine ullo sanitatis detrimento somno indulgere unusquisque poterit; Si verò longior somnus sit, animi, & corporis vires labefactari solent, unde in hoc *polisircassia*; seu nimia obesitas & in illo *hebetudo* facile exoritur. Tempus somno opportunius nocturnum est, ad eumque invitant tenebræ, & silentia noctis: totum verò diem stertere, noctesque totas vigilare nedum animo, sed corpori quoque inimica sunt: ab iisque longè removent Avium diem salutantium suavissimi concentus, necnon gratissima solis præsentia, qui suo fulgore tenebras disperdens cuncta animantia ad consuetam allectat, & invitat officia.

Vitanda ergo sunt omnia negotia, quæ salubres somnos abrumpunt, hominesque a nocturna quiete adeò revocant, ut ad multum diem dormire cogantur. Si verò aliqua ex causa nox insomnis forte agatur; tunc diurnas, quot opus est horas, somno transigere nedum convenit, quinimo necesse est, ne videlicet immodica vigilia facultates animi, viresque corporis frangat. Quæ hæcenus dixi, quæque dicturus sum

sum, parvam, vel nullam utilitatem ad consequendam senectutem haberent, si humanæ machinæ emunctoria officio suo non fungerentur. Nam quæ excernenda sunt, si plus, quàm par est, corpore retinentur, massa sanguinis contaminari solet, unde velut ex fecundissimo fonte plurimi scaturiunt morbi. Alvus, & vesica sunt, ut ita dicam, viæ regiæ, per quas natura, quæ superflua, & inutilia nutritioni sunt, corpore ejicit. Si verò hujusmodi viæ aperiendæ sint, ut debita officia exequantur, blandis medicamentis uti oportet: nam pharmaca valentiora, quemadmodum Hippocrates, & Plato duo artis medicæ lumina asseverant, licet oprato effectu fungantur, stomachum verò debilitant, breviorēque ætatem faciunt. Itaque ad longam, & bonam valetudinem consequendam, eorum sapientissimo consilio, omnia prius tentanda sunt, quàm pharmacis corpus operosè commoveatur; oleribus, idcirco, carnibus teneriorum animalium, & fructibus bene maturis alvum lenire tutius erit, quàm remediis præsertim valentioribus, quibus si alvus non facile obtemperet, clysterj usu compelli potest. Sunt quoque plurima alia præsidia ad alvum leniendam, sed omnia antecellit Marzialis illud, quod Rufo proponit.

*Utere lactucis, & blandis utere malvis,*

C

,, Nam

*Nam faciem durè , Rufe , tacantis habes :*

Præter alvum , & vesicam sunt quoque alia humanæ machinæ emunctoria , quorum ope sanguis a superfluis depuratur . Sed inter cætera spiracula cutis principem locum habent : quoniam continue ex iis spirat , forasque emittitur humor , *perspirationis* insensibilis denominatione notus, qui si qualis, & quantus oporteat , quotidie secernatur , sanitas conservari semper potest . De hujus secretionis commodis , & incommodis , excessu , & defectu satis , superque egit clar. Sanctorius in aureo libro , quem de medicina statica scripsit . Legi propterea eodem ex fonte nialumus , quam hic referri .

Tandem de his præfidiis agere non alienum erit, quæ omnium medicorum gravissimus Verulamius ad vitæ diuturnitatem consequendam proponit . Vir iste , qui de animalium longævitate adeo accurate tractavit , ut materiem plane exhausserit , tria præfidia , *unctionem* videlicet , *balnea* , atque *friktiones* , pro diuturniori vita obtinenda commendat , & in his profecto plus spei esse video , quam in tot panaceis , aliisque arcanis , quæ scioli venditant , delirique alchimistæ somniant . Quem enim , quæso , ( ut alia multa jam in ludibrium habita , silentio præteream ) ad maturam senectutem perduxit *Ens cedrinus* Helmontii , aut *Elixir proprietatis* Paracelsi ? Neminem , quem sciam ; imo hel-

Helmonsius, qui omnibus ævum longissimum facile pollicebatur, vix sexagesimum ætatis annum attigit, ad quam ætatem etiam rustici inter computationes facile veniunt. Ipse quoque Paracelsus vanissimæ jactantiæ vir, qui Nestoris annos operæ panacæ cunctis promittebat, quum vix ætatis septimum supra quadragesimum superasset, e vivis discessit; quare ita merito a lepido Poeta deridetur.

*Si præcox medici mors scandala præbet, oportet*

*Scandala præbuerit mors, Paracelse, tua;*

*Nam dum nestoreum promittis pluribus ævum,*

*Ipse prius latho præveniente, cadis*

*Ridiculum medicum! si vis Panacea senectam*

*Conferat ut reliquis, ne moriari prius.*

Quem in super ad vitæ diuturnitatem protraxit illa celeberrima olim sanguinis transfusio? Eam faustu eventu, finxerunt poetæ, in Æsone Jasonis patre tentasse Medeam, quæ, quum venefica esset insignis, stricto recludit.

*Ense senis jugulam, veteremque exire cruorem*

*Passa, replet succis: quos postquam combi-*  
*bit Æson,*

*Aut ore acceptos, aut vulnere, barba, comæque*

*Canitie posita nigrum rapuere colorem*

*Pulsa fugit macies, abeunt pallorque, situsque*

*Adjecto quæ cavæ supplentur corpore rugæ;*

*Membreque luxuriant: Eton miratur, & olim  
Ante quatuor denos nunc se reminiscitur annos,  
Dissimilemque animum subiit, etate relicta.*

Inde forsitan in spem vanam deducti nonnulli medicorum sanguinis transfusionem excogitarunt, inter quos primas habent Dionysius, & Loverius; qui plurima pericula in brutis tentarunt, quæ quum fauste cessissent, in hominibus etiam experiri ausi sunt. Tota Europa magno cum plausu excogitatum excepit, sed præsertim Gallia, adeo ut regalis Academia scientiarum, severioris iudicii schola, specie veri decepta, non solum ad multa mala persananda, sed etiam ad *neoterismum*, hominis videlicet renovationem, sanguinis transfusionem multum conferre posse, æthoritate sua sanciverit. Inde, credula nimis, multa experimenta tentavit; sed alia inutili, alia nefasto eventu cessere; hominem quoque perpetua amentia laborantem, ad mentis integritatem hujusmodi auxilii ope redigere aggressa est, qui, quum per plures dies inutiliter vexatus fuisset, licet in omnibus ut primum insaniret, in hoc solum sapere videbatur, quod *Martirem regie academice scientiarum* se diceret. Postquam incauti, & curiosi medici humanum corium dilacerando nonnullos lætho dedere, audax, cruentumque tentamen regio decreto damnatum fuit, quod primo in derisionem abiit, & modo ex

hominum memoria pene evanuit .

Non dissimili plausu nostra hac ætate excipiebatur gas illud chemicorum , seu inflammabilis aer , cujus ope audax Japeti genus aereum iter tentavit, plurimique visi sunt vias ætheris facili volatu percurrere .

*Quos aliquis tremula dum captat arundine pisces,  
Aut pastor baculo , stivaque innixus arator  
Vidit, & obstupuit: quique æthera carpere possent  
Credidit esse Deos .*

Sed non contenti homines volatu audaci gaudere , cælumque stultitia petere , diuturnioris etatis , immo ipsius immortalitatis cupidine tacti , cogitarunt quoque humanam novare naturam , & quæ jam labescebat , in robustiorem ætatem redigere , aereque fixo ad hunc finem in auxilium vocato , varia pericula tentarunt , sed quum umbram pro Junone amplexi sint , eventu spes evanuit . Hæc , & similia excogita vana semper , & inutilia prehensa sunt ; Unctionum contra , balnearum , & frictionum usum ad decrepitam ætatem multos reduxisse , præter sapientium medicorum auctoritates , multæ rationes , nonnullaque experimenta ad evidentiam fere demonstrant , & primo : quantum conferat ad vitæ diuturnitatem *oleo inungi* præter jam laudati Verulamii sententiam , quæ maxima est in medicina , exemplo Democriti



confirmatur, qui interrogatus ab amicis, quum jam nonum supra centesimum annum ageret, quo vitæ genere ad tantam diuturnitatem pervenisset, *intus melle, & foras Oleo*, respondisse, memoriæ proditum est. Idem Pollio Romulus, ut Plinius narrat, responsum dedit Imperatori Augusto roganti, quamam ratione jam centenarius tantum animi, & corporis vigorem conservaret. Olei profecto inunctio mirabili sua virtute tensa remittit, dura emollit, nimisque rigida humanæ machinæ filamenta laxat, & mulcet. Nihil inde mirum, si Oleum disponat corpus ad vitæ diuturnitatem; impedit enim fibras duriores fieri, aut exsiccari, coque senectutem necessario retardat, quæ sapientium iudicio in universali siccitate, & rigiditate solidorum maxima ex parte consistit.

Melli quoque singularem virtutem adesse ad producendam vitam, testis est Atheneus qui, Cynos Corficæ accolæ ideo esse longævos asserit, quoniam mellis cibo utuntur assidue, neque id mirum videbitur, quoties mellis virtutes dignoscantur. *Quid enim est mel? Nisi plantarum* (quemadmodum apud præclarum de Haen legimus) *mitissimus succus, sapo mollis acescens, omnis putredinis debellator, concretum biliosum, inflammatorium, viscosum solvens, nemini, nisi debilius acido laborantibus insensum*. Hoc alimentum olim, teste Pli-



Plinio , in delitiis hominibus fuit, ut valetudinem conservarent , & diuturnitatem vitæ consequerentur , dignumque esset, ut in delitiis hac nostra quoque ætate haberetur; sed jam fere penitus obsolevit. Balneum quoque, quod est alterum ex Verulamio ad Senectutem præsidium , in desuetudinem abiit: quod olim apud Antiquos tum Græcos , tum Romanos , luxuriæ præsertim causa magno in usu fuit: Eoque libentius utebantur , ut corpus videlicet abluendo , morborum causas repellerent .

Apud Romanos eo balnearum processit usus , ut jam abusus videretur . Agrippa in Ædilitate sua centum septuaginta extruxit: Plinius scripsit suo tempore fuisse sine numero . Cassiodorus affirmat , mirabili magnitudine esse constructa ; & Ammianus in modum Provinciarum ædificata . Mille, & sexaginta Cellas ex marmore factas Diocletiani balneum continebat; Neque tot , peneque infinita lavacra Romanæ luxuriæ satis fuerunt . Inde in privatis quoque domibus struebantur : & ita magnifice , quemadmodum Seneca ait , *ut pauper sibi videretur , & sordidus , nisi parietes magnis , & pretiosis orbibus præfulserint ; nisi Alexandrina marmora Numidicis crustis distincta sint : nisi vitro asconderentur camerae . . . Nisi aquam argentea Episthomia funderent ,* , Nostra vero ætate balneo-

rum usus pene defuevit ; ferèque nullus est , qui absque medicorum consilio , strictiorique præcepto accitus ad lavacrum accedat , sed ubi lavari possit , sæpè nescit : lavacra enim nostra ætate aut nulla sunt , aut rarissima : utinam *dies , & labor mutabilis Ævi referat in melius* .

Balneum opportunè adhibitum multa ab aliis remedijs minime speranda , aut petenda producit ; corpus enim sordidum detergit , siccum humectat , calidum refrigerat , rigidum emollit : deinde fluidorum acrimoniam corrigit , vitia emendat , artuum lassitudines tollit , dolores mitigat , vigiliis laborantibus dulce somnum conciliat . Quæ , quum ità sint , jure deduci debet , summum , præstantissimumque auxilium inde capi ad vitæ diuturnitatem . Hujus rei non ignari primi medicinæ parentes , se abluendi usum magni semper habuerunt . *Quorum præsertim balneum* , ait Baglivius , *pro retardanda senectute adhibitum , incredibile est , quantum mihi arrideat* . Sed sapienti pauca . Quemadmodum singularem balnei virtutem , ità quoque præstantissimæ *friktionum* vires ad producendam vitæ diuturnitatem non ignorarunt ipsi medicinæ Parentes . Præter Hippocratem , Democritum , & Asclepiadem , qui verè Patres medicinæ habentur , Aretaus Capadociæ medicus omni laudis commendatione major , & latinissimus Celsus

sus mirum in modum eas commendat. Tandem Galenus, qui ætatum omnium medicos hac in re facile superavit, de frictionum usu, & viribus integrum librum conscripfit, & cui sexui, cui ætati, cui temperamento, qualis, & quanta conveniat, accurate edocuit. Præsidium ipse præstantissimum esse ad vitam producendam inde maxime deduxit, quod frictio opportune adhibita fluiditatem liquidis, & firmis partibus robur tribuat, calorem foveat, spiritus recreet, vires restituat, corpora nutriat, eaque ad faciliorem insensibilem perspirationem disponat. *Senectus autem*, ut Sanctorius sapienter animadverit, *diù duci potest, si corpus reddatur perspirabile.*

His præstantissimis præsidiis, quæ breviori, & clariori modo adumbrare conatus sum, adijcere coronidis loco non alienum putavi notitiam arbusci americani mirto persimilis, fructu rasemaceo, quod in Peruviana regione præsertim vivit, & vulgo *Coca dicitur.*, quam, ut ait illustris Acosta hispaniarum Plinius jure merito appellatus, *Indi propter admirandas virtutes maximi extimant.* Folia hujus arbusci, vel decoquendo instar The, vel masticando, & salivam deglutiendo, si in usum familiarem adhibeantur, mira certe producent, roborant enim stomachum, sitim, & famem sedant, morbos depellunt, ætatemque longe producant,

„ *Et si quispiam*, ait laudatus Acosta, *unum saltem manipulum gustarit, eo die certè duplum iter conficere poterit*, Tot, tantaque beneficia Indifere omnes experiuntur, sed presertim Guagiri, qui in regno *Santa Fede* degunt, & qui in Peruvio improbo labore metalla effodiunt. Utinam in Europa aliquando tandem adeo salubris, fereque mirabilis arbuti usus admitteretur, quod, ut maxime optandum, ita non prorsus diffidendum existimo. Clarissimus quoque vir D. Antonius Julian in libro, quem nuper edidit, cui titulus „ *La perla de la America proveniente de Santa Marta* „ ejusdem opinionis esse videtur; ait enim laudatus auctor. *Puede ser que a la Coca, como a las demas cosas llegue su tiempo; y con las noticias, que voi a dar de sus admirables virtudes, y efectos, se introdusga la moda no vana, no inutil, no perniciofa a las casas, y personas, como otras que vienen de allende, sino moda sana, utilissima. provechosissima a la salud, y fuerza del cuerpo, y larga conservacion del individuo*. „ Si quis forsitam uberio rem notitiam de Coca, ejusque virtutibus desiderat, auctoris librum pervolvat; nos jam modo ad tertium disquisitionis caput accedamus.

# DE CONSERVANDA SENECTUTE PARS TERTIA

*Quæ præsidia in medicina sint , quorum constanti  
usu senes possint diù & sane , quantum  
humana conditio ferre potest ,  
valetudinem conservare.*

**N**aturalis hominis ætas, ultra quam pro-  
gredi mortalibus raro licet, non æquo pe-  
de decurrit, neque uno spatio concluditur, sed  
modo crescit, modo consistit, tandem decrescit;  
& perit, aliaque ætas ex alia oriri videtur. Homo  
inde non per saltum, sed gradatim, sensimque  
sine sensu ab ortu ad interitum tendit. In primo  
vitæ curriculo, quod ad quintum, & vigesimum  
annum natura producit, semper aliquid roboris  
corpori, ipsique animo accedit. Ab hoc anno us-  
que ad quinquagesimum homo consistit, floret, &  
viget: hinc jam Senectus incipit, quæ circa sexa-  
gesimum ut plurimum maturescit. Deinceps per  
singulos dies aliquid homo deperdit, donec pau-  
la-



latim toto se corpore exsolvat, extremamque diem obeat. Ex ore enim dentes sensim delabuntur, ex capite crines decidunt, aut mœssa canities mentum, & caput inficit: manus, & pedes tremunt, labra, & lingua balbutiunt, obstupefcit auditus, oculi involuntariè lacrimantur, humor e naribus guttatim stillat, genæ flaccidæ pendent, articulationes prominent, facies defædatur rugis; & ad terram corpus, a qua genitum est, tanquam ad eam brevi rediturum, incurvatur. Inde illa querela Barsilai, quum a Davide ad regiam mensam invitaretur,, *Inspice senum oculos, attende ad auditus organa, vide quàm omnia debilia sunt*,, In adeo dissimili, tamque planè vario humanæ vitæ spatio anni, diesque mortalium diversa nomina sortiuntur. Modo enim *clymaterici* dicuntur: ( ut apud Codronchium legimus, qui de annis, diebusque clymatericis commentarium evulgavit ) modo *scalares* appellantur, *natalitij*, *fatales*, & *decretorij*: sed inter omnes sexagesimus tertius *androdas* græca voce, latinà vero *heroicus*, seu *maximus* nuncupatur: quoniam observarunt antiqui, nescio, an superstitiosius, an verius, homines, quum ad hujusmodi ætatis annum venerint, aut interitum, aut nefastum eventum, qui omnem substantiam vitæ frangat, & debilitet, incidere. Hujus observationis manifestum, & satis antiquum testimonium est

est epistola illa , quam Augustus Imperator ad Cajum nepotem suum scripsit , quamque perlegere alicui forte non displicebit .

IX. Kal. Octob.

„ Ave , mi Cai , meus ocellus jucundissimus , quem semper medius fidius desidero , cum a me abes sed præcipuè diebus talibus , qualis est hodiernus , oculi mei requirunt meum Cajum , quem ubicumque hoc die fuisti , spero letum , & bene valentem celebrasse quartum , & sexagesimum natalem meum .

Nam , ut vides , clymatericum communem seniorum omnium tertium , & sexagesimum annum evasimus . Deos autem oro , ut mihi quantum cumque superest temporis , id salvis nobis , traducere liceat in statu reip. felicissimo ,,

Emenso ergo floridæ ætatis curriculo , quum jam homo ad sexagesimum annum propè accedat , ( in quo , qui vivit , Salomonis oraculo jam senex dicitur ) ut vigorem corporis conservare , annorumque supervenientium incommoda , quæ non a sole , orbeque stellato , neque a septenario numero , quem ad modum multi somniati sunt , sed a comuni , constantique naturæ lege proficiscuntur , aut omninò vitare , aut saltem imminuere valeat , multa observare debet , quæ modo singillatim ostendere operæ præmium erit . Si verò longior aliquanto videatur oratio , hæc cum amplitudine rei comparan-



randa est, ita enim nedum brevior, sed æquo fortasse angustior videbitur. Igitur, ut ea vivendi ratio institui possit, quæ valeat sanam, & jucundam senectutem facere, ante omnia oportet, ut vir prudentia præditus, quum prope esse senectutem, aut jam imminere videat, negotiis sedulò renuntiet, ijsque maximè quæ in foro, aut militia geruntur, ne velut Equus, quem jam senium confecit,

*Peccet ad extremum ridendus, & ilia ducat.*

Favore itaque grandiori ætati concessa a legibus senex utatur, adeoque receptui canens intra domesticos lares se recipiat, & sibi, suæque valetudini consulens, quantum illi superest vitæ, tranquillissime agat. Sed fortè rogabit quisquam; quomodo senex, qui in magna celebritate, atque in oculis civium quondam vixit, nunc vivet abditus, & in solitudinem domus receptus? Ita roganti senex Martialis verbis respondeat,,

*Tota die quid agam? Respondeo pauca rogatus.*

*Luce Deos oro: famulos post arva reviso:*

*Partibus atque meis justos indico labores:*

*Inde lego, Phæbumque scio, musamque laceffo*

*Hinc oleo corpus frico, mollique palestra*

*Stringo libens animo, gaudens, ac fanore liber*

*Pondro, poto, cano, ludo, lavo, cæno, quiesco.*

Vide quàm solerter Martialis jucundis, brevibus-

busque præceptis rectè vivendi rationem instituat. Senes ergo, præsertim jam extrema ætate positi licet a publicis rebus omninò recedant, non ideo inertī otio marcescant, sed intra proprios lares, domesticosque parietes, si non reip. conservatio- ni, saltem custodiæ suæ diligentius dent operam. Quemadmodum enim in adolescentia, viridique senectute patriæ, propinquis, & amicis, ità in deteriori ætate, extremoque scenæ actu, unus- quisque sibi maximè debetur. Quæ quum ità sint, quid per singulos dies senibus agere expediat, Martialis inhærens doctrinæ, præceptisque jucun- dissimis jam modò exponam: & rebus ordo ut lu- men afferat, a prima luce dicere ineipiam, grada- tim inde per singulas diei partes dicturus.

Ubi primum senes suscitentur de somno, prin- ceptis cura sit preces devotè fundere, & gratias age- re divinæ pietati, quod eò ætatis pervenerint, quo paucis pervenire, rarò Supremus rerum Mo- derator elargitur, quum longa, & sanà valetudo non exiguum divinæ providentiæ munus esse col- sueverit.

Si dies serena, & temperata sit, tuto surgant ad auram leniorem captandam, & sanguinis æstum sufflaminandum: Si verò frigida, humida, aut agitata ventis, lecto conquiescant: neque tutò sur- gere licebit, nisi propior sit meridies, quàm auro-

ra; ita dies longa præsentia solis quodammodo tepescita debile senum corpus minus offendit.

Sed priusquam e lecto surgant, vestesque induant, caput primò, & collum, deinceps pectus, dorsum, & ventrem, mox brachia crura, & tibiae perfricandi curam habebunt: ita enim crassa attenuantur, impacta resolvuntur, firmanentur solida moventur fluida, superfluaque per cutis spiracula facilius eliminantur, unde, fanitas, & vitæ productio facile subsequitur:

Corporis vires longiori noctis spatio aliquantulum labefactatas jam modò refocillare curabunt, quod obtineri potest, si jus ex parva pulla, aut ex vituli lactantis carne, recentis ovi vitello permixto sumperint, aut si caffè potum ex lacte caprino, vel vaccino sorbillaverint, potionemve illam jucundissimam æque, ac salutarem, quæ vulgo *Chocolatz* dicitur, quæque non sine causâ creditur, *Angelici vicaria roris*.

Non corpori tantum subvenire, sed animo quoque senibus cura sit; quoniam animus etiam, ut Cicero loquitur, *Nisi tanquam lumini oleum infilles, extinguatur senectute*, ut ergo corpus cibo, ita & animum lectione nutriri, & refici necesse est.

Matutina corporis exercitatio sensibus æquè ac matutina refectio, necessaria existimatur, præsertim

tim diebus serenis, & ventis silentibus: ignavia enim, ut maturat senectutem, ita quotidiana corporis exercitatio eam retardat, & producit.

Varia sunt exercitationum genera, quæ jam diu in usu esse consueverunt; ex quibus eam, quæ in curru, aut octophoro fieri solet, omnium jucundissimam esse censeo; deambulationem vero inter omnes saluberrimam, quæ super cætera alia exercitationum genera, id præcipue habet laude, & commendatione dignum, quod æque pueris, quam adolescentibus, æque viris, ac Senibus utilis est, & omnibus æque facilis, ac necessaria. Martialis inde adscribendum insanix putavit, si quis sanus, & validus alienis pedibus deambulare per Urbem: quapropter Philippum quendam sic insectabatur

*Octophoro Sanus portatur, Avite, Philippus:*

*Hunc tu si sanum credis, Avite, furis.*

Sed in exercitationibus corporis, quemadmodum in quibuscumque aliis rebus, quæ ad vitæ regimen spectant, habenda semper consuetudinis ratio est, semperque longo usui aliquid tribuendum. Quoniam assueta exercitia delectant animum, atque delectatione corpus excitant: Inusitata fiunt sine voluptate, & corpori cum languore officiunt.

Verum id incommodi secum senectus afferre solet, ut animadvertit Gerardus Mead. *Quod corpori exercendo vires vix sufficiant, cum tamen sa-*

*nitas id maxime requirat.* Proinde frictiones Vir doctissimus proponit, quæ exercitationis vicem gerant: Easque vel propriis manibus, vel operæ servorum quotidie fieri suadet; si vero verriculis ex fetis caprillis confectis perficiantur, majus auxilium ex iis habebitur, quemadmodum multiplici experientia probatum fuit, præsertim in ijs, qui fibra latiori præditi sunt, & ad obæsitatem facile tendunt.

Quoties vero vires permittant, deambulatio pluris facienda est, adeoque quibuscumque aliis exercitationibus præferenda. Huic exercitii generi, cum prima laus sit, firmare corpus, & spiritum recreare, hanc etiam sæpe utilitatem affert, quod appetitum moveat; qui bonum ad prandium condimenti genus est. Mensæ ergo post gratam deambulationem senes accumbant, quæ si simplex, ac parca sit, illis salubris erit. *Multa fercula multa mala faciunt*, inquit Seneca, & merito;

. . . . . *Nam si simul assis*

*Miscueris elixa, simul conchilia turdis*

*Dulcia se in bilem vertent, stomachoque tumultum* *Lenta feret pituita:*

Inter varies, multiplicesque cibos, quos abundè provida Natura offert, nonnulli prorsus alieni, multi vero sunt stomacho senum amici. Ex



illis primum locum panis habet, qui ex tritico, albaque ejus siligine conficiatur, quique fistulosus sit, pondere levis, & bene fermentatus. Reliqua Cereris dona, ex quibus Panis fieri solet, non satis innoxia sunt. Proximum pani locum carnes obtinent, præsertim Gallinæ Capi Galli Galinacci & lactentis Vituli. Turturum insuper, Pipionum, Turdorum, Alaudarum: & similium passerulorum carnes, & gratæ senibus sunt, & minime noxiæ. Pisces quoque præsertim, quos in Mari, & inter saxa piscari detur, boni succi sunt, & laudem omnem merentur: qui vero in paludibus, stagnis, fluminibusque limosis reptant, palato grati esse solent, sed stomacho alieni. Ova ex Gallinis nuper edita, si tremula forbilentur, tum carnibus, tum Piscibus, cujuscunque generis sint, a senibus præferri debent, quoniam alimento, & substantia laudatiori prædita sunt, & quia facilius a debiliore senum stomacho percoquuntur.

Legumina vel nullam, vel perexiguam habent utilitatem, quoniam fere omnia ægre concoquuntur, & succum non bonum generant: flatus insuper in ventriculo facile movent. Nihilominus quidam cicera laudant, nonnulli lenticulas; sed fere omnes phasellos, & fabas furiis devovent: ipseque

Pythagoras, qui aliunde victum herbarum, & le-

guminum commendabat , abstineri a fabis , discipulis acriter imperabat : *Quod habet* , ut ait Tullius , *inflationem magnam is cibis* .

Olera leguminibus salubriora sunt , nam lactuca , & cicoria sanguinis calorem temperant , & acrimoniam emendant , spinacia & beta alvum emolliunt , & absque pharmaco ope , quod in decrepita ætate non parvi faciendum est , ad secessum adigunt : Tandem Asparagi , Lupoli , Rapæ , omnesque Raphanî urinæ vias referant , itaque superfluum serum eliminant , quod in hac ætate maxime desideratur : ideoque hujusmodi cibi merentur , ut in delitiis , familiarique usu a senibus habeantur .

Fructus deinceps commendationem quoque promerentur , præsertim , quos *horæos* Medici appellant , veluti cerasæ , fraga , pira , ficus pingues , & uvæ dulciores , dummodo iisdem senes parcantur ; Copia enim comesti quandoque lædunt , quoniam aciditatem , flatum , doloresque in stomacho imbecilli facile movent . Sed inter tot , adeoque varia alimentorum genera , nullum simile *lacti* inveniri posse , putamus , quod nullum sit magis senectuti amicum . De hoc jam Aretæus scripsit : *Sumptu esse suave , potu facillimum , nutritu solidum , & qualibet esca pueris familiaris visu colore delectabile , medicamentum arteriam non asperans , guttur levigans , dulceque senectutis præ-*



*presidium*. Utinam ergo senes lacte hieme, utinam æstate uterentur! Ita certe vitam dulcius, & diutius ducerent.

Nos ad cætera illud adjicimus, quod nullum in ampla rerum natura alimenti genus sit, quod pari efficacia senilia corpora reficiat: Nullum, quod adeo facile in substantiam edentis immutetur, nam chylus est subtilissimus, primo in chilo-pejis, mox in lactiferis mammarum ductibus elaboratus. Inde jure merito Vepferus in epistola ad Versascam affirmat, se multos vidisse solo usu lactis, tanquam novos homines factos fuisse. Et Zerbius medicus veronensis in sua Gerontocomia testatur. quod *Seniorum aliqui lactis usu continuo innoxii, & cum utilitate maxima in longos annos processerint, adeoque longius centum annis vixere*. Quod rationi non minus, quam auctoritatibus consentaneum videtur. Quid enim rationi magis congruum est, quam quod id alimenti genus, quod a primo ortu homini vitam dedit, eum ab interitu defendat? Et quod prima extruxit nascentis flamina, eadem senescentis corporis, & jam defecturi præ debilitate rursus nutriat, & reficiat?

Jam vero, licet omnes fere Medici tum veteres, tum recentiores pro reficiendis senibus lactis efficaciam minime renuent, non tamen in quali-

tate, modo & quantitate ejus propinandi conveniunt: Multique multa de hac re subtilius excogitarunt; quibus prætermiſſis, ne parum utilibus disputationibus tempus teramus, eam ſententiam nobis placet amplecti, quæ primo lac muliebre, deinde aſininum, deinceps caprinum, tandem vaccinum ſenibus convenire declarat: eaque quantitate, & præparationis modo, qui eorum corpus reficiat, non oneret, ventrem emolliat, non ſolvat.

Non minori cura, & diligentia ſenibus habenda eſt circa ciborum menſuram, & quantitatem, quam circa eorum delectum & qualitatem. Et quoniam hætenus de iſta, jam modo de illa quidquam animadvertendum videtur, ut ita non minus ex cibi delectu, quam debita quantitate maxima utilitas perſentiat. Ea cibi quantitas ſenibus ſatis videtur, quæ vitam ſubſtentet, non obruat. Idcirco ille modus in victu ſerbandus erit, ut cibus neque ſuperſit, neque deficiat; qui ſuper eſt, calorem naturalem opprimit, qui deficit, extinguit, viresque imbecilliores reddit; *imbecillitas autem, ut Celsus monet, multis malis obnoxia eſt.*

Parciori itaque victu ſenes utantur, ſed frequentiori; terque potius in die, quam ſemel cibum capiant, quoniam, ut Galenus animadvertit *Tale quid patiuntur quale lucernis pene, extinctis accidit*

*dit, quæ frequenter exigunt Olei suffectionem, multam autem, & cumulatam nequeunt substinere. Deinceps quemadmodum in puerili ætate gradatim alimenta augere oportet, quoniam in dies crescit naturalis calor, & robur stomachi augetur, ita in senectute minuere opus erit, quoniam languidior fit in dies vitalis ignis, & robur stomachi infringitur.*

Præter satietatem, ab aliis etiam senes cavere oportet, & primo a calefacientibus omnibus, & spiritosis, sive cibis, sive potibus, quoniam ex siccatis corporibus nihil æque damnosum, quam cibi, & potus, qui interiora fervefaciant. Deinde condimenta omnia, fassamenta, & quæcumque alia gulæ irritamenta vitare quoque expedit, quoniam propter dulcedinem plus illi accipiunt, quam par est; & quod multo pejus est, assumpta difficilias conquoquunt. Idcirco cum Socrate apud Plutarchum (de tuenda valetudine) existimamus, quod senibus cavendi cibi, *qui non esurientes denuo ad edendum invitant; & cavendi sunt potus, qui non sitientes denuo ad bibendum illestant.*

Minor diligentia in potibus, quam in cibis adhibenda est. *Si quæ enim intemperantia, ait Celsus, tutior est in potu, quam in esca: præsertim si aqua simplici, & probatæ qualitatis familia-*

riter senes utantur ; quæ certe vino præferri debet ; tum quia præstat optima lympa mero ; ut sententia Medicorum est : tum etiam quia sola purissima aqua virtutem habet , eam agilitatem , & mobilitatem corporibus communicandi , quæ in fibrarum interstitia effunditur . *Quæque dum durat* inquit Hallerus , *senilis mortis causas removet* . Potus idcirco familiaris senibus aqua sit , aut saltem vinum multa aqua dilutum . Aliquando vero generosi , veterisque vini haustulum degustare minime alienum esse credimus ; vinum enim donum D. providentiæ adversus senectutis durtiem esse , cum Platonis sententia experientia convenit , & re quidem vera , si modice bibatur , præsertim vetus , & generosum , roborat stomachum , calorem excitat , animi ægritudines lenit , & ita quodammodo reviviscit senectus ; Si vero largius , mens insanit , stomachus languet , ipseque naturalis calor extinguatur , non secus , ac flamma extingui solet , si oleum nimie lampadi effundatur .

Ne vero senes vini suavi lenocinio alleciti plusquam par est , bibant , mensuramque sanitatis excedant , opus erit , ut illud Strabonis seria cogitatione perpendant , fixumque memoria habeant , quod *primum poculum sanitatis est , alterum voluptatis , tertium contumeliæ , quartum insanix* .

Ita

Ita porro sperandum est , ut pōcula nōn exauriant , sed modice degustent : neque ea adhibeant veluti Torquatus coram Tiberio , qui tres congiosuno haustu ebibit , unde *Tricongij* nomen sortitus est , sed velut in simposio Xenophontis , minuta scilicet , atque rorantia , & quibus in senectute sua delectabatur Cato , quemadmodum apud Ciceronem legimus . Sed satis jam de cibo , & potu , ne ad nauseam usque parcimoniam extolamus : modo alia præcepta de tuenda senectute tradamus .

A prandio somno indulgere aliquid senes debent , qui licet testimonio Plauti , aliorumque Medicorum sententia , non bonus hominibus sit , tamen cum nihil suavius senibus accidat , non ideo omnino interdicens est , præsertim si consuetudo accedat , cui plurimum semper tribuendum . Id solum , ut brevis sit omni studio , ac diligentia curandum . Si enim observata merentur fidem id multiplici experimento compertum est , quod meridianus somnus , si brevior hora sit , senile corpus roborat , animumque excitat ; Si vero longior corpus hebetat , animique vires exolvit .

Illud etiam prætermittendum non est , quod molestias , quas meridianus somnus aliquando facit , torporem scilicet , & pigritiam , quamdamque ad dormiendum proclivitatem *Cassè* potus in



cantamenti instar discutiat . Quod idem præstare videntur decocta ex *cinnamomo* , ex *Thè* , ex *Cammille* floribus , aut cortice *citri* parata , quæ albissimo saccharo ad gratiam dulcescant , & dum calent, forbillentur .

Excitati a somno humanarum , aut divinarum rerum lectioni aliquid tribuant . Cum enim senectus sine operosa actione , ut plurimum sit , si etiam sine lectione foret , aut contemplatione , non vita porro jam esset , sed quemadmodum Seneca inquit , *vivi hominis sepultura* .

Flexo jam ad vesperem die , senes ad deambulandum redeant ; quod in agro potius , quam in vrbe ; in vrbe potius , quam domi salubrior erit . Si vero fieri possit , per viridaria spatium , præstantius erit . Ita enim suavisflorum , & herbarum halitu , gratoque illarum adspectu languentes propemodum senum spiritus suo modo foventur , & recreantur . Possunt quoque senes agris oblectari ; eorumque cultione animi tedium , aliasque senectutis molestias fallere . *Agro bene culto* , ait Cicero , *nihil potest esse , nec usu uberius , nec specie ornatus , ad quem fruendum non modo non retardat , verum etiam invitat , atque allicit* senectus . Ubi enim potest illa ætas aut calefcere vel apricatione melius , vel igne ? Aut vicissim umbris aquisve refrigerari salubrius ?



Prope solis occasum domum se conferant, ut ferotinum frigus, quod in ea ætate gravedines, distillationesque concitat, facile effugiant: quas quoque devitare poterunt, si palio bene operiantur, caputque, præter galerum, ascitio capillamento exornent; Quoniam multiplici experientia comperitum est, id ornamenti genus satis commodum, & salutare fuisse hominibus, iis præsertim, quibus ob ætatis injuriam, aliamve causam caput sit crinibus denudatum. Ita enim hibernum frigus, temporum vices, aerisque inclementiam minori incommodo sustinent.

Jam modo cum nox accesserit, ne tristitia senes laborent, aut perlongo noctis spatio sibi ipsis tædio sint, danda illis opera, ut dulci inter æquales colloquio, aut suavi Musicæ concentu, gratove ludi genere recreentur: quo pacto sperare licet, ut noctis molestias & tædium aliquantulum fallant. Neque grato ludi genere animum aliquando laxare, indecorum senibus videri debet; Nam Socrates jam senex dèprehenso ab Alcibiade ludens cum pueris non erubuit: Et primus fabularum magister Attico deridenti illum, quod puerorum in turba nucibus ludentem vidisset, inquit

*Lito rumpes arcum, semper si tensum habueris;  
At si laxaris, cum coles, erit utilis.*

*Sic.*

*Sic lusus animo debent aliquando dari,  
Ad cogitandum melior, ut redeat tibi.*

Tandem ad cœnam ventum est, quæ utique ; quo parcius , eo salubrior erit , adeoque morem Lacedæmoniorum senes imitentur , qui cœnaturi panî nihil addere soliti fuere præter nasturtium . Si vero mos ita cœnandi nimie rigidus videatur , aliquantoli- centius cœnæ indulgeant . Mensam idcirco fructi- bus bene maturis , piscibus , & oleribus coctis , ovis que sorbillibus , aut lacte tantum , & pane sibi pa- rare jubeant .

Vt cœnam sumperint , parumque intra dome- sticos parietes deambulatione se exercuerint , lecto se committant ; & remota omni animi cura , & quacumque molesta cogitatione , totis noctibus conquiescant . Neque ad primum galli cantum , aut luciferi lumen ; sed postquam sol ab aurorâ ali- quantulum deflexerit , gravioreque nebulas ejus salutari influxu discusserit , e lecto surgant , ad consueta munera redituri .

Haëtenus de illa vivendi ratione verba feci ; quam per singulos dies senes amplecti debent ; sed cum aliam per singulas anni tempestates eos exequi oporteat , de hac quoque jam modo di- cam , & dicam brevius , quam res tanta postulare videatur . Et primo , si votis fortuna arrideat , maxi- ma cura , diligenti que studio senes ad habitandum  
eli-

eligant ea ædificia ; quæ in superiori , & salubriori civitatis parte constructa fuerint , ubi aer clarus , & ubique apertus sit : Ea vero fugiant , quæ vel ad flumen , vel ad Pomeria , vel circa muros , aut loca , ubi fæces , reliquæque immunditiæ tetrum odorem spirantes stabulantur , posita fuerint , quia inibi habitantes , etiamsi ætatem floridam agant , & robustissimi sint , facile ægrotant , & pereunt , eo quod impeditam habeant insensibilem per spirationem , & quod noxios , & beneficos vapores per cutem , respirationisque ductus facile absorbeant , unde multæ offensarum causæ oriuntur .

Conclavia insuper in prælaudatis domibus habitent perflatum æstivum , & hibernum solem habentia : ita enim beneficio loci adversus solis ardorem , frigidique aeris inclementiam tuti esse poterunt . Si vero , latrante cane , calor eos adurat , ad montana loca , arboribusve confita ascendant : ubi gratior aura , arboreaque umbra lenit , ut plurimum , solis ardorem . Cum vero bruma nimio frigore eos offendat , ad littora maris descendant , quæ , ut plurimum , tepent hieme : neque ab iis jucundissimis locis recedant , donec hirundines , quæ primæ sunt nuntiæ veris , ad nidos suos memores redeant .

Denique cibum , & potum sumpturi temperates anni quoque inspiciant . Æstate vinum dilu-

tius

tius bibere, hiemæ meracius, senibus convenit: æstate pariter oportet, oleribus uti, fructibusque horeis, & cibus iis, qui calorem temperent, corpusque refrigerent. Hieme vero carnibus, cibisque siccioribus, & iis omnibus, quæ urinam moveant, caloremque excitent. Quoniam æstivo tempore calor, & siccitas brumali; pituita, omnesque frigidi humores in senibus cumulate abundant.


Per Autumnum, & Ver minor cura in cibo, & potu senibus sit; in vestimentis verò major, adeoque sine veste, sine pallio, sine pileo, & sine calceamentis Jovi frigido minime se exponant. vespertinum quoque, & matutinum frigus effugiant; hoc enim tempus propter Cœli varietatem Corizæ, catarro aliisque morbis obnoxium est, quoniam ut vates verissime docet.

*Dummodo frigoribus premimur, modò solvimur æstu.*

*Aere non certo corpora langnor habet.*

Ex his, quæ de senectute tuenda in medium protuli, futurum spero, ut adeo salubri, jucunda, & tranquilla valetudine Senes fruantur, ut si eorum quisque interrogetur: Quo tandem esse vellet in vita? Cum Leontio Giorgia jam centenarius, quemadmodum Cato apud Ciceronem de senectute pronuntiavit, *nihil habeo quod in cu-*

*sem senectutem*, respondeat . Vidimus hætenus qua via, & quibus conservatricis Medicinæ præsidiiis, senum Vita incolumis servari, diuque produci possit, modo videbimus; quæ in mala senes frequentius incidant, unde ea oriantur, & quibus sanantis Medicinæ præsidiiis, aut penitus tolli, aut saltem leniri valeant; de quolibet postremo loco agam, præcipuus tamen est hujus operis labor .





# DE CONSERVANDA SENECTUTE PARS QUARTA

*Quæ mala in senes frequentius incidant : De eorum  
Origine : Et quibus Medicinæ auxiliis aut tol-  
lenda sint, aut lenienda.*

**N**ascitur homo, crescit, viget, decrescit,  
& perit. Infantia, Adolescentia, Virilitas,  
Senectus, & Mors alia ex alia nascitur, alteri-  
que altera obrepit. Singulis ætatibus sua est pro-  
pria sanitas, & sua sunt propria mala. Nec mi-  
rum videri debet, si pro varia ætatum ratione va-  
ria quoque mala homines sustineant; Cursus enim  
certus ætati a natura datus est; *et sua cuique  
ætatis parti*, ait Cicero, *tempestivitas est data*; si-  
cut ergo ætas ab ætate differt, ita in qualibet æta-  
te morbi suum quoque discrimen habent.

Quæ ergo mala frequentius Senes, quam Pue-  
ros, & Viros offendere consuescant, unde eorum  
origo, & quibus artis præfidiis aut penitus tolli,  
aut saltem leniri valeant, ut inceptum opus nu-



meris omnibus absolvam, jam modo ostendam. Sed antequam mala, eorumque medelas singillatim tradam, de eorundem causis saltem frequentioribus quædam breviter præfari, non alienum puto.

Supremus rerum Moderator ita humanum corpus componi, & conformari voluit, ut quo se reficiat, eodem tempore deteratur; ipsaque vita, quæ hominem vivificat, ipsum tandem ad exitum deducat; & quemadmodum natura, supremi Numinis lege, aliis quibuscumque rebus, sic vitæ hominum terminum fecit. Proinde partes, quas nutritio quotidie restituit, aut paulatim se ipsas deterunt, aut sensim sine sensu naturam immutant; Ex quo ligamenta, & cartilaginee, membranæque teneriores in ossium naturam tractu temporis converti videntur.

Quis inter Medicos est, qui sæpius aut aliorum observationibus non didicerit, aut propriis oculis non viderit, nonnullas in humano corpore partes, quæ, instar glutinis, mollissimæ esse solent in infantibus, quando adolefcit ætas, paulatim indurari, usque dum in senibus sæpe cartilaginum consistentem naturam, non raro ossium duritiem obtineant? Id olim vidit immortalis Harvejus quodam in paupere agrigola, nomine *Thomas Part*, in saluberrimo Salupienfi agro nato, qui ad annum usque centesimum, & trigesimum rusticis rebus

op<sup>er</sup>am dando vixit ; Sed tandem oculis captus post alios duos , & viginti annos ætate potius , quam morbo oppressus occubuit . Clarissimus anatomicus , corpus hujus senis suo cultro dissecuit ; & cum cætera sana reperisset , solum cerebrum firmissimum , & ad tactum solidissimum observavit . Adeo canaliculos cerebri , qui cæteroquin mollissimi esse solent , nedum in pueris , & adolescentibus , sed in viris quoque robustioribus , longa diæ , variusque labor induraverat .

Jacobus quoque Sehuczerus Medicus doctissimus , & in experiundo accuratissimus senis cujusdam nomine *Rhet* , qui jam novem , & centum annos expleverat , corpus suo cultro subjecit , dissectoque cadavere , lienis membranam exteriores maculis Variolarum pustulas referentibus , quæquæ cartilaginæ erant , obfessam , primo vidit : deinde sterni prominentias cum ipsis costis continuas , & plane osseas deprehendit . Mox valvulas semilunares præsertim arteriæ aortæ cartilagineas esse , invenit ; tandem cerebri membranas triplo fere solito crassiores , & pene osseas esse , observavit . Tantum juris habet in humanis corporibus longe vivendi conditio , tantaque secum recedentes anni referunt .

Cum ergo per inevitabiles vitæ actiones fibræ , seu prima humani corporis stamina , quæ in adolescenten-

lescentia mollia sunt , & laxa , ingravescente ætate paulatim exsucca fiant , & durissima ; exilissima vasa invicem concrecant , & obtrudantur , majora fere impervia appareant , ipsaque tandem liquida aut prorsus stagnent , aut lentius fluant ; fieri inde necesse est , ut prima ciborum coctio , atque digestio in stomaco debilitari , chylicatio in chylopejis vasibus perverti , sanguinis elaboratio in cordis thalamo minui , secretio humorum in glandulis vitiari , spirituum animalium limpidissimus succus in cerebro fœdari , eorumque fluxus , atque refluxus per organa vitæ minui , & præpediri , ac tandem amissi reparatio deficere incipiat . Unde .

..... *Circumsilit agmine facto .*

*Morborum omne genus .*

Cum igitur senilis ætas hæc vitia secum afferat . quæ a virorum , & adolescentium constitutione dissona sunt , longeque dissita , clare inde intelligitur , quæ mala senibus quodam veluti jure propria sint , quæ vero aliena ; nec non unde ea , tanquam ex fonte , originem hauriant .

Si quæ igitur genera morborum in senes incidunt , ut plurimum esse solent , respirandi difficultas , nervorum resolutio , aqua intercus , stomachi debilitas , cibi nausea , & vomitus , malus corporis habitus , virium defectio , corporis consum-

ptio, ejusdem aliquando nimia obesitas, cutis puritus, extremitatum refrigeratio, longa oculorum, & aurium vitia, nunc vigilia, nunc sopor, modo alvus soluta, modo stricta nimis, urinæ difficultas, ant urinæ involuntaria excretio, podagræ dolores, febres nonnullæ, præsertim intermittentes, & catharales, denique animi ægritudines molestissimæ, & inter cæteras maxime quæ Hypochondria, & quæ tristitia dicitur.

Hæc sunt, testimonio Hippocratis, qui in facienda medicina immortale nomen sibi conquæsit, præcipua senectutis mala. Non quod alia quoque malorum genera minime patiantur Senes; sed quia per hæc ægrotant frequentius, & pereunt. De his ergo, ut distinctis capitibus agam, instituti ratio postulat; Et quoniam ratione ætatis diversæ causæ sint perpendendæ, variaque symptomata insurgant, varias quoque curandi vias aperiam, ut quantum per salutarem artem fieri possit, infirmi senes ad sanitatem restituantur.

Rei difficultas qualis, & quanta sit, nemo est, vel parum in Medicina versatus, qui non penitus intelligat, cum doctis æque, ac indoctis notum sit, auxilia quot, quamque multa medica Disciplina suppeditet ad faciendam sanitatem, quando natura viget; quam vero pauca, cum ipsa languet, & deficit. Pueros itaque, adolescentulos, & vi-

ros Medicina facile servat, quia in iis natura firma est, & valida; Senes æque non servat, quia in istis infirma est, & imbecillis. Quibus breviter animadversis, jam a respirandi difficultate, quæ senibus interitum, incommodaque multa frequentius afferre videtur, promissi operis capiamus exordium.

## § I.

### *De respirandi difficultate:*

**A**ccipiendi, & reddendi spiritum angustia, respirandi difficultas dicitur; quæ, prout se intendit, varioque gradu invalescit; varium quoque nomen sortita est. Si enim modica sit *Disphonea*; si vehemens, *Asthma*; si vehementior, *Orthopnoea* græca voce appellatur.

Cum morbus iste a plurimis causis, admodumque variis ortum habeat, varias quoque curationes exigit, quas eo ordine subnectam, quod res ipsa postulabit, ut majus lumen dispositio afferat.

Constanti naturæ lege pectori munus incumbit, ut suo *dilatationis* motu Pulmonum dilatationi spatium impertiatur, & suo *compressionis*, eos placide comprimat. Sæpe autem evenit, præfer-

tim ætate provectioribus , ut hoc pectoris munus , vel a stricture *spasmodica* nervorum , vel a tenaci materie vesiculares pulmonum plexus infarciēte , vel ab aliquo in vitæ organis vitio , veluti aneurismate , aut aliqua polyposa concretione non raro interceptetur : Ex quo fit , ut respirationis negotium pari modo intercludatur .

Si a spasmodica nervorum stricture spirandi difficultas originem habet , eo maxime innotescit , quod sine viscosa materie , aut serosa colluvie vesiculares pulmonum plexus infarciēte , spiritum quo vita ducitur , ægre senex agat , & sæpe cum sibilo elidat , propter angustiores vias , per quas libere alias evadebat . Sensus tunc quoque , zonæ ad instar , abdomen , ipsumque thoracem valde constringentis , & urinæ frequens expulsio , velut aque purissimæ e rupe scaturientis , morbum comitantur .

Quæ , cum ita sint , æger protinus subveniens est , ne morbi vis invalescens , artis auxilia deludat . Statim ergo , ac fieri potest , sanguinem elici oportet , qui iterum eliciendus est , si vis morbi non remittat . Id autem animadversione dignum puto , quod in quibuscumque senum affectionibus , quoties sanguinis detractio præscribatur , an vires id ferant auxilii genus , diligenter perpendendum sit : Nam sæpe morbus sanguinem petit , debiliores vero vires recusant . Si vero vi



morbi ager in suffocationis sit discrimine, etiam si vires deficere videantur, sanguis tuto emittitur: Sæpe enim fit, ut post sanguinis detractionem vires insurgant.

Deinde caput in lecto, propeque erecta cervice ponere, multum admodum prodesse poterit. Ita enim spiritus facilius ab imo pectore redditur, nam sanguis, alijque humores minori copia, & impulsu ad cava pectoris deferentur: quod facilius eveniet, si tunc quoque pedes ad genua usque in aquam tepentem immergantur, & in ea diu, multumque detineantur.

Potiones subtepidæ ex floribus *Malvæ*, *Rheados*, *Altheæ*que radicibus paratæ tunc quoque identidem adhibendæ sunt, nam cutem, pulmonesque relaxando, fit quoque, ut vis morbi aliquantulum relaxetur.

Sæpius etiam juvat, blandis lotionibus alvum solvere, siquidem injectum in intestina receptum facit, ut superflua eliminata materie, morbus fiat levior. Idem adjumentum sperari licet, si nitrata, & frequenti potione adhibita urinæ viæ referatæ serum eliminent. Potus ergo copiosus, & frequens dandus est, præsertim ex sero caprino, qui alvum, & urinam leniter movendi miram virtutem habet.

Ubi per hæc auxilia vis morbi non declinet *Epi-  
spatica* cruribus applicare oportet, quæ malum,

aut tollent, aut lenient: habent enim hujusmodi auxilia singularem virtutem spasmos consopiendo, & dum cruciant, ulceraque movent in cruribus, a pulmonibus, quibus arx vitæ sedet, effrenes spiritus, eorumque violentiores motus ad partes inferiores revocant, magnumque levamen afferunt.

Si vero quæ hæctenus proposui, vel in cassum adhibita sint, vel parum proficiant, ad *Laudanum*, tanquam ad sacram anchoram, confugiendum puto. Quippe multa experientia compertum est, hoc remedij genus in convulsivis pectoris affectionibus, miraculi adinstar, opem, levamenque conferre: Non nullosque ipse vidi jam sine spe in extremis labo- ntes, sola opii virtute convaluisse.

Præter spasmodicam affectionem, spirandi difficultatis in causa quoque esse solet viscida humorum colluvies, quæ pulmonum vesiculares plexus undequaque infarciendo eunti, & redeunti aeri liberum iter denegat.

Catharri copia, viscidæque ejus natura, compages pulmonum jam debilior in senibus, necnon assiduus a tussis labor morbum longum faciunt, & periculo plenum. Ideo inter senes, qui asmathe humido diu laborare consueverunt, non paucos invenies, qui eo tandem suffocati pereant.

Medici munus est malo opportune subvenire; Præcipua autem præsidia in tenui victu, & in co-  
pioso

pioso mellito, subtepido, & aromatico potu: in blanda corporis exercitatione, aut frequentiori frictione facile inveniri possunt; Quoniam in his incidendi, attenuandique viscidos, & lentefcentes humores maximam virtutem esse, jam multiplex experientia edocuit. Neque hæc tantum remedia salubritatem faciunt: Infusum quoque hyssopi, hæderæ terrestris, aut salviæ montanæ, si ex melle Hispanico subealidum bibatur, adjumento erit præstantissimo. Quoniam ejus ope impacta materies meabilior facta sensim sine sensu expurgari incipit, ex quo solet æger spiritum trahere, et reddere commodius.

Alia quoque remedia sunt adversus hujusmodi vitium, de quibus fufius dicam, quum de catharris curatione paulo inferius agam. Modo vero de respirandi difficultate, quæ principium ducit ab aliquo vitio, quod in magnis arteriosis vasibus, vel circa ipsum cordis thalamum suam sedem habeat aliqua proferam.

Id vitij genus jam tunc existere, clarè innotescit; quum nec alta voce loqui, nec per ardua deambulare, gradusque ascendere, necdum lecto supini recumbere senes valeant, quin non ingentem cordis succutionem, gravemque in respirando difficultatem patiantur: suffocationis sensus ferè assiduus, inordinatus arteriarum motus, earumque con-

que constans , vehementiorque pulsatio morbum facilius detegit .

Hujusmodi vitium vel præstantissimis artis auxilijs vix leniri potest , tolli penitus non potest . Si enim aliqua *polyposa* còcretio morbi causa est , hæc ut plurimum ad funera usque senes comitatur . Si verò sit aquosus humor in thoracem effusus , quum vix fieri possit , ut reabsorbeatur , tandem ad exitium deducit : si verò denique Aneurisma in causam morbi venerit , non rarò inopinatò , disrupto , scilicet , arterioso vase , strangulat , senesque opprimit .

Quæ quum ità sint , medici munus erit , ut si minus ægros integræ valetudini restituat , saltem interitum retardet , morbumque , si non sanat , saltem leniat , quod a nullis medicinæ auxilijs etiam valentioribus , sed a sola rectè vivendi ratione sperari jure potest .

Qua propter victus sit tenuis , simplex , eaque materie , quæ facile in substantiam edentis immutari possit ; aqua pro potu sit : vinum enim omninò interdicare oportet , et quæcumque spiritosa sint , quoniam hæc exagitandi sanguinem vim habent .

Cæna prandio parcior sit , et si fieri potest , simplicior : itaque cibis , quibus benè valentes utuntur , substitui possunt oya sorbilia , lac Asininum ,

aut lenis ex Amigdalæ dulcibus emulsiō, quæ absque gravi stomachi labore non solum vires repārant, verum etiam singulari virtute somnum, & quietem afferunt, humorum acrimoniam retundunt, sanguinisque motum violentiorem reprimunt.

Præterea danda opera est, ut quiete corpus, & animus fruatur. Propter hæc violentæ exercitationes cavendæ sunt, & quæ senum animos exasperare possunt, ab eorum notitia removeantur, quum nihil magis corpus exagitet, sanguinemque in motus violentiores adigat, quàm illæ perturbationes, atque ægritudines, quas animi pathemata medici vocant, præsertim si inordinatæ sint.

Tandem in gravi respirandi difficultate, a qua periculum intendat, ne senes inopinatò Vitā preventur, ad venæ sectionem etiamsi vires deficere videantur, sedulò confugere, necesse est. Si enim in his rerum angustiis sperari quidquam potest, id a sola sanguinis missione sperari jure potest; Quæ opportunè adhibita sæpe facit, ne extemplò ab impetu humorum arteriosa vasa disrumpantur, neve circulus sanguinis ab aucta mole alicujus polyposæ concretionis omninò interceptetur. Itaque vim morbi reprimens, mortem quodammodo retardat, longiusque Vitæ spatium concedit.

## §. II.

*De nervorum resolutione .*

**N**ervorum resolutio morbus quoque familiaris senibus est , & fere semper discrimine plenus; nam quos semel offendit , aut subito occidit , aut paulatim consumit , donec ad exitium deducat . Et quoniam nunc totum corpus , nunc dimidium , nunc ejus partem infestat, modo *Apoplexia*, modo *Paralysis* , nunc *Hemiplegia* , nunc *Paraplegia* , vocibus a Græca lingua petitis , appellari consuevit .

Sed licet nomen varium sit , idem tamen morbi genus est , eademque natura . Itaque varia denominatio mali intentionem denotat , non varietatem . Causa quòque eadem ferè semper est : vel enim lymphæ , vel sanguinis copia cerebrum , nervosque lædens, in crimen adducitur . Sed quia sæpius sine ullo sanguinis , aut lymphæ peccantis vestigio cerebrum in senibus apoplexia correptis repperitum sit , id tanquam certum aliqui habent , quod in rore illo , qui nervos irrigat , vitium frequentius sit , & vera causa morbi ; quorum sententiam non longe a veritate abesse existimo .

Nervi profectò , dum a cerebro , spinalique medulla



dulla exeunt, vagina adura matre accepta investiantur, rosque subtilissimus inter hanc, et illos defluit, qui eos lenit, et emollit. Si ros ille copia, et indole benignus sit, nervi officio suo facile funguntur; si verò ratione ætatis, aliave ex causa a benigno statu re cedat, nervorum actionem aut lædi, aut saltem minui necesse est: ex quo resolvuntur artus, modoque motus, et sensus ab ipsis in integram, recedunt, modò uno ablato, àlter superest, prout, videlicet, magis, aut minus nervi benigno rore privantur.

Qui nervorum resolutione correpti mortis discrimen evadunt, multa toto vitæ spatio incommoda pati solent: mediij enim inter salutem, et ægritudinem positi toto fere corpore tremunt, balbutiunt, vix propriis manibus cibum capere, vix baculo innixi deambulare possunt, uno verbo.

*Et vultu morbum, incessuque fatentur.*

Sed corporis damno major dementia, quoniam fere semper attoniti fiunt, & tanquam fulmine tacti, perdunt aliquando memoriam, & non rarò perpetua mentis hebetudine afficiuntur.

*Spirant adhuc, hoc habent vitæ, sunt cætera lethi*

Is morbus omni fere præsidio major est, et ægrotus, si senex sit, non liberatur & morbi magnitudine, ait Aretæus & ætatis miseria oppressus: Quia tamen ars aliquando non supervacua visa est,

ea propterea auxilia modò aperiam , quæ sin minus sanationem , saltem levamen a morbo promittunt .

Si ergo nervorum affectio adéo gravis non sit , ut subito ægrotum occidat , sic occurri illi potest . Illicò sanguis mittendus est , sive lympa sit , sive ipse sanguis in causa morbi : ut per id auxilium depletis vasibus , humor minimis cerebri vasculis stagnans, per circulationis legem in magna vasa iterum redeat , in girumque agatur .

Prudentiores medici , neque parca , neque nimis larga manu emitti sanguinem suadent : sed illustris Coleus auctor est , ut etiam in ætate proVectioribus liberaliori manu detrahatur : & cujusdam senis jam fere octuageuarij exemplum profert , a quo uncias ferè trigintas sanguinis una tantum vice extraxit , eumque ad vitam , præter spem omnium , hoc solo præsidio , sed repetito ad duas alias vices , restituit . Coleus tanta audacia nobilitatus propriam experientiam celeberrimi D. Giabons auctoritate firmavit . Sed id perpetuum non est : constans autem esse solet , ut pro habitu corporis , viriumque robore majori , vel minori copia sanguis emittatur .

Nonnulli Medicorum in ea sunt opinione , quod ex arterijs , quas *temporales* , aut ex venis , quas *iugulares* Ipsi appellant , tutius , majorique levari-

mine, quàm ex reliquis vasis sanguis detrahi possit. Sed Morgagnus præclarus in re anathomica vir ex venis occipitii sanguinem feliciori trahendum exitu opinatur, propriaque experientia testatur, se in plurimis, præsertim senibus maxime periclitantibus cum magno levamine id auxilii genus expertum fuisse. Neque id sine ratione est. Quum enim venæ occipitales cum venis, quæ intra cranium sunt, immediatè connexæ sint, illis per incisionem depletis, venæ quoque, & arteriæ cerebri, ut citò depleantur, necesse est.

Neque sufficit ad morbi levamen, ut satis sanguinis extrahatur; id etiam opus est, ut qua fieri possit, superflui humores a cerebro, nervorumque origine removeantur. Itaque præter remedia purgativa, quæ per os offerri possunt, ut alvus subducatur, clystheria saltem bis in die injiciantur quæ pro vario morbi gradu, aut leniora esse debent, aut acriora.

Urina quòque opportunis auxiliis elicienda est, sicut enim in viris per sudores, aut alvi fluxum, ità in senibus per urinam maxima morborum pars solvi solet. In *nitro*, & *asellis* præparatis, in raphanis, & in omnibus bulbis vires latent singulares ad urinæ vias reserandas.

Si per hæc subsidia æger sublevetur, illum cito ad corporis exercitationem redire, opus est, quæ non solum vires roborat, & spiritus excitat, sed

superflua quoque e corpore eliminat. Si vero eo pervenerit imbecillitatis, ut exercitationem, in qua maxima spes curationis est, minime ferre possit, danda frictionibus est opera, quoniam hæ exercitationis vicariæ sunt. Itaque poterit sæpius in die laneis pannis totum corpus, sed præsertim cervicem, & dorsi spinam, ubi quoque nervorum origo est, leviter, sed diù perfricare. Tunc membrum, quod reliquis infirmius est, quotidie quoque, sed acius perfricetur. Idem si fieri potest per se, aut saltem ope servi, sæpius moveatur, ut vi quadam ad consuetudinem redeat.

Vertebras insuper, & membra omnia, quæ imbecilliora sint, aut linimento Fulleri, aut quavis alia volatili unctione perlinire, non alienum erit. Nihil porrò his unctionibus præstantius ex-cogitari pôtest, vel ad discutiendos lentescen tes humores, vel ad excitandos fibrarum motus, quoties aut solida debitum elaterium perdiderint, aut fluida concresecendo moram patiantur. Eadem ratione linimentum antiparaliticum, quod in sua Pharmacea celebris Bomè descripsit, non sine laudis spe, usurpari posse existimo.

Quum morbus adhuc diu, multumque producat, ulcera per epispatica in cruribus, aut in occipitio, applicato igne excitentur, quæ aperta, & insanata diutius servare expedit. Hac enim via su-  
per-

pervacua materies; quæ intus læsura erat, utiliter effunditur, quod plus adjumenti afferre solet, quam alvi ductio, aut venæ sectio repetita, quoniam superflua jugiter eliminat, quin vires labefactet.

Ad Thermas longiori morbo affectos mittere in monumentis non vulgarium Medicorum commendatum reperio. Sed nonnulli valentissimi Medici id auxilij genus improbant, inter quos Richardus Mead, qui multos auctoritate, & doctrina antecellit, se nonnullos novisse affirmat, *qui dum vana medicorum spe delusi ad Thermas Batthonienses profecti essent, ex aqua calida egressi, mox iterum apoplexia correpti fuere, & periere*, quum ergò hoc auxilium modò in laudem, modò in vituperationem veniat, sapientis viri consilium erit, non nisi maxima cautela, præviaque Medicorum consultatione illud adhibere.

Tutiori spe usurpari potest ignis, qui Electricus dicitur, quod præsidii genus si non proderit, nihil damni præstare poterit; & aliunde plurimis laudibus, præsertim a Philosophis, adversus hanc ægritudinem extollitur; & non dubiæ fidei experimentis constans est, eventum laudibus, conceptæque opinioni respondisse.

Quid plura? *Cinnabarim* nativam præstantissimi Medici adeò extollunt, ut ad columnas Herculis

(non plus ultra) jam tota, quanta est, Medicina pervenisse videatur. Hæc verò, similiaque remedia passim in usum adhibere practici solent: Sed rarò præconceptę opinioni respondent: adèo in Medicina, etiam ubi perpetuum sit, quod fieri debet, non tamen perpetuum est, quod consequi convenit.

Tandem, si spes nonnulla producendi vitam haberi potest, eam non tam a remediorum farragine, quam a dieta, rectoque victus regimine obtineri posse existimo, itaque cibus parvus adhibeatur, eaque materia, in qua parum sit alimenti, ex oleribus ergo, pullis, piscibus salubrioribus, & volatilibus optimè parabitur, pro potu ordinario aqua dari debet, ex qua *Salsaperilla*, *Lignum Sanctum*, aut *Arnice* flores efferbuerint. Aqua quoque, in qua ferrum ignitum sæpius extinctum sit, potui convenit. Vinum morbo alienum est, Si verò stomachus id requirat, parum dari oportet, præsertim Hispanici, aut Canariensis, ut eo ventriculus roboratus frigidos humores concoquat, spiritus excitet, viresque foveat, & recreet.



## §. III.

*De aqua intercute, seu de Hydropē.*

**N**ON minori tristitia, mentisque sollicitudine in diſſam *Hydropem* ſenes incidere reformidant, quam in violentam nervorum reſolutionem, quoniam ſi parens medicinæ Hippocrates iſtam ſanari impoſſibile eſſe affirmat, illam, non niſi Deorum ope eliminari poſſe, Aretæus magni nominis in arte medica vir ſua auctoritate defendit. Neque mirum videri debet, ſenes in huiusmodi vitium fræquentius incidere, modòque *ascitide*, & modò *anasarca affici*, habent enim ut plurimum ſolida elaterio, & fluida debita compagine deſtituta, a quibus omnis hydropis ſpecies originem ducit; idque ſine contentione ulla affirmare licet; quis enim eſt, vel rudioris ingenij, qui non videat, ſi unum, aut alterum in corpore contingat, ſeroſam ſanguinis partem a proprijs receptaculis facile elabi, atque vel in aliquam cavitatem majori copia, quàm quæ abſorberi poſſit, effundi, vel intrà laxam cellularem ſolidorum texturam facilè ſubſiſtere? Unde hydrops in promptu eſt, quæ licet nomine, & ſede varia ſit, una tamen, eademque origine eſt.

Quàm difficile sit huic morbo mederi, jam superius Aretæi auctoritate declaravi: si verò aliqua affulgeat sanationis spes, eò cura Medici, diligentiaque omnis tendere debet, ut superfluus stagnans aquosus humor aut absorbeatur, aut eliminetur: deinde, ut solidis, firmisque partibus deperditum elaterium restituatur: postremo, ut aboli-  
tæ vires reparentur.

Primum obtineri potest ope eorum, quæ urīnam movent, aut alvum subducunt, veluti sunt aquæ omnes *acidulæ*, *sales aperientes*, necnon *spiritus subdulces*, aut *nitri*, aut *salis marini*. *Aselli* quoque *præparati* urinae vias referant. Idem præstare solet *syrupus Therebynthicus*, aut *scylliticus*; sed potentius istis vesicam ad urinas  
I adigit syrupus, qui ex *Colchico*, bulbo videlicet prima anni ætate per prata luxuriante, paratur.

Præsens etiam remedium cognovimus radicis, quam medici *Calagulam* vocant, ea in America plurima nascitur, & non sine profectus spè usurpari potest, singularem enim, mirabilemque virtutem habet, tum ad viscidos, stagnantesque humores resolvendos, tum ad urine vias referendas.

Si verò adeò copiosa aut intrà abdominis cavitatem, aut per totum cellularem contextum, aquarum effusio sit, ut parum levaminis ab ijs auxilijs obtineatur, *paracenthesim* in *ascitide*, & utriusque

que tali incisionem in *Anasarca* fieri, præstantissimi Medici consiliant: & methodum prudentiorem, multasque cautelas proponunt, ut optatus finis obtineatur. Quæ, quum ex propriis fontibus melius hauriri possint, ad eos accedere prudentis est, quum occasio id requirat.

Ijs prospere adhibitis, deperditum elaterium solidis Medici recto consilio reddere conantur. Itaque repetitis, assiduisque frictionibus languentes fibras excitant: deinde amaris, & roborantibus præsijs laxatum viscerum tonum reparant. Ob eam causam vel Decoctum *Chinæ* chilibeatum, vel vinum austerum, ex quo *Marrubium album*, *Rheobarbarum* electum, & *Centaureum minus* infusa sint, adhibetur. Alia quoque ijs similia passim præscribi solent, sed quum hæc præstantiora sint, reliqua consultò prætermitto. Quorum loco de recta vivendi ratione potius dicam, quæ quum in omnibus morbis, in hoc maxime est convenientissima.

In primis a nimio potu abstineat æger, ne superflui aquosi humoris cumulus augeatur; carnibus deinde parcè utatur: hæque potius assæ sint, quam elixæ. *Radices raparum* sub cineribus assas, earumque decoctionem in delicijs habeat: *radicularum* quoque succo, fructibusque horeis delectetur. Vinum morbo non omnino alienum est,

sed ea naturâ esse debet, ut vires facile reparet, urinamque moveat. Tandem quotidiana exercitatione, aut saltem frictione corpus movere, animum verò a curis, molestisque cogitationibus revocare, expedit.

## §. IV.

### *De Stomachi debilitate.*

**D**uo sunt, quibus maximè senes stomachi causa laborant, *debilitas*, videlicet, & *nausea cum vomitu*. Modo de *debilitate*, proximiori capite de *nausea*, & *vomitu* agemus.

Debilitas stomachi facilè innotescit; si habitus corporis malus sit, si flatus continuò erumpant, si murmurent intestina, si assumpti cibi acefiant, aut corrumpantur, si lingua gultu amara sit, si nausea accedat, quæ quum homo non patitur, is firmi stomachi est.

Si senes isto crucientur modo, curandum primo est, ne cibum pluriès intrà diem immoderate capiant, neve vinum, aut alia spiritosa largius bibant; quod tunc maximè concupiscunt, quum stomacho laborant. Sed hoc pacto quarendo auxilium promptius exitium inveniunt; quoniam

niam stomachus imbecillis non copia cibi, sed frugalitate roboratur: Vinumque, & quæcumque aliæ spiritosæ potiones, si pleno ore hauriantur, calorem naturalem extinguunt, non excitant; suffocant, non foveant.

Egris hujusmodi sine ullo sanitatis discrimine proderit deambulatio ante cibum, maximèque si aut equo, aut curru corpus moveatur. Post deambulationem, aut equitationem proderit cibus simplex, & tenuis, succo citri, & grato cinnamomo conditus. Tunc aqua bibenda est frigidissima, cui adjungi potest nonnihil vini hispanici, aut malvatici. Nihil porrò vino fenum stomacho salubrius est, si parcè bibatur: si largè, nihil perniciosius. A cibo meridianus somnus stomacho laborantibus convenit, mox iterum deambulatio, quæ neque sudorem, neque lassitudinem faciat: deinde totis noctibus conquiescere, plenoque somno indulgere oportet.

Hactenus victus ratione contra stomachi imbecillitatem pugnatum est: modò remedijs quoque pugnandum, ut reciproco adjutorio eam facilius vincamus. Non ergo prorsus inutile erit salviæ, mentham, absyntium, corticem citri primo manè, jejunoque ventriculo masticare, salivamque deglutire; sed his præferri debet *Perruvianus cortex*, & lignum *Quasi dictum*, quod ex *Suri-*

nam ad nos traducitur, balsamico quidem, & roboranti spiritu, si quæ alia, plena sunt. Tinctura quoque stomatica, quam *Endiburgensis Pharmaco-  
pea* parare docet, cum laude adhibetur.

Martem insuper, aut succo ex pomis solvere; aut in subtilissimum pulverem super porphyreticum marmor redigere, Medici amant, & vel simplicem, vel cinnamomo, & nuce aromatica permixtum imbecillitate stomachi laborantibus præscribunt: quod remedium præstantissimum esse adversus eam, & a majoribus accepi, & ipse longa experientia comperi. Id etiam a primæ notæ Medicis commendatum reperio, ut aqua videlicet, in qua ferrum ignitum sæpius extinctum sit, pro familiari potu adhibeatur. Sulphur profectò ferri, quod aqua permiscetur, adeo stomacho amicum est, ut eum sensim roborando, tandem ad pristinum, integrumque robur restituat.

## §. V.

### *De nausea & Vomitu.*

**Q**ui stomachi imbecillitate diù, multumque laborant, cibos fastidire tandem incipiunt, acceptosque non retinent, sed multa pitui-



tuïta,acidaque colluvie permixtos vomitu ejiciunt. Quod pessimum ægritudinis genus est: præsertim quo grandior ætas sit, desinit enim ali corpus, brevique lapsu temporis tabe consumitur, & ità deficit velut lampas, quæ consumpto oleo extinguitur. Quoniam obturata vasa lactea, & vi morbi quodammodo occlusa, c hilo ingressum negant, ex quo sanguis renovari non potest; Itaque blanda sua, benignaque indole orbatus corpus non nutrit, sed destruit, febriculamque sæpe movet, quæ non nisi consumpto corpore, omnique naturali calore extincto cum vita desinit.

Venienti morbo protinus occurrere Medico incumbit: quum enim vitium radices egerit, multumque invaluerit, ex præcipiti senes levare non facile poterit. Ad ultimum verum discrimen illos pervenire conspiciet, quum non solum caro, & quidquid ex ea paratur, sed panis etiam ipsis in fastidio sit; vomitus item, si non sola pituita, sed atra quoque bile permixtus moveatur, senes jam in extremis esse, denotat.

Prima Medici cura sit, ut stomachus a superflua pituita, mordentique acido protinus liberetur. Danda idcirco aqua est, in qua *Hippecacuan* leviter infusa sit, quæ syropo *scillitico* permixta jejunè bibatur, ut ità stomachus ad vomitum adigatur: idque saltem tertia quaque die per hebdo-

hebdomadam fieri oportet, ut ejus salutarī auxilio superfluus, corruptusque humor ejiciatur.

Quum corruptæ materiæ satis effusum sit, danda opera est, ut stomachus consistat, ad statumque sanitatis redeat: itaque ea offerre opus est, quæ stomacho amica sint, ut cibi sunt, qui olim in delitijs esse consueverunt, aut quos tunc avidè appetunt, etiamsi non probatæ qualitatis sint. *Halicem* ergo, & *Pernæ* quoque parum: aliaque ijs similia, quum stomachus appetat, & facile retineat, id omne primum ipsis offerendum est.

Si vero adhuc fastidio laborent, multī cibi mensæ apponantur, ut varietas eos recreet, & paululum ex singulis degustando, famem vitent; Inter amicos quoque epulari non rarò salivam movet, sed & vina offerantur, quæ gratiora & odore, & sapore sint, & quæ singulari virtute roborandi stomachum laudantur, inter quæ *Hispanicum*, *Cyprium*, & *Canariense* primas habent laudes.

Aqua pro potu ordinario danda est, sed frigidissima, & in qua ferrum ignitum sæpius extinctum sit: ita enim aqua ferri sulphure impletur, quod stomacho valde amicum est. Sorbilla quoque exhibere oportet, præsertim quæ ex *Cinnamomo*, & succo *Mali Medici*, aut *Citri* parari solent: fructus etiam, præsertim horei stomacho

cho grati sunt, & salutare: saponaceo enim succo, quo exuberant, viscidos humores attenuant, obstructa viscera referant, pilorique callositatem, quæ sæpius morbi præcipua causa est, si recens sit, destruere, si vetus, saltem imminuere possunt.

Post cibum fœniculum saccharo obductum masticare, salivamque deglutire gratum erit, & salutare; item corticem citri pari modo obductum, continet enim cortex iste, ipsumque fœniculum quantitatem olei essentialis, quod ita ingestum stomachum recreat, fibrisque deperditum elaterium restituit.

Solet potio parari ex *China* torrefacta, quæ instar *Cassè* a prandio quotidie forbillanda est, nam magnum levamen præstare usu repertum est. Non solum enim virtute sua stitica fibras in stomacho roborat, verum etiam acidum spontaneum corrigit, & emendat.

Idem præstare solent *Sales absyntiorum*, *Centaurei minoris*, & aliquæ *Terræ alcalæscetes*, præfertim, si volatilibus remedijs permixtæ in usum adhibeantur. In ijs verò, similibnsque remedijs tandiù insistendum est, donec omnis causa imbecillitatis tollatur; Si enim senes sedulò, constanterque non fuerint adjuti, in discrimine sunt, ne a morbo vincantur.

Tandem non sine spe laudis præscribi poterunt

terunt folia trifolii arborei odoriferi, quod germinat in America, & Indi *Culen*, Botanici vero *Psoraleam americanam* vocant, roborant enim stomachum, nausæ medentur, appetitumque movent; qua propter in tota Indiæ meridionalis plaga, sed præsertim regno Chili maximi habentur. De hoc arbusculo, ejusque virrutibus accurata descriptio nuper edita fuit a præclarissimis viris DD. Philipo Gigli, & Gaspare Xuares, qui nonnullas plantas Americanas, ut sibi oblectamento, aliisque profectu sint, maxima diligentia, & non sine levi impensa, Romani soli incolas faciunt.

## §. VI.

### *De malo Corporis habitu.*

**S**tomachi imbecillitati jungitur malus corporis habitus, quoniam ex iisdem principiis oriri videtur, neque a curationis modo separatur.

Hujusmodi corporis vitium, quod *Cachexiæ* nomine lippis, atque tonsoribus notum est, vultus præsertim detegit, nam qui eo laborant, adeo pallidi sunt, ut vultu effigiem mortis quasi proferant.

Mala hæc corporis constitutio a stomachi imbe-

cillitate, destruetque ciborum digestionem ortum, ut plurimum ducit. Iis enim vitiatis, vitiatur quoque chylus, a quo sanguis, totaque fluidorum massa facile defœdatur.

Interdum quoque a soluta humorum indole, eorumdemque nimia evacuatione principium habet, quod secum discrimen majus involvit, quia imbecillia corpora nimiam qualemcumque evacuationem diù sine vitæ periculo ferre non possunt.

Cachexiæ à nimia humorum profusione productæ auxilio sunt remedia, quæ illam vel minuant, vel reprimant. Deinde ea cibi, & potionis genera, quæ, quod amissum est, restituant: adeoque jusculis præsertim capi, ovis forbillibus, gelatinis, similibusque auxilijs ægri nutriantur. Vinum, si moderatum sit, vires reparat: si immodicum, profluvium promovet.

Si a stomacho imbecilli, malaque ciborum digestionem vitium oriatur, licet violenter non occidat, sed levius initio videatur, non ideo parvifaciendum, nam sæpè etiam exigua scintilla magnum solet excitare incendium. Ut ergo periculum omne tollatur, illa cura cum profectu, bonaque spe adhiberi potest, quam superius dixi, quum de stomachi imbecillitate verba feci.

*De virium defectione.*

**A**D malum corporis habitum virium defe-  
ctio proximè accedit, de qua, juxta pro-  
positas mihi dicendi leges, protinus verba fa-  
ciam.

Virium defectio, quæ sæpe animi, & corpo-  
ris summum languorem consequitur, collapsæ,  
infirmæque constitutionis vitium esse assuevit.  
Quum autem senes propter multam ætatem jam  
ferè omnes imbecilles fiant, nihil mirum videri  
debet, si in hoc vitium facilè offendant, a quo  
jam ipsis perniciēs imminet.

Sed præter multam ætatem, mala digestio a ni-  
mia ciborum copia, etiam in hujusmodi ægritu-  
dinis causam venit: qua propter quum morbi du-  
plex principium esse possit, quod toto cælo di-  
versum est, duplicem quoque curandi viam osten-  
dam.

Si multa, aut prava ciborum copia, qui con-  
coqui, digerique non possint, vires pessumdet,  
languoremque faciat, in promptu esse solent:  
*sensum torpor, nausea, vomitus, flatus, imi ven-*  
*tris dolores, sensus ponderis circa ostium ventri-*  
*culi, sudor quoque frigidus cum frequenti ani-*  
*mi deliquio, & immodico alvi fluxu:* Quæ om-  
nia



nia ad exitium senes brevi deducunt, nisi ijs celeriter auxilia præstentur.

Propterea ità laborantibus inter initia opitulandum. Si cibus intus computruit, eoque summam virium defectionem faciat cum frequenti animi deliquio, protinus breviori via ejiciendus est. Idcirco jusculi pinguis, aut aquæ tepesactæ oleo, sale, aut mele permixtæ quàmplurimum offerre oportet, ut large bibant, & vomant: Sed etiamsi vomitus non incidat, tamen corruptæ novam miscuisse materiem proderit.

Alvum quoque expedit lenibus clystheribus aperire, ut acria, quæ intus lædunt, hac quoque via expellantur. Ità enim corporis nostrî natura comparata est, ut illi nocitura, vel copiosa lymphæ abluere, vel vomitu, vel diarrhæa expellere, ut conservetur, expediat. Ubi primum per hæc auxilia corrupti humoris satis effusum sit, ne vires penitus deficient, consulere prudenti Medico incumbit: Alvus ergo statim compescenda est, spiritus excitandi, & stomachus roborandus.

Primum obtinetur ijs auxilijs, quorum ope alvus comprimi solet. Itaque vinum generosum, & austerum, *Cidonorum*, & *Sorborum* conservæ, *Diascordium Fracastorii*, *Panis torrefactus vino madidus*, *Cinnamomique* pulvere inspersus non ra-

rò optatum scopum attingunt. Si verò hæc non sufficiant, ad valentiora adstringentia devenire; oportet.

Alterum obtinetur suavi, gratoque odorum halitu: adèoque aquæ vulgù *Melissæ*, *Reginæ*, aut *Milleflorum* in usum adhibeantur, quoniam absque capitis molestia deficientes spiritus recreant, languentesque vires restituunt, & foveant: Simplex etiam acetum, si probatæ qualitatis sit, naribus admotum, mirum in modum hominem restituit. Quod auxilij genus quibuscumque alijs etiam commendatissimis præferri jure debet: tum quia virtute sua præstantioribus æquale est, tum etiam quia vel ab infimo plebis, quoties occasio id requirat, facile haberi potest. *Ridiculum autem est ijs, quæ habemus, non uti, & quærere, quæ habere non possumus.*

Tandem stomachus roboratur moderata optimi cibi quantitate, nam nec implendus est, ne cruditate opprimatur, neque fame vexandus, ne imbecillitas senes perdat. Cibi ergo esse debent, qui celeriter alant, vel parva copia assumpti: Ova idcirco e Gallinis nuper edita sorbillantur: deinde juscula capi, aut parvæ pullæ: gelatinæ quoque cum *Cinnamomo*, & succo *Citri* conditæ adhibeantur. Mica etiam panis vino odorato & generoso ebria cum profectu offeretur; *Ità enim*

ait Wansvieten *non tam cito dilabitur vini virtus, & novam quasi vitam languenti stomacho inspirat.* Præterea spiritosa, & aromatica omnia, sive simplicia sint, sive composita, quæ pro famosiore *Cardiaca* audiunt, prudenter in usum adhibentur: Per hæc enim fit, quominus senum vita inopinatò deficiat, malumque, si non desinit, saltem non vincit.

Ubi grave ætatis pondus, quod est alterum languoris caput, vires pessumdet, præsidia, quæ modò dixi, non oportet negligere, & ijs, quæ nunc dicam, insistere convenit.

Si ergò senes ità viribus deficient, ut jam extremas partes gelidas habeant, & animi sæpè deliquio laborent, ad ultimum languoris pervenisse eos, fatendum est, periculumque in mora, & in modo curationis est; nam si sedulo, & opportunis auxilijs senibus non subveniatur, brevi extingui solent.

Idcirco crura, & pedes statim fovere oportet, sensimque calefacere pannis subcalidis, & aromatibus ad ignem leviter evaporatis, ne partes istæ reliquo corpore fiant frigidiores; Oportet quòque universum corpus, sed præsertim os ventriculi oleo aromatico tepesfacto, diù, & molli-ter perfricare, donec incalescat. Spiritosa quoque, & nutritiva naribus admoveantur. Exem-

plo est Democritus, quem vapor Panis ad tres dies sustentavit.

Nonnulli ostium ventriculi, totumque abdomen non solum oleo *menthæ*, *Lauri*, *nucis aromaticæ*, aut *caryophilorum* perlinire, sed vino quoque meraco, & generoso fovere posse cum utilitate existimant, Neque vana eorum opinio est; Jam enim diu, sæpiusque in Britannia usu compertum est, ut animadvertit Hallerus, homines de sola materia extrinsecus per fomenta applicata, tantum sibi sumpsisse, ut vitam ad aliquot dies protraxerint. Aristoteles jam grandi ætate confectus, & nimio Philosophiæ studio ferè perditus, quum tanta stomachi imbecillitate, tantoque virium languore laboraret, ut jam ad orci limina se brevi perventurum existimaret, hujusmodi auxilia ostiò ventriculi applicando, animi, & corporis labefactatas vires reparavit, diesque suos jam proximè defecturos longius, quàm sperabat, produxit.

Deinceps frigus omnino cavendum est; nihil enim magis inimicum debilibus est: Senes idcirco stragulis benè operiantur: manè, & vespere frictiones adhibeant: vix unquam, nisi ad radios solis se exerceant: & in eo conclavi degant, quod ad meridiem sit expositum, aut quod saltem prunis benè accensis ab injurijs externi frigoris defendatur.

Tan-

Tandem silentio præterire nefas esset illud auxiliij genus, quod, licet nostra hac ætate vix, ac nec vix quidem in usu sit, nihilominus præstantissimum esse, omnique commendatione dignum, ratio suadet, experientia demonstrat, multorumque sapientium auctoritate confirmatur. Id nimirum in eo totum est, ut senes imbecillitate laborantes, puerorum societate delectentur, & cum ipsis sub eisdem stragulis cubare non recusent, præsertim cum eo imbecillitatis pervenerint, ut calor naturalis brevi extinguere videatur. *Jam profecto ab omni ævo, Wansvieten asserit, corpora interitura præ debilitate, aut senio, conati fuerunt Medici refocillare, dum subtilissima illa exhalantia de valido juvenili corpore insinuant debilissimis corporibus sub iisdem stragulis decumbentibus.* Rei veritatem exemplum Davidis satis, superque comprobare videtur, qui diuturnioris ætatis causa vigore naturali pene extincto, quum nullo cibo refici posset, nulloque modo calefieri, fuit Medicorum sententia, ut *Sunamitidem*, virginem scilicet, robustam, & sanam sibi lecto conjungeret, cujus grato consortio, & vitali halitu reficeretur: Sapientique consilio faustus successit eventus. Potuerant certò aut extracto foco, aut jussculis suavissimis languentis Regis calorem, & vires reparare; *Sed voluerunt*



*prudentiores Medici*, ait Hallerus, *vapores sana puella in usum adhibere: ità enim ex sano, atque robusto corpore, quæ exhalantur, maximè volatiliores partes, in debile corpus se faciliè insinuant:* Unde calorem naturalem restituunt, vires reparant, & novam quasi vitam inspirant.

Neque hoc præsidij genus adeo insolens videri debet, ut ad sola Davidis tempora relegatur. Omni ævo, & ab omnibus sapientibus Medicis, si quisquam ætatum memoriam repetat, in usum vocatum fuisse inveniet, & semper summa medicinæ laude, medentium honore, & senescentium solatio adhibitum. Quam opinionem amplissimè testatur monumentum illud, quod in antiquissimo marmore inscriptum, ità tandem nostræ memoriæ pervenit:

L. CLODIUS HIRPANUS

VIXIT ANNOS CLV. DIES V.

ALITUS PUERORUM ANHELITU.

Præterea Giorgiam Siculum, Platonem, Socràtem, multosque alios, præsertim Ludi magistros, ultrà centesimum annum dies produxisse, certa memoria est, Sapientioresque viri cogitarunt, non alia ex causa id obtinere potuisse, quam Puerorum, Juvenumque anhelitu quotidie se recreando: quo beneficio facillime perfrui poterant, quùm Litteras, & moralis Philosophiæ præcepta edocendo, totam vitam, in-



egrosque dies perjucunda Puerorum, & Juvenum societate agebant. Agesilaum quoque insignem Spartanorum regem, cum puerorum contubernio maxime delectaretur, ad longam etatem vitam produxisse, in historiæ monumentis scriptum invenio.

## §. VIII.

### *De Corporis Consumptione :*

**S**enectus hjeni meritò comparatur; velut enim hiberno tempore arbores fere omnes, & plantæ primò marcent, deinde siccescunt, & tandem suo quoque modo decedunt: Ità & homines, ætate marcescunt, siccescunt, & pereunt: Unde inter propria senectutis mala senilis siccitas, sive illa corporis consumptio, quam *maciem senilem* Medici appellant, suum quoque locum sibi vindicat.

Diversa autem macies in senibus est, ac in ijs, sive viri sint, sive adolescentuli, qui tabe consumuntur. In tabidis sanguis acer, & mordax est, qui succum nutriturum partibus apponendum abradit: In senibus secus evenit; fibræ sunt, & minima vasa, quæ primò rigida, & sicca sunt; propterea materiæ nutritionis suscipiendæ non

idonea sunt. In adolescentibus quoque, & viris tabe consumptis ab ulcere pascente viscera, præsertimque Pulmones, sanguis acer fit: In senibus verò ætate confectis vasa tum lactea, tum nervea obtruduntur, quæ nutritivo succo ingressum denegant, hinc amissi reparatio deficit; illaque consumptio oritur, de qua agimus.

Sed licet causa morbi diversa sit, curatio vero non prorsus diversa est: plurima enim in tabidis, ac in senibus, qui macie consumuntur, æquè proficua esse, constans edocuit experientia. Idcirco ova recentia, & sorbilia, pulticulæ ex frumento turcico paratæ, blandæ seminum lactescentium emulsiones, & paucis ut multa complectar, quidquid exsuccas humectandi fibras, & rigida relaxandi solida virtute aliqua pollet, adversus senilem consumptionem meritò commendatur.

Non alia prorsus de causa balnea subtepidæ ex decoctis herbis, & plantis, quæ sicca humectent, & rigida emolliant, admixto præsertim lacte non mediocrem opem allatura posse existimo.

Insuper senibus unctiones proficue sunt, quia hæ quoque & sicca humectant, & rigida solida emolliunt; sed ijs longè præstantiores blandæ, & frequentes frictiones meritò existimantur:

tur: quoniam harum opé alimentum ad cutem adducitur, corpusque nedum facile nutritur, verùm quoque pinguescit, quod jam in equis Hispanus noster Columella tot retroactis sæculis animadvertit: Quum, nulla re facilius equos pinguescere, quam quotidiana frictione, verissimè ait. Galenus idem remedium laudat, eoque utebatur frequentissimè, & non alia de causa, ut ipse fatetur, nisi quia vitale robur excitat, efficitque, ut nutritio, & reparatio corporis promptior evadat: Quare multos senes jam atrophia laborantes, fereque macie consumptos, frictione adhibita, paucis diebus carne felicissimè implevit, ad integramque valetudinem restituit.

Præterea obliviscatur, ut pluries monui, curarum senex, quoniam attenuant corpus quæcumque animi sollicitudines, sed præsertim tristitia, quæ nedum carnem, sed etiam ossa, ut Scriptura docet, exsiccare solet. Contrà verò animus gaudens, curisque liber ætatem jucundam, & floridam facit. Fruatur ergo innocenti vita, blando corporis motu se quotidie exerceat; dulce amicorum consortium quærat; Rusticationem, ubi aura sit lenissima, sectetur; grato tandem, mollique lecto, placidè, longeque quiescat.

Jàm denique in medium proferatur auxilium, si quid aliud, præstantissimum ad maciem senilem

lem, quantum humana ferre potest conditio, penitus removendam, lactis videlicet, salutaris usus. Nullum porrò lacti simile, aut inveniri, aut excogitari potest alimenti genus, quod pari efficacia senile corpus refrigeret; sales acres, & mordaces ferosa sui parte temperet; solida filamenta a vitæ diuturnitate dura, rigidaque facta, butyrofa emolliat; sicca, vacuaque intestitia, caseosa repleat, humidoque rore reficiat. Hæc similiaque a solo lacte senes sperare jure meritò possunt. Quid enim lac est, nisi subtilissimus chylus e salubrium herbarum succo progenitus, puris animantium visceribus elaboratus, omnium ferè viventium primum nutrimentum, & humanæ constitutioni maximi analogum, unde vix natis hominibus dat vitam; jam præ senio morituris conservat? Quid plura? *Aliquid divini in lacte latet*, scripsit Wepferus in epistola ad Verfascam, *vidi ijsmeis oculis tanquam novos homines inde factos fuisse*. Jure ergò Riverius affirmat, quod solum lactis usus possit in medicina facere *neoterismum*, id est, hominis renovationem.

Sed sæpius infeliciter evenit, ut lactis usum maximè desideret senile corpus, tanta vero sit stomachi imbecillitas, tantaque intestinorum levitas, ut illud ferre non possit. In quibus rerum angustijs, ne miseri senes tam salubri, & pene unico, ut ita di-

dīcam, auxilio priventur, lac eo modo præparari oportet, ut *Cinnamomi pulvere*, & *Mellacori cortice* leviter contuso, illi que permixto ad ignem ebulliat. Quo fit, ait præclarissimus Mead, ut nutriri simul corpus, & venter comprimi possit, quod tota summa votorum est.

### §. I X.

#### *De nimia Obesitate:*

**I**nter cæteras ætatis misérias hæc quōque aliquid quando accedit, ut senescentes incidant in nimiam corporis obesitatem, quam Græci *poly-sarciam* appellant. Hoc vitium sine magnæ culpæ negligentia fieri vix potest, quoniam senes, qui ita laborant, desides sunt, & otio dediti, nec non cibis, & potionibus ni mius æquo indulgentes, longiorique somno assueti. Impigri verò, & qui parcè vivunt, brevique requie fruuntur, rarò, aut vix unquam simili modo ægrotant.

Alea plenus morbus est, quoniam obesi senes, ut jam olim edocuit Hippocrates, sæpius derrepente moriuntur. Magnum semper tædium facit, quoniam ita affecti ingentem respirandi difficultatem experiuntur ob nimiam videlicet adipis copiam

piam, quæ circa renes, omentum, & mesenterium accumulata facit, ne libere diaphragma moveatur, a cujus expedito motu pendet, ut facilis respiratio evadat.

Morbi discrimen eò gravius est, quò minus ulla spes integræ sanationis ostenditur. Oleum enim animale semel effusum in cellularis telæ interstitia, crassius est, quàm ut facilè reabsorbeatur in sanguinis gremium, aut per cutis poros paulatim exsudet.

Vitare morbum facilius est, quàm sanare. Unde qui ad nimiam obesitatem proclives sunt, venienti morbo ità occurrant. Cibo parcè utantur, eaque materie, quæ parum nutriat: Potus aqua sit aceto potius, quam vino permixta: Exercitatio post cibum singulis diebus usque ad corporis defatigationem instituat, corpus quoque ludo pilæ quaquaversum exercendum: Somno denique non nihil detrahendum est.

Si per hæc morbus non minui videatur, ad valentiora artis auxilia animum, curasque volvere necesse est; Sed omne, quod offerre potest medicina *diætetica*, præter jam dicta, in eo consistit: Primo, quod parciori cibo *Cassè* potus liberalior quotidie accedat; deinde, ut exercitationibus quotidianis violentæ frictiones per totum corpus adiciantur; tandem, ut defatigato corpori ob majorem exer-



exercitationem , imbecilliorique facto ob inopiam cibi somnus brevis , non in molli pluma , sed in dura culcitra offeratur .

Præteea carnes pingues , earumque jacula , ova forbilia , lac , caseus , & omnia dulcia , quum corpus impleant , vitanda sunt . Horum loco carnes salitæ , pisces fumo indurati , omnia acria , amara , acida , quum corpus attenuent , in usu familiari sint , donec morbus devincatur . Præter victus rationem aliqua tentari possunt , quæ Medici præclari nominis commendant : inter quæ *acetii Scyllitici* parvæ potiones , & frequentes alvi dejectiones , ut insigniter profuturæ adversus hunc morbum , a C. Lieutadio celebrantur .

Illustris Flemingius laudat saponis usum ; & præstantissimus Macbridius lixivium Saponariorum .

Tandem potum aquæ Marinæ , aut saltem marino sale saturatæ nonnulli præscribunt , eaque mensura , quæ alvum bis saltem , unàquaque die solvat . Sed in his , similibusque remediis diu , longèque persistendum est : nam profectus non illico habetur , sed sensim , longaue patientia in eorum usu , obtineri potest .

*De cutis Pruritu.*

**C**utis prurigne non rarò Senes laborant, quod si non adèo perniciosum mali genus sit, quia rarò occidit, satis tamen molestum est, tædioque plenum. Itaque, si non periculi, molestiæ saltem causa dignum est, ut huc quoque referatur.

Inter multa, quæ cutis pruritum faciunt, corporis sordities, & insensibilis perspiratio impedita præcipuæ sunt: iis proxime accedunt cibi acres, saliti, fumo que indurati, nec non fassamenta omnia, omnesque spiritosæ potiones, quibus potissimum senes delectari solent, quùm maximum ex ipsis damnum accipiant.

Quoties pruritus incipit, acrimoniam jam in sanguine latere denotat: quæ si nimis invalescit, scabie, verrucis, intertigine, alijsque foedis, molestisque affectionibus, cutem infestat. Si inter initia opportunis auxiliis illi non occurratur, insidias quoque vitæ parat, nam omnem Sanguinis massam sensum contaminando, Corpus ad plures morbos disponit, qui difficilior curacionem sustinent.

Quapropter ut mali incremento obsistatur primum ac fieri possit, alvum duci oportet sero lactis ca-

pri,

priori, quod ut efficacius alvum moveat, vel optimo *rheobarbo*, vel *thamarindorum* pulpæ misceatur, eòque diù utendum est, donec pruritus, asperitas que cutis, vel multum minuantur, vel ad integrum deficient.

Dum corpus purgatione lustratur, cibus offerendus est simplex, & in quo leve sit alimentum: Potui aqua danda, in qua *Gramen Caninum*, aut *lignum saxafras* efferbuerit. Optima etiam potui est ex feminibus frigidis emulsio; sua enim lactescente virtute sales diluit, calorem temperat, acrimoniam corrigit, blandumque somnum facit. Vinum malo omnino alienum est; si vero stomachi imbecillitas, aut longa assuetudo illud requirat, hoc quoque dare licet, comparatum enim a natura est, ut quibus rebus homo a teneris maxime assuescit, ab eorum consuetudine in maiore ætate divelli minime possit: Sed tunc vino aquam addere oportet, ut vini vim miscendo frangat.

Ubi jam corpus purgatum sit, nihil magis præstandum est, quam ut totum corpus lactis usu demulciatur, humoresque omnes dulcescant. Si ergo prius lac caprinum, quod tenue est, deinde vaccinum in usum vocemus, dici vix potest, quam apte senium incolumitati consulamus.

His intus contentus essem: per hæc enim acria,  
quæ

quæ intus lædunt, obtundi, lenisque sperarem; sed aliqua externa remedia in subsidium quoque vocare, non alienum censeo, ut reciproco præsidio vitium omne facilius vincatur. Scire ergo convenit, quod balneum aquæ subtepidæ curatio requirit, quoniam hoc calorem temperat, acrimoniam corrigit, cutem emundat, totumque corpus reddit perspirabile. Per spiratio autem, ut impedita, præcipua causa morbi est, ita restituta morbum solvit.

Non dissimili ratione vestimentorum, sed præsertim subuculæ, tibialiumque frequens mutatio salutaris esse solet: corporis enim perspirationem faciliorem reddit, & aperit poros, quos sordida, immundaque vestimenta magno valetudinis detrimento persæpe occludunt.

## §. XI.

### *De Extremitatum Frigore.*

**Q**uemadmodum calor adolescentibus & viris, ita frigus inimicum senibus est, magnamque perniciem affert. De hoc etiam nonnulla animadvertere operæ præmium erit.

Jamdudum Boerhavius licentioris medicinæ clarissimus illustrator aureo libro, quem *de nervorum*

*morbis* inscripsit, notaverat, summum frigus non rarò Apoplexiæ causam esse, in iis præsertim, qui ratione temperamenti, aut longæ ætatis causa, viribus corporis infirmi sint, & imbecilles. Eo enim extrema membra primò gelida fiunt; alget deinde exterior pars capitis; tunc fluidorum motus lentè decrescit; spiritum animalium liberus cursus prepeditur, tandemque sensus, & motus aut stupefactio accedit, aut abolitio. Id dum evenit, suavissima oritur *anæsthesia*, sive dulcis sopor, neque ullus somnus adèò fascinat mentem, dum vitæ insidias parat: nam si ad aliquot momenta producit, homo dulce quiescens tunc vel maximè moritur, cum vel minimè cogitaverat.

Id morbi genus in his regionibus maximè intercurrit, ubi medio hyeme propter nimium solis recessum, niviumque copiam adèò frigus invalescit, ut cursum flumina sistant, ipsique fortissimi adolescentes sæpe nares, eas emungendo, perdant. Quod in Laponia, Syberia, alijsque Borealibus regionibus, aliquando accidisse, constans opinio est.

Quid facere expediat, ut senes frigus, ejusque discrimina devitent, jam paucis dicam. In primis oportet, senes vitam agere ubi hiems maritimis ventis, calidoque afflatu tepe scat: Si verò

aut

aut fortunæ iniuria, aut alia ex causa id non liceat, ædes saltem habitare debent hibernum solem habentes, & in cubiculis dormire, ubi ope ignis tepor blandus sit, corporique amicus, ita beneficio loci adversus frigus, ejusque incommoda aliqua ex parte tuti esse possunt.

Deinde danda opera est, ut quotidie solis ad radios exerceant, excitentque corpus motu aliquantulum valentiori: per ascensum, & descensum deambulationem aliquando suscipiant, ut hoc quoque modo calorem excitent.

Si verò deambulationem ætas non ferat, frictione utantur, quæ exercitationis vices gerit, & æque in corpore calorem movet: itaque vel manu, vel verriculis ex fetis caprinis confectis, vel linteis, ea leviter in gyrum revolvendo, singula membra perfricentur; idque in de die saltem fieri debet, & unaquaque vice, si corpus ferat, ad horæ quadrantem. Denique non prorsus inutile erit veteri oleo, præsertim laurino, vel aliquo ex calefacientibus permixto quotidie totum corpus inungi, quod occludendo cutis spiramenta facit, ne volatiliores partes avolent, quibus retentis, consueta naturæ lege, totum corpus incalescit.

Hæc, similiaque auxilia constantia, & patientia diu adhibenda sunt, & licet sub initio parum pro-



proficiant, nō prōtinūs removeantur, nam profectus tempore expletur. Falluntur verò, qui portionibus calefacientibus, validoque spiritu plenis, ut vino Hispanico, Ungarico, aut Malvatico largius, quàm par est, indulgendo, frigus sublaturi sperant; non quod id aliquando non incidat, sed quod plerumque mala frigore pejora faciat.

Solum ergo illis auxiliis, quæ superius pròposui, summo hyemalis tempestatis frigori tutò subveniri potest, donec, adventante vere, tempus incipit esse præsidio: Nam viciniori solis appulsu, velut omnia sublunaria corpora incalescunt, & vigent; ità frigida senilis ætas incalescit, viresque adversus frigoris molestias facile consequitur.

## §. XII.

### *De Oculorum Vitijs.*

**O**Culi pars humani corporis necessarissima æque, ac jucundissima, quod multum ad usum, dulcedinemque vitæ conferat, accedente senectute non levia incommoda sustinet. Glaucedo enim, & hebetudo frequenter senibus lucis usum impediunt; Sed fluxus pituitæ, quæ inter-  
 nis oculorum angulis inhæret, sæpèque ipsas pal-

pebras conglutinat, frequentius lumen tollit.

Glaucedinis, visusque imbecillitatis curationem senilis ætas, quæ sine novo vitio aciem oculorum habet hebetem, minimè admittit: Itaque hæc vitia, si semel cæperint, ad mortem senes plerumque comitantur. Fluxus pituitæ, si vetus jam sit, nec ipse facile in decrepita ætate curatur; Avocatio verò humoris ad partem minus nobilem adversus hoc vitium non parum prodesse potest; affluxum, videlicet, peccantis materiæ minuendo. Hanc ergo curationem saltem tradamus. Itaque alvus ab inferiori parte inter initia morbi opportunis remedijs evocanda est. Deinde demendum aliquid ex cibo, ut dempta materie, fluxus pituitæ minuat. Cibus non solum parcus, sed etiam simplex offerri debet, atque ex his paratus, quæ pituitæ acrimoniam lenire possint. Idcirco ova ex gallinis nuper edita, Pulli, & Lactentis Vituli juscula, pulticulæ ex frumento Turcico, iisque similia exhibeantur: Lac quoque sive caprinum sit, sive vaccinum adversus acrem pituitam valet. Potus tandem dandus est, qui copiose urinam moveat, ut hac quoque via morbi eliminetur materies.

Si his morbus non cedat, vel fonticulus in utroque brachio, vel ulcus sub occipitio ope ignis aperiatur, diuque servetur insanatum, quo præsidii genere lippientium incommodis obviam ibi-

mus:

mus : quoniam supervacuæ , & vitiosæ materie  
expeditior via ità paratur , & a sede nobiliori  
vitium deferitur ad minus nobilem . Nonnulli in  
usu habent acribus collyrijs oculos concitare ,  
ut excitato fibrarum motu a superfluo humore fa-  
cilis expurgentur ; sed satius est , ab his reme-  
dijs abstinere , quoniam plerumque lædere visa  
sunt , præsertim si ab imperita manu applicentur .  
Sola infantium urina , in qua lene ammoniacum  
principium resolvens residet , oculos in die sæpius  
abluere sine discrimine licet . Ipsa quoque natu-  
ralis aqua , cui parum aceti admisceatur , aut quæ  
in officinis ex *rosis* , floribusque *sambuci* per di-  
stillationem paratur , cum aliquo profectu , & sine  
ullo periculo potest usurpari . Tandem quotidianæ  
frictiones , & blandæ corporis exercitationes ser-  
ventur ; Quæ duo in omni genere senilis valetu-  
dinis necessaria prorsus existimo , sive curativa ,  
sive præservativa auxilia quærantur .

### §. XIII.

#### *De Aurium vitiis :*

**A**ures ab oculis non longè distitæ sunt , ea-  
rumque usus , si non æque necessarius ,  
æque gratus hominibus est , atque perutilis . De

carundem ergo vitijs frequentioribus aliquo modo quoque referamus.

*Gravis auditus, tinnitus, & bombus, sive murmur* instar decurrentis fluminis, aut aquæ ex alto delabentis sunt aurium vitia, quibus senes frequentius affligi solent. Quæ si ab aere intus incluso, per fluxionemque recepto, aut a sordibus, quæ intrâ aures innasci solent, oriuntur, curationem facile accipiunt; sordes enim facili negotio extrahi possunt; fluxio quoque superflui humoris, admodum circa collum, & aures succida lana, pari facilitate discutitur.

Si vero a nervorum imbecillitate hujusmodi vitia principium ducant, medicinæ faciendæ ut plurimum locus non est; quoniam nervorum vitia, nedum in senibus, verum in ipsis adolescentibus, & viris, quibus maximum robur est, vix unquam sanantur. Nihilominus aliqua modo proponam, quæ tentare non inutile erit, quoniam nonnullis profuisse visa sunt. In primis ergo alvus leniter ducenda est, & aliquando quòque acriter compellenda. Victus salubris, & tenuis sit. Potui aqua detur, cui aliquid admisceatur, quod urinam moveat; nam semper curandum est in quoque genere senilis valetudinis, ut urinæ viæ referentur: Velut enim adolescentuli per alvum, virique per sudorem, ita senes, ut sæpius dixi, per

per urinam facilius superflua depellunt.

Acribus insuper gargarizare oportet, ut aqua, in qua aliquid acre incoctum sit, ut glandulas in ore vellicet, salivæque fluxum moveat. *Sal* quoque *Prunellæ* in ore detentum, dum paulatim solvitur, fluere crassiore salivam facit, adeoque viciniore partes a supervacuo stagnante humore repurgat, ipsumque ductum, qui ex ore ad aures sonum deducit, expeditiorem reddit. Vescatorium satis amplum sub occipitio positum, diuque retentum, quum impacta resolvat, crassa attenuet, & supervacua repurget, non sine ratione aliquando profecisse, compertum est.

Tandem auris a sordibus benè eluenda est, tuncque ejus foramini gossypium oleo amigdalino madidum, cui spiritus *salis ammoniaci* ad guttas aliquot adjiciatur, infundi debet, quod remedij genus impactam materiem mirè resolvit, superfluos humores discutit, suumque elaterium nervis restituit. Idem præstare potest oleum *Camphoræ*, si pari modo intra aurem admisceatur, quia pari virtute pollet, unde adversus surditatem merito commendatur.

## §. XIV.

*De Distillationibus.*

**D**istillat e naribus humor, quod vitium *Corysa* dicitur, & licet frequens in Senectute sit, leve tamen esse solet: nam præter capitis gravedinem, sternutamenta, & acre ex naribus stillicidium, nihil ultra mali producere consuevit.

Interdum ex naribus humor defluit ad fauces, quod pejus est, nam vocem exasperat, tussim movet, somnum aufert, appetitum minuit, sputumque crassiores facit.

Pessimum autem vitium est, quod ex naribus fluens pulmones occupat, *Catharrusque* dicitur: nam pestiferum aliquando fit, modoque acuto *perijneumoniaco* morbo senes occidere, modo longa, viscidaque humorum congestione suffocare solet. Nihil autem hoc vitio senibus magis familiare est, sive debilis pulmonum compages in causa sit, sive major lentescientium humorum copia, quæ eo magis crescit, ad cavaque pectoris defluit, quo magis ætas ingravescit, corpusque imbecillius sit.

Ubi distillatio ex naribus incipit, curandum sedulò est, ut intrà nares morbus consistat; adeò-  
que



que violentæ exercitationes , & deambulationes sub jove frigido vitandæ protinus sunt . Cibus solito parcior sit : abstinendumque a vino est , & ab omnibus potionibus , quæ sanguinem exagitent , caloremque moveant . Pro mero satius erit dilutum bibere , & aquam subtepidam succo *Citri* , & albo Saccharo permixtam . Potio quoque confici potest ex ijs floribus , aut folijs , quæ viscidos humores attenuant , acres corrigunt , impactos resolvunt , superfluosque per cutis spiracula propulsant .

His indicationibus satisfacere solet decoctum thè, hederæ terrestris , & salviæ montanæ , si sæpius in die calidum bibatur ; sed iis citius , tutius , jucundiusque satisfaceret decoctum aromaticum illius folii , quod vulgo herba *Paraguai* dicitur , a reyno videlicet hujus nominis , ubi habitat , summoque studio , & diligentia colitur ; nam multiplici experimento compertum est , præsentissimum remedium illam esse in catharralibus affectionibus , quum distillationes mire resolvat , & humores bronchiis inhærentes partim per anacatharsim , partim per diaphoresim celeriter eliminet .

Raro fit , ut si per initia senes ita sibi consulant , vitium non levetur . Si vero distillationi serò occurratur , morbus , qui intra nares , aut intra fauces tantummodo contineri poterat , ali-

quantulum invalescit , pulmonesque invadit ; Quod si febrem faciat , periculo non vacat ; inflammationem enim minatur , quæ in hac ætate lethalis plerumque est . Itaque sanguinem mittere non alienum erit , ut saltem inflammationis periculum removeatur . Deinde thoraci , dorso , brachijs , cruribusque , si febris in integrum desit , fortis frictio ; si aliquantula sit , .levis manuum admotio adhibenda est , quæ crudos humores digerat , ad cutemque revocet .

Insuper assueto cibo demere dimidiam partem oportet , & sumere ea , quæ pituitam crassiorem faciant ; unde sæpius in die utile erit , decoctum hordei haurire , ex quo uvæ passæ cum caricis pinguibus effervuerint : decoctum florum *malvæ*, *violarum* , & *althææ* radicis æque utile existimatur . Ubi per hæc , similiave remedia , humor idoneus sit , ut foras tussiendo expellatur , vinum meracum concedendum est , cibusque augendus : Tunc quoque ambulatione , & frictione opus est aliquantulum valentiori ; quæ omnia cum corpori robur restituant , impactus humor facile discutitur , morbusque solvitur . Si verò parum auxilij ex ijs habeatur , succum recentis *raphani* , aut *raparum* ex taleolis minutatim incisis expressum sumere Medici suadent , qui *althææ* Fernèlii syrupo , aut *oximelle* simplici permisceri debet , ut ita fa-

facilius viscerum stagnantis humoris colluvies expellatur.

Pertinacius laborantibus oximel *Scylliticum*, aut syrupum *sulphuris* non sine manifesto levamine Medici exhibere solent, præsertim si unum, aut alterum *Kermes* mineralis granulum eisdem exhibeant, in quo maximam virtutem sæpe me expertum fuisse, ingenuè fateor; quia tenaces humores potenter incidit, attenuat, immutat, & excernit; quod omne, tunc maximè optandum est.

Si verò tot auxilijs morbus major sit, satis amplum vesicatorium medio thoracis, ipsique dorso admoveatur, quod lædere, et juvare simul sæpe visum est: Nam cutem, dum exulcerat, humores partim ad eam avocat, partim attenuat, ex oreque faciliiori modo expurgat.

## §. XV.

### *De Vigilia.*

**E**st etiam illa gravis perniciēs, quum senes vigilia occupat, nihil enim eorum corpora magis destruit, viresque exhaurit, quam dies, noxque insomnis: adeoque si optata requiē aliqua ex causa priventur senes, morosi fiunt, & inquieti,

quieti; animi, & corporis vires deperdunt; cibos neque absumere amant, neque assumptos digerunt; unde quum reparatio perditæ deficiat, facîle contabescunt, & pereunt.

Id vitij genus a constitutione corporis exsicca, nimisque tensis utriusque Meningis filamentis, necnon ab aucto spirituum animalium influxu in organa sensuum, & motus principium ducere Phisologici omnes consentiunt. Et re quidem vera senes illi, qui vigiles dies, noctesque agunt, ut plurimum constitutione corporis exsucca, animoque adeò irritabili præditi sunt, ut vel levioribus perturbationibus valde moveantur.

Vigilia, si pertinacior sit, fieri non potest, ut superius exposui, quin valde noxia evadat, plurimumque vitæ descrimen secum afferat, quapropter ab initio illi subveniendum est.

Ergo ante omnia vinum interdicerem, & quidquid spiritosum est, & aromatibus conditum. Quid enim senes exsuccæ sunt, nisi aridæ plantæ? Quid vinum, & quidquid spiritosum est, nisi ignis? Quis ergo aridas, exsuccasque, si compos mentis sit, plantas igne irrigabit?

Loco vini prodesse poterit copiosa, & frequens ex seminibus frigidis emulsio: lac vaccinum, aut si illud non sit, caprinum, præsertim si loco cœnæ per plures dies adhibeatur. Eodem profectu  
adhi-

adhiberi potest *Lactuca*, cujus *cauliculus* dulci Lacte verno præsertim tempore repleri solet, ab ijs enim, similibusque remediis, si diù, & patienter exhibeantur, sperandum est, ut tensa solida relaxentur, sicca humectentur, effrenesque spirituum animalium motus ad quietem placidam redeant.

Balnea etiam pedibus subtepida, ingruente nocte adhibita, non dissimili ratione somnum ad aliquot horas fecisse, expertum est.

Opium tandem ad somnum diù, longeque producendum ijs omnibus, quæ modo proposui, præstantius est; sed ea cautela eo uti oportet, ut quem dormire cupimus, expergiscere possimus: Minori animi sollicitudine ad somnum conciliandum adhiberi possunt emulsiones ex seminibus Papaverum; aut qui ex eorundem capitibus contusis gratus syrupus conficitur.

Tandem animadversione dignum videtur, quod senibus vigilia laborantibus vitandæ omninò sunt exercitationes violentæ, nimia lectio, alta vocis contentio, & cujuscumque rei assidua cogitatio. Et si quæ sunt, quæ animum exasperare possint, ab eorum notitia pariter removenda sunt. Quæ, si attentè, & opportunè observentur, sperandum est, ut optata quiete, placidoque somno senes fruantur.

## §. XVI.

*De Somno .*

**S**opor, contrarium videlicet vigiliæ vitium, in medium proferatur, in quem senes proclives esse solent, adèoque importunè, ut vel inter gratiora cum amicis colloquiâ, vel inter gravissima negotia non rarò somno ad stertorem usque capiantur.

Obæsi ut plurimum, laxaque præditi corporis constitutione, necnon intemperantes in cibo, pigritiæque dediti, sunt, qui in tantum somnum delabuntur :

Nimia lentescentium humorum copia, quæ cerebrum, nervorumque propagines comprimendo, liberum spirituum animalium motum retardat, & impedit, hujusmodi vitij causa probabilior videtur.

Neque faustè de hoc vitio præfagire Medici solent; nam licet nihil doloris habeat, plurimum tamen periculi secum involvit; & quàmquam vigilia minus molestum sit, necem sæpe intendit, ut videbatur Philosopho jam centenario, qui quum profunde dormiret, excitatus, & rogatus ab amico: *Quid sibi vult somnus iste?* soror, respondit, *jam*



*jam ad sororem tendit* . Jam ergo quemadmodum vigiliis laborantes dulci , placidaque quiete sopire convenit , ne pernicies eos occupet , ita conducit somniculosos , & quasi torpentes excitare , nec pati veterno consenescere , atque extingui . Oportet idcirco ante omnia victum tenuem , & aromatibus conditum somniculosis exhibere : pro potu ordinario decoctum ex Thè , aut Cafè ipsis offeratur ; corpus quotidie ad sensum lassitudinis movere expedit ; sin minus , vehementi frictione excitare : Lèctioni quoque , vocis contentioni , & disputationibus aliquot horas insumere non alienum erit . Quæ omnia humores crassos attenuando , corporisque fibras roborando sæpè faciunt , ut sensus excitentur , soporque discutiatur .

Si verò majus vitium sit , ut ijs auxilijs subigi non possit , aut Melissæ aquam , aut acetum stillaticium naribus applicare expedit : Offerre etiam oportet pulverem ex herba , quam Nicotianam Medici vocant , aut Rutham ex aceto contritam , & movere sternutamenta ijs , & alijs præsidijs ad id efficacibus .

Penna quòque intra nares immissa , dum nerveas papillas vellicat , sternutamentum facit . Tandem ad somnum discutiendum medicamentis alvum solvere , & urinæ vias referare semper ferè necessarium est ; hæcque per triduum saltem fieri oportet ,

tet, donec omnis causa soporis discutiatur :

Si vero neque ijs sopor facile cedat, spiritum *alcalinum* naribus, *semen synapis* plantis pedum, & *cantharides* occipitio applicare opus erit, ut omni artis molimine somniculosi excitentur, unde rursus possint ad dulcissimum vitæ usum, consuetaque officia reverti,

## §. XVII.

### *De Alvo scripta.*

**A**lvus vel nimis soluta, vel stricta nimis esse solet: Hæc, teste medicinæ parente, melior est in senectute, quàm illa; si verò diù stricta sit, multa secum affert incommoda. Præter enim ventris intumescuntiam, modo flatus, modo intestinorum dolores movet, non rarò hemorrhoides irritat, fereque semper mentis acumen hebetat, & omnium sensuum confusionem facit, ipse ut Hippocrates sua auctoritate testatur.

Tanta alvi adstrictione aliquando senes laborant, ut sæpe decem, aliquando plures dies sine alvi ejectione agant. Unde merito, licet ridicule, cum Catullo dicere possumus,,

*Nec toto decies cacant in anno,*

*Atque*

*Atque id durius est faba , & lapillis ,  
Quod tu si manibus teras , fricesque ,  
Non unquam digitum inquinare posses .*

Quo fit , ut multa , gravissimaque incommoda , ut superius innui , insurgant : mora enim , & copia majori , quam par est , dum feces in intestinis stabulantur , reliquæ functiones corporis defædari , & lædi solent .

Alvus idcirco tertia saltem quaque die aperta servari debet : Si tardior sit , blande ad secessum adigatur , quod non medicamentis ex penu Medicinæ depromptis tentandum : nam omne purgativum remedium inimicum senibus est : tutius tentari potest , & obtineri facilius cibus iis , quos coquus , & prægustator parare in usu habent , ut golosi domini saluti , & palato inserviant. Id auxilii genus Medici ætatum omnium præstantiores tamquam saluberrimum existimarunt ; nam Hippocrates , & Plato duo viri sapientissimi medicamentum in alimento optimum esse medicamentum affirmant , & latinissimus Celsus animadvertit , cibos eos præstantissimos esse , qui simul alunt , & ventrem emolliunt ; quorum sententia ideo arripet , quoniam multiplici eventu compertum est , quod ea auxilii genera , quæ târdo pede , ut ita dicam , alvum ad secessum compellunt , tarditatem auxilii securitate compensant .

Propterea *Beta* in primis, & *Portulaca*; sed præsertim *Lactuca*, & *Malva* decoctis, dulciq; oleo conditis quotidie senes cenæ loco utantur: Carnes pariter teneriorum animalium elixas, & harum pingua juscula, omnes teneros pisces, fructus horeos, recentes, roscidos, & benè maturos, ficos aridos, pinguesque passulas in usum adhibeant; sed his omnibus præferre debent prunas Amerinas, & Hispanicas, præsertimque rugosas juxta illud vulgare consilium,,

*Pruna peregrinæ carie rugosa senectæ*

*Sume, solent duri solvere ventris onus.*

Si verò in ijs parum sit auxiliij, clysteribus sollicitetur alvus; ac primum aqua simplex injicienda est, quæ si parum juvet, adjecto oleo, sale, butyro, sapone, aut melle injiciatur; Per hæc enim acrior aliquantum fit, unde titillando, non lædendo intestina, fæces tandem educit.

Neque vero ab ijs similibusque auxilijs, quæ simplicitate, & siccitate commendantur, protinus desistendum existimo, etiam si parum sub initio proficiant; sed diu tentanda sunt: nam pertinacia juvantis malum corporis vincit; alvusque, licet diù resistat, tandem salutari auxilio victa ad consuetudinem redit.

## §. XVIII.

*De Alvo soluta.*

**A**lvus soluta nimis, majora, quàm nimis stricta, discrimina secum involvit: nam præter tormina ventris, intestinorum levitatem sæpe facit; quæ tandem in *Lienteriam*, aut *Cæliacam* passionem non rarò desinit, quæ omnia imbecille senum corpus ægre fert, eorumque duratione facilè vincitur.

Si a vitio cibi alvi fluxus oriatur, curatio facilior est; nam a cibo satis est abstinere, qui ventrem solverat; Si autem vitium corporis in causa sit, discrimen majus est, auxiliaque valentiora requirit.

Itaque protinus *Cassia*, & *Thamarindis* venter satis purgari debet, ut a noxio, peccantique humore se expediat; deinde altringentibus, & roborantibus auxiliis, si fieri possit, firmetur. Vinum ergo austerum ante omnia experiundum est; mox *pira* immatura, & *mala cylonica* sub cineribus assa adhibeantur, tandem *Diascordium Fracastorei* aut simplex, aut *Simarrubia* permixtum, quod ita exhibitum majorem vim creditur habere, ad fabæ magnitudinem deglutiatur.

Ad idem clysteres ex aquia, in qua *melæcorium*, *plantago*, *rosæque rubræ* decoctæ sũnt, iniiciendĩ sunt. *Reobarbũ* quoque torrefactũ ob suam stiticam virtutem adversus alvi solutionem præstantissimam medicinam esse, nonnulli existimant.

His, similibusque præsidiis, si intrà paucos dies Senex non fuerit adjutus, in periculo est, nè a morbo vincatur; Si sublevetur, spes sanitatis affulget.

## §. XIX.

### *De Urinæ Difficultate.*

URINÆ difficultate, quæ vel a *fabulis* in renibus, vel a *calculo* in vesica diũ comorante ut plurimum principium habet, Senes laborare solent, & fere semper sine sanationis spe, ut comunis est Medicorum sententia, præsertimque Hippocratis, qui quum in facienda Medicina consenuisset, nullos supra quinquagesimum ætatis annum, calculis aliisque vesicæ vitiis affectos, sanatos se videsse affirmat. Parentis Medicinæ testimonium, experientia, quæ veri magistra merito habetur, satis superque declarat. Idcirco, qui hujusmodi vitiis cruciantur, præmoneri debent, aut nullam ipsis esse sanationis spem; aut



aut admodum parvam, ita enim aut nunquam decipientur, aut certe non frequenter in iis expiscandis remediis, quæ tamquam specifica nonnulli Circulatores impudentissima fronte commendant, & quæ certè in renibus, & vesica lapillos comminuendi nulla virtute valent; aurum verò ex marsupio bene nummato emungendi singulari virtute pollent:

Iis ergò nullomodo adhibitis, utpote infidis, & non sine discrimine remediis, solo victu simplici, & tenui, qui blande nutrire corpus, & ventrem semel unaquaque die saltem laxare valeat: solo aquæ potu, ex qua *malvæ flores*, *althææ radices*, aut *petroselinii* semina decocta sint, similibusve calculosi Senes eorum valetudini consulere satis habeant.

*Uvæ ursinæ* decoctum summis laudibus extollit Præcl. de Haen, quod in tota Medicina adversus istam affectionem nullum aliud efficacius invenerit. Id ego multiplici experientia comperit habeo, Peruvianos omnes, aliosque Americæ Meridionitis incolas, qui birra ex *frumento turcico* parata pro familiari usu utuntur, nunquam calculosa affectione laboravisse: quapropter hoc auxilii genus laude quoque sua dignum existimo.

Præterea, *Sapenem Penetum*, aut *Alonicum* mul-

ta aqua calcis dilutum sua auctoritate commendat Riccardus Mead, & Medicorum fidei experimentum committit; calcem autem ex ostreis, ovorum putaminibus, aliisque concharum testis accuratè parare docet præclariss. vir. Neque unius auctoritate hujus remedii virtus comprobatur, ut in docto viro Roberto Whytt Medico Edimburgensi inveniri potest.

Si tamen his præfidiis morbus non cedat, sed calculus in vesica, intus se opponens, urinæ egressum non permittat, argenteam fistulam in iter urinæ dimittere necesse erit, cujus ope urina ex vesica facile egreditur: Isque curationis modus, & blandus, & utilis esse solet, eoque duro, fereque crudeli *cistothomiæ* præsidio præferendus. Quum verò parum levaminis ex eo habeatur, quinimo morbus adeo ingravescat, ut omnis animi vigor, corporisque deficiat, perito cistothomo se tradere, prudentia suadet. Neque quærendum est, an quod unicum est, tutum remedium sit; Sed ubi illud experiri statutum est, victu tenui, & salubri, potu aquæ copioso, leni alvi subductione, & aliqua sanguinis distractione corpus ante aliquot dies præparandum est; tum curationi se subiiciat, quæ dura videri non debet, si ex ea spes sanationis affulgeat.

Tandem haud infrequens est in senibus, ut urila-

larium laxitatem, sive *paralysim*: quod vitii genus fere insanabile est; nam roborantibus cujuscumque generis auxiliis planè resistit, solumque levamen accipit ab urinæ frequenti extractione: Itaque immissa *argentea fistula* duodecima saltem quaque hora urina eiicienda est: aliter æger vitæ in discrimine versatur, fieri enim necesse est, ut nimis distenta vesica eum opprimat.

## §. XX.

### *De Urinæ Incontinentia.*

**U**Rinæ incontinentia, quæ græca voce *Enuresis* dicitur, facit, ut lotium invitè, & perpetuo distillet, quod vitii genus familiare quoque senibus esse solet, a relaxato videlicet vesicæ sphinctere, ejusque nervis longæ ætatis causa quodammodo resolutis, naturalique tono, & elaterio privatis.

Pertinax ferè hoc est, & sæpe immedicabile malum; quod simul id affert incommodi, ut non solum Senes urinoso odore vexentur, verum, & qui cum ipsis aut familiariter agunt, aut eodem utuntur contubernio.

Præterea pudibundæ partes ob perpetuam sal-

silo

si lotii irrigationem n̄edum intertigine infestantur; sed foedis quoque crustis, molesta prurigine, verrucisque deturpantur. Adversus huiusmodi vitium ea remedia valent, quæ roborandi nervos virtute maxima pollent: aliaque intus, alia extrinsecus opportunè applicantur. Inter illa, *cortex peruvianus* in primis laudatur; deinde *mars* in subtiliorem pulverem redactus, *vinum* quoque *rhenanum*; *tinctura coccinille*; *aqua calybeata*; *absyntii*, *agrimonie* quoque, & *menthæ* ex vino autero infusio. Inter hæc, Balnea nervina maximo profectui sunt, præsertim, si ex *majorana*, *mentha*, *cortice melacorii*, *balauſtiis*, *gallis*, *baccisque lauri* parentur. Præterea *pūbis*, *lumbi*, & *perineum* illiniri debent vel oleo *nucis aromaticæ*, vel *balsamo peruviano*, vel alio unguento nervino, quod ex gummibus, odoriferisque oleis confici solet.

Tandem mala externa, quorum in causa lotii stillicidium est, remediis ex Chirurgia petitis, ut *cerusa*, *alumine busto*, *precipitato rubro*, aut similibus opportunè adhibitis, facile curantur. Facilius vero præcaveri possunt, si *vesica Suilla* præparata lumbis alligetur, quæ urinam guttatim effluentem recipiat. Ita enim nec nares ingrato odore, neque pudibundæ partes urinæ acrimonia afficientur.

## §. XXI.

*De Podagra, arthriticisque doloribus.*

**E**X eo numero vitiorum, quæ Senum corpora circumvenire solent, nullum aliud pervulgatius est, quam *Podagra* & quidquid affiniatis vinculo ipsi conjungitur, veluti sunt coxendicis dolores, omnesque articulorum cruciatus. Cætera corporis vicia surgunt extemplò, & ferè semper extemplò dissipantur; hoc senectute nascitur, & quo plus ista invalescit, illud plus roboratur.

Veram hujusmodi vitii causam soli Dei, ait Arethæus, norunt; sed probabilem etiam homines; quum vero Medici adèò in diversas sententias abeant, an istam verè cognoscant, dubitari quoque potest. Celebris Doleus ab aciditate hostili ad corporis ambitum delata, & artus præsertim molestante podagræ causam deducit. Sed an acida sit, an alcalina materies podagram faciens, anceps, & incertum omnino est, quum ejus genuina indoles, & natura nullo adhuc indicio demonstrari possit.

Doctissimus Liger, qui librum de *artitride* conscripsit, causam morbi in quadam materie glu-

tinosa ponit, & de hac sua opinione hæsitantes ad cadavera *arthriticorum* incisa provocat; quorum articulos mucō tenaci obductos se semper vidisse, testatur: Verum hujusmodi gluten effectus potius podagræ, quam causa videtur.

Wansvieten cum præceptore suo Boerhaviō in eam opinionem devenit, quæ causam podagræ in subtilissima materie systema nervosum afficiente positam defendat. Sed cur potius in articulorum, quam aliarum partium nervos subtilissima hæc materies irruat, eosque dira in tormenta agat, præclarissimi viri non satis exponunt.

Insignis *Corerbill*, qui nuper opusculum *de causis, & curatione arthritidis* edidit, morbum non repetit ab aliqua materie, sed in arteriis minimis occlusis ponit; ejusque dolorem in sanguine a tergo per vices urgente, vique magna eas aperire conante. Hoc clarissimi viri systema fortasse causam doloris feliciter aperit: sed unde arteriæ occludantur, nullatenus declarat, adèoque inter hypotheses meritò reiiicitur.

Præcl: *Lifterus* existimat, ductus humori pituitoso excernendo proprios, aliquo modo in articulis labefactari, videlicet a labe hereditaria, a motu violento, a morbo, vel ab aliquo errore in victu commissio: unde excretionē impedita stagnat



gnat in articulis superfluous humor ; stagnando-  
que acrimoniam concipit, quæ inde sensibiles  
nervos stimulo laceffit ; itaque acerbos dolores fa-  
cit . Hoc systema cæteris præcellit ; quod cau-  
sam humorum acrimoniæ probabilem assignat ;  
sed sola statio humorum ad eam acrimoniam  
concupiendam, quæ tantas deinde tragædias mo-  
veat, quales in podagra observamus, minime  
sufficiens apparet .

Tandem Anglicanæ gentis memorabilis auctor  
Sidenamius, qui arthritidis tormenta ultrà trigin-  
ta annos expertus fuit, qui quæ ejus ideam accu-  
ratissime descripsit, a duobus principiis toto cæ-  
lo diversis materiem morbi deducit . Primum est,  
indigestio humorum a caloris, & spirituum defe-  
ctu orta : alterum, humorum calor, et exesuatio :  
Ideòque quod uni causæ prodest, alteri nocet ;  
unde tanta in curatione morbi difficultas . Sed  
rem acutè tetigisse non videtur vir iste, a cujus  
opinionem propterea Medici fere omnes recedunt,  
licet in reliquis tanquam infallibili Medicinæ Do-  
ctori ut plurimum assentiantur ; & ratio est, quia  
neque indigestio humorum, neque calor eorum-  
dem, neque exesuatio ulla podagram præcedit ;  
sed eam potius subsequitur : adeòque morbi effe-  
ctus, non causa utrumque apparet .

Inter tot, tamque varias sententias circa po-  
dagra

dagræ essentiam; nihil de ea sollicitus; causam tantum proximam inquiram. Causam tantum proximam hujus ægritudinis collocari posse existimo in quadam humorum acrimonia, quæ undequaque exoriatur, id habet peculiare, sibi que proprium, ut in articulo deponatur, non secus, ac scorbutica labes in gengivas, scrofulosa in glandulas colli, calculosa in renum meatus, venerea in pudenda, variolosa in cutem deferri proprium habent.

Hæc podagrica acrimonia, præter quamdam labem ex parentibus in filios quodam, veluti hæreditatis, jure derivantem, plerumque pro matre Venerem, Cereremque habet, pro patre Bacchum agnoscit. Quod adeo verum est, quàm quod verissimum: Qui enim in podagram, articulorumve dolores incidunt, ut plurimum, licentiori utuntur vita: In luxuria enim, Venerisque voluptatibus incontinentes sunt; in vino non jam quidem hilares tantum, sed effusi; in victu edaces. Et licet morbum, atrocesque ejus dolores centies experiantur, vix liberi sunt, *quum, tamquam ab inferis evasi*, ait Arethæus, *ad laxiorem vitam redeunt, & tanquam mortem brevi subituri, licentiosius vivunt.*

Quum varios de podagræ causa, & curatione magni nominis Medicos consulerim, eosque inter se dissentientes circa morbi essentiam invenerim; in

eo omnes convenire video: quod pro morbi curatione intra paroxysmum nullum fere præsidium in Medicina reperiatur: & præter aliquod sedativum auxilium, nihil tutò dari possit: extra paroxysmum verò plus spei in bona diætâ sit, quam in quibuscumque præsidiis, quæ circumforanei Medici, ut aurum a simplicioribus captent, exporrecta fronte jactare solent, mirisque laudibus commendare.

Quæ, quum ità sint, eam vivendi rationem modò subiiciam, cujus summa, strictaque observantia nonnullos malum in totum effuguisse, fereque omnes, non levi solatio affectos fuisse, certa scientia comperii. Senex. ergo, qui podagræ, arthriticis ve cruciatibus subsit, primam curam habeat, e lecto surgere, quum Sol ad meridiem accedat, ut ita matutinum frigus devitet, quod omnibus Senibus, sed præsertim podagra affectis, maxime contrarium est. Tum lactis caprini libram singulis diebus bibat: aliquando lacti cassè decoctio admisceri potest, interdumque gratissima Cocolata; sed fere semper absque ulla mixtione tutius bibitur; Ità enim facilius humores diluit, & corrigit, in prandio nihil ipsi edendum est, præter panem, qui ex alba siligine fieri solet, cui addi potest jusculum ranarum; quo oriza decocta sit. Caro omnino interdicenda est, sed ova  
fora

sorbilia, præsertim nuper edita concedi possunt; necnon teneri pisces, qui in mari degunt, eaque regione salubriores habentur. Oleribus uti non alienum existimo, præsertim, si dulci oleo condiantur, ut alvum emollire, laxareque valeant; oleribus *pira*, & *mala* sub cineribus assa cum profectu adjungi possunt. Omnia falsa, spiritosa & aromatibus condita tanquam canis, & anguis vitanda sunt. Illicò a Solis defectu cubitum eundum est, dulcique quieti indulgendum: & quo plus somni accedat, eò plus quoque levaminis accessurum est. Artus mane, & vespere linteolis perfricentur, quod auxilii genus crassos humores attenuat, stagnantes résolvit, impeditque tophos, sive nodos in articulis generari. Quotidianam corporis exercitationem singulari commendatione dignam Medici omnes existimant, ea tamen diligentia, ut in deambulationibus Senes sibi caveant a frigidi, & humidi aeris appulsu, qui insensibilem perspirationem impedire, aut retardare possit, ne humor, qui non perspiratur, in articulos dilabatur, eosque acriori stimulo laceffens; diris tormentis discruciet.

Hæc præsidia recta vivendi ratio adversus podagram suppeditat; ne tamen nos videamur remedia aliqua prætermittere, vel quia omnino nulla esse credimus, vel quia nimis tenaces sumus hujus Ovidianæ sententiæ,

*Tol-*

*Tollere nodosam nescit medicina podagram*

*Nec formidatis illa medetur aquis,*

Placet nobis in presentia, tanquam præstantissimum præsidium, usum proponere resinæ, in officinis *Gummi Guajaci* impropie diætæ, quæ quum viscidos, lentefcentesque humores potenter attenuet, sudores provocet, urinas ciet, stomachumque resolutum roboret, jam tanquam specificum ad podagram, doloresque ab ea natos vel penitus tollendos, vel saltem subveniendos laudatur; & quum laudi sæpius eventus responderit, digna videtur, ut in solatium humanitatis, posteritati commendetur.

## §. XXII:

*De iis febribus, in quas Senes  
frequentius incidunt.*

**Q**Uum mortalium pars ferè major, quemadmodum animadvertit *Sidenamius*, quæ in lecto perit, febre correpta pereat, jam modo videndum est, quod febrium genus Senes adoriatur, & quantum ex illis periculi ipsismet immineat.

Rarò in acutam, ardentemque febrem senes incidunt; in intermittentem verò, & Catharralem  
fre.

frequentissimè, quod non sine ratione videtur, quoniam illæ febres, ut plurimum, ex nimio fluidorum calore, & motu, auctoque solidorum elaterio oriuntur; istæ a debilitatis solidis, vapidaque fluidorum indole principium habent: Hanc autem fluidorum, & solidorum constitutionem frequentius in senibus; illam in adolescentibus experimur.

Febris, quæ intermittit, licet indole sua præsertim in adolescentibus, & viris innocua ut plurimum sit, senes nihilominus ad interitum sæpè deducit: fractis enim jam ætate viribus, quod remanet roboris facile infringitur, fatoque ineluctabili cedit.

Nihilominus, si opportunis auxiliis opem Medicus ferat, spes aliqua remanet, ut febrilis ignis sine gravi incendio extinguatur; si vero auxilia retardentur, febris sedem Animæ cogitantis invadit, ejus actiones lædit, humores corrumpit, secretiones retardat, spiritus dissipat, vires prostermit, & vitæ tandem usum adimit. Tot tantaque vitæ discrimina sæpius,

*Pulveris exigui jactu compressa quiescunt.*

Præmissio idcirco statim ac morbus incipit blando clistere, aut aliquo medicamento ex iis, quæ leniter alvum subducunt, illicò pulverem ex cortice peruviano largè exhibere oportet. Tenuis



modi remèdii sumptio nauseam, & tædium parit, morboque penitus debellando impar evadit. Attamen, si intrà tres dies partitis videlicet vicibus, ad uncias quatuor saltem exhibeatur, morbum certè opprimit, ignemque penitus extinguit.

Si verò id, ( quod raro contingere solet ) non subsequatur, iterum, atque iterum laudatus cortex vel simplex, vel sale absynthiorum permixtus repeti debet. Eòque audacius hoc præsidii genus exhibenum suadeo, quod nullum aliud in ampla rerum natura, aut tutius, aut efficacius Medicina invenerit, quam istum peruvianum corticem, quem Meridionalis America ad nos transmittit : corticem porrò pene divinum, cujus arborem jure meritòque possunt mortales *Arborem Vitæ* appellare. Hoc solo remedio magis, quam tot pretiosis gemmis, & quam tanto auro, & argento, quibus dives est Mea Peruviana Regio, super Europam, aliasque mundi plagas extollitur; laudemque maximam, & honorem meretur.

Morbo superato, ut in vado Senes sint, neque recidivam patiantur, prælaudatus cortex saltem ad quadraginta dies ipsis in usu sit. Si enim supervenisset febris, in angusto res esset, nam pefumdato corpore, debilioreque factò vi prægressi morbi, novo certamini cortex ipse impar

par evadit, adeoque, dum semel, atque iterum febris redit, Senes ut plurimum, dum frigus incipit, in ipso videlicet novæ febris accessu, extinguuntur.

Quum in prælaudato remedio tota spes sanitatis sit, animadvertendum est, quod si Stomachus illud respuat, *magisterium* ex eo paratum exhibere, oportet; Quo remedii genere instar miraculi, me Senibus sæpe opem præstitisse, lætus memoror.

Præterea *Tinctura Burgondica* pro famosiori dicta, quæ recreat oculos ob ejus venustum colorem, stomachumque roborat, propter *Vinum Ulyssipponense*, in quo *Cortex, cinnamomum, & Cochinilla* diù fuerint, summis laudibus commendari meretur. Tandem si his præsidiis *mars* superveniat, palmam præripiet, & de morbo victoria, ejus ope, plena habebitur: Nullum enim auxilium in tota Medicina ad pervicaces morbos subigendos præstantius est: Quò si carerem, ait Boheravius, ad morbos, præcipuè *chronicos, debellandos inermis porsus accederem. Martis* maxima virtus ab eo pendet, quod faciliè viscidos humores attenuet; & stomachi, & intestinorum fibras roboret, & firmet.

Curationem absolvit victus, qui facile digeri possit, & potio, quæ urinam moveat. Vinum, si degustatur, Hispanicum sit, aut Rhenanum, quod

quod stomachum roboret, viresque restituat. Equitatio deinde, aut vectio in curru multum admodum prodesse poterit, præsertim si ad quadraginta dies, & longius producat, ut ita viscera abdominis vires recipiant, impactasque morbi quicquillas sensim sine sensu atterendo, tandem cum uberrimo fructu discutiant. Corpus interim ab humido, frigidoque aere defendatur: fiunt enim a victu insalubri, & impedita perspiratione frequentissimæ recidivæ in hoc morbo, quæ, ut modò dixi, in decrepitis debilibusque corporibus semper cum discrimine conjunctæ sunt; rusticatio tandem proficua, imò necessaria existimatur eo tempore, quo jam æger a paroxysmis recessit, suppetiasque dabit *Cortex*: maximè, si ex frigida, & humida in siccam, temperatamque regionem cœli mutatio fiat. *Mirum est*, ait Sidenamius, *quantum valeat hæc aeris mutatio, præsertim in provectioris ætatis ægris, ad morbum hunc prorsus abigendum.*

Præter intermittentem, catharrali quoque febre non rarò Senes laborant, & ij præ reliquis, qui distillationes facile patiuntur, habituque corporis lymphatico præditi sunt; sed quum hæc febris morbi remedium sæpe sit, catharrum enim, aliasque distillationes faciliè concoquit, de ejusdem curatione dicere supersedeo. Id autem so-

lum animadverti dignum existimo, quod prudentis Medici munus sit, ut febrilem fomitem, qui sufficiens videatur ad catharri coctionem, suo genio indulgeat; qui debilior sit, aliquantulum excitet; qui verò nimis ferociat, aut penitus tollat, aut aliquantulum reprimat: Quo pacto Medici, & Medicinæ laudi sæpe vertitur.

### §. XXIII.

#### *De Hypochondria:*

**D**E his hætenus vitiis egi, quæ in Senum corpora agunt; modo ea ostendam, quæ in eorum animos vires suas immediatè exerunt, corpusque proxime attingunt. Et quoniam inter cætera multa, quæ animum afficiendo, corporis valetudini maximè adversantur, duo sunt, meo judicio, pervulgaria, *Hypochondria*, videlicet, et *Tristitia*: De iis distinctis capitibus modo agere non prorsus alienum existimo: Hypochondria igitur prima in medium proferatur.

Hæc maxima animi ægritudinum, quam ab atra et prutrescente circum præcordia bile originem ducere multorum opinio est, viros, & adolescentes miris modis discruciat, sed in ætate provectiores tyrannidem suam exercet: Is morbus quamvis unus-

tair-

natura sit, Prothei modo in variaas formas adeò mutatur, ut multos fingat. Quos autem frequenter corripit, sic torquere solet.

Senes atra bile correpti, quamvis in cæteris bene se habeant, aut graviore morbo jam esse affectos, aut inopinato interitum subituros existimant: Inde de vita, & valetudine adeò sunt solliciti, ut quoties alvum, aut vesicam exonerant, excreta maxima diligentia perscrutantur; Si alvus solito solutior est, jam Lyenteriam timent, & quæ ex ea sequuntur vitæ discrimina; Si vero parum scriptionis, tormina ventris pavent, dolores, colicam, & violentissimum ilei intestini morbum. Quum urina pellucet, *diabetem*; quum rubescit, inflammationem latitare in sanguine suspiciuntur, Cutem quoque circumspiciunt, & morfus pulicum, si forte vident, jam patechiali morbo, aut scorbutica labe se laborare metuunt; Si violentius deambulando parum anhelant, aneurisma, aut polypum in thalamo cordis accusant. Pluries in die speculum consulunt, et in eo imaginem suam contemplantur, si facies colorem, decoremque amisit, oculique parum concavi sint, mortem jam proximam illis indixit Hipocrates; si coloratior, aut speciosior sit, suspecta ex Celso bona sua habere debent.

Neque solum monstrosa cogitant; sed sæpè

quoque monstrosa faciunt . Modò enim sine causa rident , & in voluptatem delabuntur ; modò se in mœsitiam præcipitant, & involuntarie lacrimantur . Nonnunquam garruli , sæpius fiunt taciturni . Dulce somnum requirunt , sed sola noctis imago eos terret , adeo in somniis animus laborat , & vario phantasmatum adspe cū torqueri solet : Modò enim simulacra extinctæ sororis , modo conjagis , nunc filii , nunc carissimi amici ante oculos se habere , dormiendo imaginantur . Sæpe etiam tumidum procellis mære fragili nave fulcare , sæpè per invia saxa , aut loca ferarum plenis iter conficere per quietem vident : Inde tumultuosè excitantur , adeòque somnus , qui *persugium* , ut Cicero ait , *omnium laborum* , & *solicitudinum videtur* , ex eo illis *plurimæ curæ* , *metusque nascuntur* .

Ex levi quacumque causa , velut strepitū , insolitoque fragore adeo afficiuntur timore , quasi totus dilaberetur orbis ; statimque insequuntur borborygmi , ructus , sensus ponderis in ventriculo , faciei pallor , extremitatum refrigeratio , pulsus defectio , & urinæ frequens mictio ad instar purissimæ aquæ ex rupe scaturientis . Tunc quoque velut suffocabundi summam in respirando difficultatem , atque sensum globuli guttur constringentis , percipiunt , & veluti paralisi affecti



toto corpore tremunt, linguaque balbutiunt.

Non rarò in amicos, in ipsosque propinquos irascuntur sine causa, eosque valde reprehendunt, & furiose increpant. Testis Homerus est, ubi inquit: *Inter alios surrexit hæres Atridas tristis, atque furore circum præcordia oppletus, latè imperans Agamemnonem: ejusque oculi igni similes erant.*

Persæpe hominum consortium effugiunt, & in solitudinem se conferunt: Modo societate delectantur, eamque tanquam unicum suarum calamitatum solatium, adversaque in fortuna refrigerium prosequuntur. Demum ob turbatum spirituum animalium motum vota habent contraria votis: adeo ut melancholicus Senex sæpius

*Quod petiit, spernit, repetit, quod nuper omisit:*

*Aestuat, & vitæ disconvenit ordine toto.*

Nihil itaque mirum videri debet, si melancholicis vita ipsa tandem tædio sit; in tanta porrò animi ægitudine, corporisque molestiis mortem, tanquam rem jucundissimam miseri amplecterentur; sed sæpe fit, ut licet per multos annos ità vexentur, rarò exanimentur. Tàm gravis ægitudine, tantaque in ea affectuum pugna unde oritur, & quo naturæ arcano perficiatur, videant ij, quorum in contemplandis hujusmodi rebus

cura teritur; quum me graviora implicent, de ejus remedio protinus agam.

Prima medicina esset, (si multorum sententiam libere complecti liceret) ita animo, & corpore affectos ad Anticyram mittere, ut helleboro curarentur; sic enim ægrotari, insanire est. Sed quoniam mitius agere placet, nonnulla remedia partim ex Philosophiæ fontibus, partim ex penu Medicinæ deprompta docebimus.

*Et quoniam variant animi, variabimus artes,  
Mille mali species, mille salutis erunt.*

Quum igitur, propter mutuum commercium inter animam, & corpus sæpè eveniat, ut perturbato animo, corpus langueat, & corpore male affecto, animus angustia simul, atque gravi amaritudine conficiatur, opus est, ut remedium opportunum adhibere possimus, diligenter perscrutari morbi originem: Si enim ex corpore morbus incipiat, uno modo; si ex animo, alio curandus erit.

Quod ad remedium attinet, si ab animo oriatur, id fere unicum, præstantque est, quod ex Philosophia deducitur, utpotè, quæ sola animum regit, rationique imperat, juxta Ciceronis illud: *Philosophia medetur animis, sollicitudines detrahit, cupiditatibus liberat, pellit timores.* Excolant ergò Senes Philosophiæ studia,

ut unde haurire adjumenta adversus animi ægri-  
tudines habeant, patianturque ab ea sanari, quum  
aliter sanari vix queant.

Quum verò non animus, sed corpus primò  
ægritudine afficitur, multiplex est medicina, quia  
multiplex solet esse corporis temperamentum,  
quod modo uno, modo alio remedio movetur.  
Idcirco nonnulli Medicorum hypocondria laboran-  
tibus vinum bibere suadent; ait enim sapiens in  
Scriptura: „ *Date siceram moerentibus, & vinum*  
*iis, qui amaro sunt corde.* Hoc verò remediū  
genus malum lenire solet, non tollere; & frequen-  
tius accidit, ut post vini momentum vis morbi  
ferocius cruciet. Postquam enim vinum defer-  
vuit, se habent, ut frigidi Senes iusto igne se  
calefacientes, qui quum ab eo recedunt, magis  
a frigore molestantur, quàm si nunquam ad eum  
accessissent. Sed quod multo pejus est, melan-  
cholicus Senex ad vinum iterum redit, tanquam  
ad gratum amari animi solatium, corporisque  
ægotantis refrigerium, idque pluries in die, &  
sæpius usque ad ebrietatem: difficile est enim si-  
gnare remediū metam, atque in ea consistere, sed  
bibendo exhilaratur animus, continuò post se-  
quitur ebrietas, lubricus enim gradus est ab hi-  
laritate ad ebrietatem; Adeoque remedium malo  
pejus est: nam melancholia insania involuntaria,

ebrietas verò voluntaria est: illa conturbat animū  
hac ne dum conturbat, verum & alienat.

Quæ quum ita sint, remedium, nisi adeò gratum, & voluptuosum, tutius saltem adhibendum est. Hac de causa nonnulli præstantissimi Medici lac aut muliebre, aut asininum, aut denique caprinum, vel vaccinum exhibendum suadent, præsertimque iis, qui gracili, exsaccoque temperamento præditi sunt: Alii *martem* amaris, & aromaticis remediis commixtum consiliant maximè illis, qui mollem laxamque corporis constitutionem habent; multi tandem balnea frigida, gelidasque portiones melancholicis egregiè prodesse affirmant, iisque præcipue, qui systematis nervosi, aut nimia irritabilitate, aut imbecillitate laborant.

Licet autem in tot sententias circa remedia scindantur Medici, circa tamen rationem vivendi, in eo omnes conveniunt, quod cunctis ita affectis cujuscumque constitutionis, ac temperamentī sint æque proderint aer purus, atque temperatus, victus simplex, & parcus; potus ex aqua, cui vini generosi quidquam admisceatur; somnus longior potius, quam brevior, semperque tranquil-  
lus; alvus quotidie aperta, & urinae viæ reserata; mens hilaris, neque curis sollicita; exercitatio tandem quotidiana, præsertim quæ in equo, aut curru fieri solet: rusticari quoque, & navi-  
gari

gari ut corpus, sic animum immutant, adeòque melancholicis opportuna æque præsidia sunt. His salutaribus Medicinæ præsiidiis, si morbus non devincatur, summa patientia tum ægris, tum Medicis necessaria est; illis, ut æquo animo adèò molestam ægritudinem ferant: his, quia nesciunt, par gravi malo invenire remedium. Necessarium quoque existimo, ut Medici dicendi facultate, dulcique eloquio valeant, ut quoties remedia deficiant, saltem juxta Horatianum carmen:

*Sint verba, & voces quibus hunc lenire dolorem*

*Possint, & magnam morbi depellere partem.*

Erit igitur consolationis primum remedium in sinuare ægrotis, aut nullum malum esse, aut ad modum exiguum. Si verò falso imaginari non desinant, se graviter ægrotari, quàm tantum leviter valeant, lepidam, atque jocosam, docet Cicero, parare Medicinam. *Eripiamus*, inquit *his ægritudinem. Quomodo? Collocemus in culcitra plumea, psaltriam adducamus: demus scutellam dulciusculæ potionis, aliquid addamus & cibi.* Ità enim fieri potest, ut phantasia conceptus morbus gravissimus, per suavem, gratissimamque curationem, vel leniatur, vel penitus auferatur.

Demum animadvertere licet, quod Hypochondriaci Senes, quamvis molestia, & tædio Medicis sæpe sint, non tamen sine lucro tædium afferunt.

Quo-



Quoniam eorum patientiam si vanis sollicitudinibus exagitant, animum quoque muneribus exhilarant; multa videlicet illis elargiendo, non virtute animi, sed suspitione concepta, ne Medici eos destituant, si minora meritis præmia ipsis exhibeant.

## §. XXIV.

### *De Tristitia.*

**I**Am tandem de Animi Tristitia agam, quæ cum affectione Hypochondriaca non raro conjungitur, & æque molesta, quam perniciosa Senibus est: Hinc non sine ratione dixisse Cassiodorus videtur, „ *Nil est, quod Senectuti magis noceat, & dies hominum breviet, quàm tristitia.* Optandum propterea est, summoque studio, maximeque diligentia curandum, ut hujusmodi ægritudinis causæ a Senum animis removeantur.

Quatuor capita invenio, cur Senes haud infrequenter, in tristitiæ amaritudinem incidant: primum quia timent, ne ipsis deficiat viaticum in Senectutis extremo: alterum, quoniam sentiunt, se in ea ætate esse odiosos aliis: tertium, quia natorum illis inspicendus est interitus: quartum, quod videant, se procul non esse a morte. Sed



hæ tristitiæ causæ moralis Philosophiæ præceptis, & Cristianæ Religionis Institutionibus facilius evinci possunt; quàm recta victus ratione, aliisque Medicinæ præsidiiis. Ex illis igitur saluberrimis fontibus remedia hauriamus.

Primum tristitiæ caput timor est, ne illis deficiat viaticum ad conficiendum iter, quod ipsis remanet ævi. Sed qui fortè id timent? An illi, qui rerum omnium inopia laborant; an verò quibus crumena nummis plena est, & vitæ commoda suppetunt? Primi profecto non timent, quia nihil habent, quod perdant: Si autem aliquid sperant, spes potius in miseriis, illis solatii, non tristitiæ causa esset; *spes enim alit miseros*. Alteri profecto timere possunt; sed immeritò. Quid enim stultius est, quàm divitias habere, & inopiæ misérias tollerare? Hanc animi ægritudinem non recte rationis usus, sed avaritiæ vitium generat; vitium, eo magis, & magis crescens, quo magis ætas invalescit. Videbis profecto Senes affluentès divitiis, qui nec albo pane vesci, nec meracum degustare audent, sed vappam libenter bibunt, & veluti vilior agaso offis, pulmentis, & atro pane nutriuntur. Hi porro timent, ne ipsis deficiat viaticum in Senectute, non quod divitias non habeant, sed, quoniam scrinium videre amant nummis plenum, non ipsis sed

sed hæredibus aliquando tandem profecturis : Id autem stultitiæ quædam species est, quam si Senes Philosophiæ præceptis non medeantur.

*Nescio, an Anticyram ratio illis destinet omnem.* Cogitent ergo Senes, seriòque, & assiduè meditentur, nihil illis divitias prodesse posse, si nesciant usum, artemque ipsis fruendi; quas non solum si sapiunt, in propria commoda, sed etiam in amicorum, & propinquorum commoditates vertere debent; ex quo salutari usu, velut ex fœcundissimo fonte, multas haurire possunt utilitates; si vero divitiis aliter utantur, unde sperare aliquid commodi minime habebunt, juxta Horatianum illud.

*At si condoluit tentatum frigore corpus,  
Aut alius casus lecto te affixit, habes  
Qui assideat, fomenta paret, Medicum roget, ut te  
Suscitet, ac reddat natis, charisque propinquis.  
Non uxor saluum te vult, non filius, omnes  
Vicini oderunt, noti, pueri, atque puellæ,  
Miraris cum tu argento post omnia ponas,  
Si nemo præstet, quem non merearis, amorem.*

Vide quam solertèr, & elaganter Horatius, Senes avaros monet, ut avaritiæ vitium nedum effugiant, sed odio quoque, ut ita dicam, Vatiniano prosequantur.

Alterum tristitiæ caput est, sentire se in ea æta-

te odiosos aliis esse. Sed quibus? An illis, qui in eadem ætate sunt, & fortuna? Minime quidem: quia similes similes diligunt, & mutuò inter se jucundissimè conveniunt. Fortasse ne odio sunt adolescentulis bona indole præditis? Neque iis sanè, quum hujusmodi indolis adolescentes Senum doctrina, præceptisque delectentur, quibus valeant præterita cognoscere, & futura prævidere; necnon instrui, & dirigi ad virtutes imitandas; studiaque litterarum ediscenda.

Senex ille tantum odiosus esse solet, qui non bonis moribus, sed sola garrulitate, ætatis reverentiam defendit; qui ea loquitur, neque facit, quæ canos decent; Qui omnia præsentia contemnit, & solum, quemadmodum ait Cornelius Gallus,

*Laudat præteritos, præsentis despicit annos,*

*Et tantum rectum, quod facit ipse, putat.*

Hoc vitium adèò familiare senibus esse solet; ut ad nauseam quotidie repetant, everfos esse mores, in deterius res humanas, & divinas abire, omneque fas labi. *Ast ista*, ait Seneca, *sunt eodem loco, stabuntque, paululum dumtaxat ultrò, citroque mota, ut fluctus*. Quæ quum ità sint, hæc vitia maxima cura Senes vitare debent. Careant ergo nimia garrulitate, careant inani gloria, luxuria, avaritia, intemperantia, & ita nec aliis odio erunt, neque ipsi incident in tristitiam,

malaque gravissima; quæ eam, velut umbra corpus, comitantur.

Tertia tristitiæ causa illa est, quod videndus Senibus sit Natorum interitus, quum non aliter homines, nisi *renovata* ait Juvenalis.

*Semper clade domus, multis in luctibus, in que  
Perpetuo mærore, & nigra veste senescant.*

Sed natorum, qui parentibus charissimi sunt, interitum æquo animo tollerare, docuit Anaxagoras, qui audita morte filii, *nihil*, inquit, *inexpectatum: sciebam ex me natum esse mortalem*. Non audivit vir sapiens tamquam rem novam filii mortem: & meritò. Quid enim antiquius est, quàm homines mori? quorum vita, ut ait Seneca, ab ortu ipso iter est ad interitum: mortisque in arbitrio sit, ut modò fortes, modò imbecilles, modo Senes, & modo juvenes rapiat.

Juvenes profecto, etiamsi primo ætatis flore sint, mori possunt, Senes verò debent; & licet a juvenibus aliquid, a Senibus mors non potest longè abesse. Dices ergò (quod ultimum tristitiæ caput) non molestum est, atque tædii plenum, mortem ante oculos habere? Minimè, sapientes reddunt. Quod enim secundum naturam est, non grave, non molestum esse debet; sed leve, sed jucundum. *Quid est autem magis secundum naturam*, ait Cicero, *quàm senibus mori?*

Si autem molestum est, & injucundum ad mortem accedere, id porrò insipientibus erit, & impiis, non vero iustis, & sapientibus viris. Hi æquissimo animo mortem ad spectant: illi iniquissimo. Quoniam sapientes, & iusti vident, & sperant ad meliora proficisci; impii verò, & stulti non vident, nec cur sperent, quid habent. Isti corpus, tanquam domum perpetuo habitandam vellent: illi tanquam hospitium intuentur, ex quo jam brevi sunt discessuri, ut ad illud divinum concilium, coetumque animorum proficiscantur. *Ubi, quemadmodum ait D. Augustinus, juvenus nunquam senescit, ubi vita terminum nescit, ubi decor nunquam pallescit, ubi calor nunquam tepescit, ubi sanitas nunquam marcescit.* Non ergo animi tristitiam facere mors illa debet, quam immortalitas consequitur, præsertim, si ante actæ bonæ vitæ recordatio, tempus jam esse maturum nuntiet ad percipiendos æternæ Fœlicitatis fructus, eamque vitam obtinendam, quæ est sola vita nominanda.

Hæc præcepta ex moralis Philosophiæ fontibus & Cristianæ Disciplina Institutionibus eo libentius exhaurivi, quominus in amplo Medicinæ penu nulla invenerim, quæ aut animi ægritudines lenire, aut ea radicitus evellere valeant. Oportet idcirco, eos qui Apollineam artem profitentur  
 illis

istis quoque disciplinis ediscendis incumbere, ut quoties Medica Scientia deficiat, Cristiana, & Sapiens Philosophia partes ejus suscipiat. Nam quemadmodum Medicinæ munus, corpora a morbis liberare, ita Philosophiæ est, vitia ex animis evellere.

F I N I S.



# I N D E X

---

## PROLOQUIUM

*De Senectute consequenda, ipsaque  
diutissime producenda.*

### P A R S I.

*Quæ indicia in ipsa hominis, rerumque natura esse solent, ex quibus Vitæ diuturnitas prælagiri, meritoque sperari possit.*

### P A R S II:

*Quæ ratio Vitæ instituenda sit ab Adolescentia, ut possint Homines ad vegetam Senectutem faciliè pervenire.*

### P A R S III.

*Quid vivendi genus sit, cujus notitia, constantique observatione homines pervenire possint ad summam Senectutem.*

### P A R S IV.

*In quæ mala Senes frequentius incidant; Unde eorum origines; Et quibus Medicinæ auxiliis aut tollenda sint, aut lenienda.*

#### §. I.

*De respirandi difficultate. — — — Ca. 69.*

#### §. II.

*De nervorum resolutione. — — — Ca. 76.*

#### §. III.

## §. IIII:

De aqua intereunte. — — — — — 83

## §. IV.

De stomachi debilitate. — — — — — 86

## §. V.

De nausea, et vomitu. — — — — — 88

## §. VI:

De malo Corporis habitu. — — — — — 92

## §. VII:

De Virium languore. — — — — — 94

## §. VIII.

De nimia consumptione. — — — — — 101

## § IX.

De nimia obesitate. — — — — — 105

## §. X.

De cunctis pruritu. — — — — — 108

## §. XI.

De extremitatum refrigeratione. — — — — — 110

## §. XII.

De oculorum vitiis. — — — — — 113

## §. XIII.

De aurium vitiis. — — — — — 115.

## §. XIV.

De distillationibus, &amp; de catharro. — — — — — 118

## §. XV.

De vigiliis — — — — — 121

## §. XVI.

De Sopore. — — — — — 124

## §. XVII.

## §. XVII.

De alvo soluta. ————— 129.

## §. XVIII.

De alvo stricta. ————— 126.

## §. XIX.

De vesicæ difficultate. ————— 130.

## §. XX.

De urina involuntaria. ————— 133.

## §. XXI.

De Podagra. ————— 135

## §. XXII.

De febribus. ————— 141

## §. XXIII.

De Hypochondria. ————— 140

## §. XXIV.

De Tristitia. ————— 154























208 / 0657  
200 / MED

